

萬 有 文 庫

第 二 集 七 百 種

王 雲 五 主 編

宋 文 鑑

(九)

呂 祖 謙 詮 次

商 務 印 書 館 發 行



宋 文 鑑

(九)

呂祖謙證次

國 學 基 本 叢 書

宋文鑑卷第六十七

表

謝南郊加恩表

謝皇帝罷謁太廟表

謝賜生日生餼表

謝賜生日禮物表

越州謝上表

越州謝上表

謝致仕表

定州謝上表

河陽謝上表

賀熙寧十年南郊禮畢大赦表

謝元豐元年歷日表

謝翰林侍讀學士表

謝致仕表

宋文鑑 卷第六十七

王珪

王珪

王珪

沈文

元絳

元絳

呂公著

馮京

曾鞏

曾鞏

范鎮

范鎮

范鎮

謝龍圖閣直學士表

宋敏求

安州謝上表

滕甫

謝澶州簽判表

程顥

代謝進和御詩獎諭表

強至

代都運趙待制謝上表

強至

代謝再任表

強至

謝南郊加恩表

王珪

奉二精之報。方錯事於崇丘。獵三靈之流。遂均釐於邇輔。仰承嘉命。俯惕孤衷。伏念臣蚤會昌期。進聞國論。器雖狹於所用。志常勇於有爲。屬修郊廟之祠。叨與公卿之議。鳴鐘在簾。獲際靈旂之娛。紆佩埽塗。親承天步之恪。曾乏秉文之助。得觀繼聖之能。逮敷錫於鴻休。復過膺於寵數。論非朝允。恩實天隆。茲蓋伏遇皇帝陛下。文輯闕希。仁漸疏逖。因神推惠。旣被□魚之豐。爲己掠功。何勝淵谷之畏。尙勉殫於樸守。期少謝於曲成。

請皇帝罷謁太廟表

王珪

近嘗拜章。以大慶殿將行恭謝天地之禮。乞罷前一日謁太廟者。伏以升燎于壇。旣節徂郊之禮。奉璋于室。宜裁假廟之文。俞音未回。羣聽猶鬱。恭惟尊號皇帝陛下。膺純耀之烈。撫休明之期。蓋神勞萬務。則氣或整和。以德交三靈。則福亦旋感。念保綏於鴻業。思昭謝于高穹。迺涓路寢之居。以象園丘之饗。粢盛芳

潔璧玉華光。方將陟配三后之靈。導迎上帝之貺。茲誠爲人子者孝之盡。有天下者報之隆。今復馳齊蹕之嚴。祇太室之薦。竊恐霧露之氣。涉于宵衣。輿馬之音。震乎天步。則非所以承祖宗之愛。來邦家之休。臣等冒秉化鈞。獲司熙典。謂文之所損。在于適時之變。且事不敢勉。誠以愛君之深。冀專並侑之虔。願弭先期之謁。儻乎衆欲。是契天心。

謝賜生日禮物生餼表

王珪

詔函俯暨。臺饋申頒。絕衡弼之異恩。動里閭之殊觀。伏念臣所懷蹇淺。自奮羈單。方少而孤。每感劬勞之日。其生也幸。得遭熙盛之朝。遂以區區投老之身。而處赫赫具瞻之地。輿圖邦政。固無經遠之謀。式燕私門。更課養賢之禮。此蓋伏遇皇帝陛下。寵綏近辟。不冒庶工。謂君臣同體。則憂樂宜均。而上下相求。則報施爲重。幣繪實篚。寵已厚於解衣。餼廩盈庭。愧有加於浮食。敢不內竭朴愚之守。上酬獎顧之深。

謝賜生日禮物表

王珪

聖言如綉。有溫厚於芝函。邦錫自天。發光華於蔀室。榮踰素望。愧溢常涯。伏念臣以固陋之資。被睿神之眷。迺預塵於政路。復冠列於台司。歲月崢嶸。而屢更精力。勤勞而莫□。□譏讒於衆口。愧功烈於前人。逮茲苟完。安有橫翼。載及桑蓬之序。方深帖屺之思。念莫報於劬勞。敢夔承於恩禮。良金燭乘。嚴寶約於天駒。藻帛絢文。雜華章於笥服。豈繁蕃庶。併及衰遲。此蓋伏遇皇帝陛下。敦舜孝以儀民。軫堯仁而冒物。特厚柄臣之遇。過盼御府之珍。交孚曲記於賤生。博愛乃容於濫觴。拜漢廷之寵。雖慙稽古之工。報周雅之章。願上如岡之壽。

越州謝上表

沈文通

以親爲請。得郡甚優。越去宮庭。介居江海。就職之始。撫心弗寧。伏念臣本維諸生。知守前緒。親逢文治之盛。冒塵科選之榮。擢躋儒林。遂執史筆。學不足以達治亂。於顧問實難。文不能以通古今。於述作何有。誤出聖朝之遇。進登侍從之塗。黽勉備官。逡巡侍罪。雖大恩未報。豈敢便安其身。顧私養弗充。不勝進退之迫。輒以誠乞。既茲奠居。幸溢於涯。感無以喻。此蓋伏遇尊號皇帝陛下。天地之德。覆載而無所不容。日月之明。照臨而無所不暨。故臣得遂其犬馬之志。安于藩翰之間。況茲爲州。自昔建國。連帶數鄉之廣。總齊萬兵之權。有可以爲當無所苟。尙寬東顧之慮。少獲萬分之心。

越州謝上表

元絳

□□□□□□□□□□。懼分符□右。特荷保全。仰服恩章。惟知感涕。伏念臣習知忠誼。竊慕功名。歷事三朝。行將四紀。向自北垂之漕。就更南粵之塵。蒙臨遣以丁寧。敢遑安而留滯。載驅長陸。甫及半途。忽聞羽檄之音。謂有龍編之警。橫水明光之甲。得自虛聲。雲中赤白之囊。倡爲危□□□。擾動朝聽。震驚況臣□□。守臣敢愆奔命。風馳南海。已久見於吏民。日遠長安。蓋未聞於章奏。仰煩宵旰。咨及臣鄰。謂獲塞之急人。且擇人而代戍。驅車萬里。虛出玉關之門。秉駟一麾。幸至會稽之邸。尙兼方面。彌畏人言。此蓋伏遇陛下。法道曲全。等天丕冒。以臣更事。緜久備歷。四方之勤。知臣立朝。最孤迥無一介之助。渙然休命。付畀价藩。臣敢不訓旅以嚴。安民以靜。庶希樂易之治。仰補熙隆之時。銜賜不貲。論生曷補。

謝致仕表

元絳

四載披誠。斬還於朝組。九重垂聽。申錫於詔函。預儲宮之備官。遂家林之佚老。伏念臣衣纓衰緒。樗櫟下材。再齟而孤。僅能構思。未冠而仕。始務代耕。惜儒術之逢原。狃吏文之宿業。歷官二世。服勞四方。蒙上聖之誤知。自東州而卽召。擢真詞禁。進處冬官。浸膺選衆之求。竊貳贊元之任。近藩出守。遇潛邸之建旄。別殿追還。復露門之奉席。遽周歲律。屢對威顏。自惟癡朽之餘。每循止足之戒。深辭圭紱。冀就田廬。齒孤鳴。空懷疲戀。槁骸如在。正欲全歸。仰煩睿訓之慈。終竊愚衷之守。不圖寵眷。加進榮階。存東宮保養之官。仍西清嚴近之職。効華封之祝聖。佇見多男。階商皓之通賓。願護太子。恩隆山岳。感挾肺肝。此蓋伏遇皇帝陛下。大道曲全。至仁博施。念師丹之垂老。久已宣勤。察衛綰之無他。居常遠恥。越推渥渙。獲保初終。詔里俗而有輝。顧師言而至愧。冥鴻雖遠。正依天囿之函容。時養未彫。尙儗日華之明潤。逢辰知幸。之死不忘。

定州謝上表

呂公著

尸榮右府。無裨廟筭之奇。假守中山。復當閹制之重。戴恩爲懼。虔命以行。過屆郡封。恪宣條詔。伏念臣降才譾薄。植性懦弱。學術不足以稽五謀之疑。識慮不足以籌千里之勝。特以百年舊族。荷累聖不貲之恩。一介微軀。辱上主非常之遇。蚤緣寵渥。更踐清華。晚收疏外之孤蹤。擢替微幾之要務。奉天光而咫尺。被聖誨之丁寧。謂臣世服近僚。有均休共戚之義。察臣傍無厚援。絕背公死黨之嫌。曲示優容。俾思報效。顧鶩鉞之難強。嗟蒲柳之易衰。久預材司。積有妨賢之畏。洵祈麾寄。更圖陳力之方。伏遇皇帝陛下。體虛靜以儲神。極高明而盡下。俯矜素悃。特霽俞音。惟定武之奧區。據朔垂之重地。尙叨付委。靡卽棄捐。仍進敍

於文階。且兼華於祕殿。併將厚意。增賁舊臣。況臣夙侍軒墀。實司樞筦。凡治軍經武之要。洎守塞禦戎之宜。日炙睿謀。備觀宸斷。逮茲臨遣。得以遵承。謹當細大必躬。夙宵彌勵。進不敢希功而生事。退不敢弛備以曠官。期不玷於誤知。庶少酬于鴻施。

河陽謝上表

馮京

久塵右地。無補聖明。坐竊邇藩。尙寬罪戾。恩私溢望。愧灼兼懷。伏念臣才不逮中。智非經遠。特逢盛際。再列近司。擢之於尋常之中。振之於顛危之下。便蕃異數。究極寵光。齷齪備員。僅能寡過。碌碌成事。無足論功。徒肩許國之誠。靡講衛生之術。曩嬰疾疹。殆至膏肓。雖賴上醫。迄存餘喘。然而氣血潛耗。智慮早衰。筋力乏於步趨。耳目乖於聽覽。勉從職事。仍歷歲時。覆餗之譏。已騰衆口。乞麾之請。遽惻上心。矧惟右輔名都。三城重鎮。水陸皆便。次舍非遙。食物具宜。堂皇尤峻。□□罕經於館候。訟牒希至者庭除。加以時雨旣優。宿麥滋茂。盜賊屏息。閭里阜安。不煩施爲。有便頤養。此蓋伏遇皇帝陛下。天地容覆。日月照臨。私臣以不報之恩。諒臣有可矜之理。終始眷遇。進退保全。顧何心顏。敢愛軀命。惟願稍加藥餌。益近方書。朝露未晞。儻復還於舊觀。爍火不息。誓更竭於精神。

賀熙寧十年南郊禮畢大赦表

曾鞏

人之所歸者莫如德。天之所享者在於誠。其惟聖王。克有全美。伏惟皇帝陛下。聰明稽古。承繼祖宗。慈惠愛人。撫臨邦國。有徧覆并容之大度。有防微慎獨之小心。不從遊畋。不近聲色。無紛華盛麗之好。無便辟側媚之私。歲時吉蠲。以承七廟。左右順適。以奉兩宮。其功施於人。效見於事。則宅仁由義。縉紳之徒。成材

於學校。超距。蹋鞠。熊羆之旅。養勇於營屯。甌窶。汙邪之收。充於倉廩。關石和鈞之利。阜於市廛。家有豫樂之聲。人無愁怨之色。協氣所召。休應自殊。鉤陳太微。星緯咸若。崑崙渤澥。濤波不驚。近則金石之音。鳥獸欣躍。遠則干羽之舞。蠻夷駿奔。象齒旅於闕庭。龍媒納於閑廐。是謂六府三事。皆可以歌。四海九州。罔不率俾。蓋巍巍而特起。非瑣瑣之能闕。前世議太山之封。謀梁甫之禪者。度崇比大。疇克登茲。陛下仰而不圖。謙以自牧。以謂先后創業垂統。其功莫得而名。上帝隕祉發祥。其德無可以稱。思所以報一本於心。故寅畏嚴恭。積之有素。而齊明熏祓。進而益虔。在於物者。不取其煩。盡諸己者。必求其實。是以蕭光之烈。奏於宗祊。柴燎之蒸。焜於郊兆。幽隱昭答。神靈顧懷。無疆惟休。方寢昌於萬世。不敢專享。故敷錫於羣元。稽參典彝。定著赦令。弛張從理。同異稱情。蠲罪皆而棄瑕疵。錄勞能而縱逋負。顯晦咸暨。洪纖不遺。萬國之歡。既交於沖漠。一人之慶。遂及於跂蠕。孚于上下之間。極乎帝王之盛。臣被學最舊。蒙恩寢深。莫待甘泉之祠。獨嘆周南之滯。第從臣之嘉頌。未效薄材。望屬車之清塵。但馳遠思。

謝元豐元年歷日表

曾鞏

一遠闕庭。十移星歷。顧彫零於齒髮。無報補於毫分。伏惟皇帝陛下。敍大禹之九疇。齊有虞之七政。陰陽寒暑。罔不若時。草木昆蟲。舉皆遂性。循用頒正之典。寵詒分土之官。臣幸備守藩。預聞告朔。去親方遠。已驚歲月之新。許國雖堅。更嘆功名之晚。惟體在民之意。庶裨及物之仁。

謝翰林侍讀學士表

范鎮

省中四禁。忘誤其一。苟或有犯。加罪不原。猥蒙貸全。猶藉親近。內自循省。以榮爲憂。竊以賞而受賞者。若

固有之善賞也。罰而被罰者。知自取之善罰也。成王舉魯七百里之地。以封周公。周公拜於前。魯公拜於後。而不以爲泰者。功所當也。管仲奪伯氏駢邑三百。沒齒無怨言者。罪所宜也。伏惟皇帝陛下。錄社稷之功。而賞加輔臣。重書詔之失。而罰及學士。賞所當賞。罰所當罰。明命一出。中外聳然。因使天下之人。曉然知先帝與子之明。而羣臣得君之慶。臣於此時。死固無憾。況蒙再造。使之更生者乎。重念臣出乎遠方。孤陋朴訥。臣子忠義。則嘗講聞。朝廷典章。實匪練習。果緣所短。有玷斯猷。不加蕭斧之誅。才換金華之職。雖云薄責。足警羣倫。且天地大恩。固無論報之理。而冰霜素節。猶有持守之常。願堅初心。以收來効。

謝致仕表

范鎮

早衰多病。得謝歸休。有命自天。所容如地。仰銜恩紀。伏竊兢榮。伏念臣本出孤生。歷塵臚仕。曾無報効。虛積歲月。仕宦之年。已更一世。遭逢之幸。實事三朝。徒有愚忠。以自信處。雖曰乞身而去。敢忘憂國之心。因敘人言。上干天聽。曲蒙寬貸。未賜誅夷。得於盛明之時。以遂閑適之性。伏惟皇帝陛下。審持賞罰。而一誘於公。總秉權綱。而不移於下。集羣議爲耳目。以除壅蔽之姦。任老成爲腹心。以養和平之福。躋民富壽。措國康寧。臣之至情。實在於此。

謝龍圖閣直學士表

宋敏求

推宸辰之誤恩。備禁塗之常從。聞命榮抃。省躬兢惶。伏念臣性理蠢冥。局致庸近。猥緣承學之舊。寢沐右文之風。英宗皇帝。拔自書林。寘於詞掖。雖汲黯蚤進。謬旅於雋游。而蕭育稀遷。自安於拙分。一叨獎拔。星紀僅周。固嘗勵翼其心。靖共所守。願命義以弗苟。務忱恂而匪他。以至陟諫臣之坡。司史氏之筆。還儒館

而塵麗正之職。分使節而贊甘泉之儀。益忻聖旦之親逢。莫匪臺家之茂選。而曲綏皇眷。冒進榮階。謂臣嘗事先朝。典右曹之綸綍。俾臣特陞延閣。直西序之圖書。撫棄迹以重收。帖龍名而差敘。帶環申錫。詔檢垂褒。此蓋伏遇皇帝陛下。權綱大新。恩斷中出。均天地之平施。煦及陳荻。回日月之餘光。豐於葑室。致茲寇器。亦預清班。敢不慎服官箴。勤殫忠蘊。庶圖來效。少報洪恩。

安州謝上表

滕甫

屢致人言。固宜竄殛。曲蒙天造。尙賜保全。雖易守符。仍叨善地。士民純秀。幾同廣魯之流風。里俗驩康。正值元豐之樂歲。安閑事簡。尸素爲慙。伏念臣本以愚儒。出逢真聖。首蒙國士之遇。最在衆人之先。便欲碎首以酬恩。未知死所。故嘗指心而自誓。惟有天知。況事任既已徧更。在人情寧不愛惜。豈有固爲緩縱。自取顛隳。惟日月之至明。亮肺肝而必照。矜憐舊物。收置近藩。而朝廷難廢於公言。故君父特存於大體。稍從遠外。終不棄捐。顧臣何人。受恩若此。此蓋伏遇皇帝陛下。神聖徧物。清明在躬。化覃無外。之封疆。仁及何知之草木。況臣累更器使。粗效愚衷。眷此遺簪。嘗辱提攜之末。譬之行葦。更收踐履之餘。臣敢不祇奉簡書。服勤吏役。雖桑榆之景。將逼暮年。而犬馬之微誠。猶思後效。

謝澶州簽判表

程顥

論議無補。職業不修。國有典刑。罪在誅戮。曲蒙宏貸。仰荷洪私。期於糜捐。莫可報謝。臣性質朴魯。學術空虛。志意粗修。智識無取。陛下講圖大政。博謀羣材。過聽侍臣之言。猥加風憲之任。臣旣遭遇明聖。亦思誓竭疲駑。惟知直道以事君。豈忍曲學而阿世。屢進闕疎之論。愧非擊搏之才。徒嘗剝瀝肺肝。曾無裨補毫

髮既不能繩愆糾謬。固不願沽直買名。豈敢冒寵以居。惟是奉身以退。自劾之章繼上。闔門之請深堅。天意未回。憲章尙屈。更奉發中之詔。俾分提憲之權。不惟沮諍論之風。亦懼廢賞刑之實。力形奏述。恭俟誅夷。此蓋伏遇皇帝陛下。極天清明。普日臨照。洞正邪之心迹。辨真僞於幽微。察臣忠誠。恕臣狂直。不忍置諸重辟。投之遠荒。解其察視之官。處以便安之地。生成之賜。義固等於乾坤。涵容之恩。重更逾於山嶽。臣敢不日新素學。力蹈所知。秉心不回。信道愈篤。願徇小夫之志。不爲儒者之羞。或能自進於尋常。庶可仰酬於萬一。

代謝進和御詩獎諭表

強至

參羣篇而奏御。賡載非工。被優詔之發中。褒嘉甚渥。惕然拜君父之賜。藏以爲子孫之榮。伏以書曰。帝庸作歌。所以極道明良之意。雅云。臣能歸美。所以上酬福祿之辭。惟千載一時之逢。踰三王二帝之際。乘太平之多暇。講稀闕之盛游。歷寶宇以披祖宗相受之文。御飛帚以縱神聖有餘之學。以至置酒別殿。賦詩中宸。于時從聯咸續。睿唱如臣者。有朴愚而植性。無文采以表身。自陪風憲之要司。都廢雅言之舊學。安扶鄙思。綴成斐章。大樂在前。發哇聲而接響。太陽臨下。銜燭火以交光。旣黷遂旒。若臨深谷。敢謂兼容之度。例形過獎之辭。游聖門者謂之難言。矧繼堯文之後。諭華袞者重夫褒字。矧蒙漢訓之加。夫何孤臣。竊此厚幸。此蓋伏遇尊號皇帝陛下。齊德天覆。育材士倫。善雖小而弗遺。力或矜其不逮。誓竭講劇之效。庶酬假勛之仁。

代都運趙待制謝上表

強至

小材而臨大計。不知經畫之所從。薄量以函厚恩。唯有忠勤而可補。竊以今之北道。重曰外臺。邊宿勁兵。境控強虜。歲支洪河之備。而民力幾屈。所以艱於賦輸。地列數鎮之師。而吏員益繁。所以要在刺舉。宜擇精明彊濟之器。以付轉給澄清之權。若臣空屏於事。迂拙。曷引兩川之漕。近貳大農之司。率惰竭於愚衷。訖罕通於利術。敢期煩使。乃委孤臣。此蓋皇帝陛下。廓天地之容。收涓埃之細。特加不次之命。而欲勸來者。弗責已試之效。而俾懷後圖。得不夙夜以思。始終乃職。豈敢顯聚歛之最。以上累君仁。亦當拊凋殘之餘。庶下蘇民瘼。

代謝再任表

強 至

悃悞桑陳。從欲許還於新節。衰疲自力。竭能勉撫於舊封。委寄逾隆。顛隕自懼。伏念臣本緣一介之曲學。歷被三朝之誤知。自解宰鈞。繼紆守紱。早年遇事。風霜不許於殘軀。晚歲纏痾。藥餌乃同於常膳。比引揣躬之分。數裁口劇之章。力丐閩州。少安病質。而恩生望外。事與願違。俄更西雍之帥。施仍付北門之留鑰。所以極陳去就。仰贖聰明。幸寵利非事君之宜。必冀寢加恩之命。策疲驚雖老臣。可彊敢不拜再任之休。訖奉俞旨。兩諧愚懇。此蓋伏遇皇帝陛下。至仁天冒。盛德海涵。器使庶工。愛偏舊物。雖俊傑甚衆。並試有爲之時。而疋瘁之餘。惜投無用之地。敢不勤宣條教。兼附兵民。儻溝壑之未填。尙乾坤之可報。

謝賜曆日表

蘇軾

賀立皇后表

蘇軾

謝禮部尙書表

蘇軾

謝賜對衣金馬表

蘇軾

謝復官提舉玉局觀表

蘇軾

建寧軍節度副使謝表

呂惠卿

賀元日大朝會表

呂惠卿

謝翰林侍講學士表

范祖禹

淮南轉運使謝上表

蘇頌

贊畫甘泉久玷三臺之末。觀風淮甸。驟陞數使之榮。朝寄匪輕。地望兼重。愧非才選。靡稱厥官。姑謹詔期。趨行所部。寵靈所被。畏惕非常。竊以州郡備官。所以分釐於民務。朝廷遣使。所以布宣於主恩。付一道之事權。用六條而舉察。賦輿出內。俾以均輸。吏治否臧。責之薦黜。自匪縣更於事任。詎能振肅於治綱。若臣者。才不足以適時。慮不足以經遠。偶緣資級之例。得從選用之階。始自書林。出分使竹。俄從寰服。入佐計籌。粗收歲月之勞。蔑著毫分之效。豈謂伏遇皇帝陛下。察庶工之任使。矜久職之良勤。拔於省僚。授以利柄。矧惟淮海之部。寔搯東南之衝。昔號奧區。今逢樂歲。五稼盈疇。而遂茂。四人勤力。以厚生。料乎漕運之程。無煩趣辦之急。惟當敷宣惠澤。通究物情。編齊之利病。可更立求其本。刑政之重輕。或失當適其中。上

期靖嘉少釋論擇。若乃事體貌以爲風采。盡銖兩以歛民財。顧在懦愚。誠多闕略。重念上慈天覆。聖治日新。官無內外之殊。事悉憂勤之繫。昨臣受任之始。獲面於清光。陛下臨遣之言。曲加於勉諭。自省最爲於疎遠。何圖亦記於淵衷。豈非以委任之優。故特示拊循之厚。雖乾坤平施。非報謝之可言。而犬馬微生。第勤勞而思奮。儻駢馳之有用。期終始以無渝。

右僕射待罪表

蘇頌

聖恩深厚。仰戴曷勝。孤迹兢危。徬徨靡所。竊以宰輔大任。表率百官。人望所歸。則論議行而必信。物情不與。則名器輕而易搖。而臣猥以朴愚。誤蒙任使。上不能謨明國體。以熙庶工。下不能甄別人材。以協衆望。誤朝有譴。擢髮寧窮。致招人言。上黷天聽。名一註於白簡。罪當寘於丹書。雖二聖覆之如天。未令投迹於四裔。而羣言謂其失職。豈宜包羞於近班。是以屢貢封章。冒塵旒纒。再紆中札。曲諭宸衷。捧詔驚惶。重自思省。本欲使祈於歸老。屬茲方負於罪辜。儻布懇誠。懼爲僭越。在臣進退之分。敢計重輕。於國廢置之間。實關勸沮。伏望太皇太后陛下。皇帝陛下。矜憐甚懇。本無它腸。舉嚴科。亟行幽黜。一則安全於介拙。尙保餘。一則厭息於煩言。遂清朝路。

衡州鹽倉謝上表

劉摯

議令獻言。知典刑之無赦。原心觀過。荷仁聖之有容。貸其餘生。處以善地。伏念臣稟生艱拙。遭世盛明。學不能窮理。而知幾材不足。趣時而適變。希名涂以旅進。濫文館之末游。和銛何功。索米逾歲。間承人乏。偶攝掾於中堂。旋誤聖知。使備員於憲府。仍職書林之舊。就行御史之中。始自愚臣。前無故事。方陛下繼承

於五聖而國朝平治者百年。力勤肯穫之田。大解不調之瑟。蒐拔羣材。而審以器使。變化百度。而曠然日新。臣於此時。職在言路。誓殫忠義。敢避勢權。寧以孤睽訐切。拂衆而危身。不忍從容唱和。負恩而數進。狂愚自信。裨益無方。故宿官之日幾何。而瞽言之罪非一。至如均民而弛役。因之率戶而出泉。雖慮始樂成者。愚人之不知。然損下益上者。先王之大戒。輒條十害。冀補萬分。議臣見譏。以爲敗謀而亂化。清衷獨見。知其有責。而盡言不徇。以誅止容其去。褫臺閣之二職。置瀟湘之一涯。有祿食使之存全。有職事可以報效。銜恩載幸。揣分增憂。此蓋伏遇皇帝陛下。察臣孤忠。全國大體。不惜勛一夫之法。庶幾留衆正之門。謹當上體恩仁。期於必報。下堅節義。死而不渝。

謝青州到任表

劉摯

東方大國。莫如鄆青。愚臣何人。繼命帥守。蒞官茲始。揣已不遑。伏念臣器縑至疏。智靈弗競。遭會繼明之始。越膺共政之圖。三府空逮於六期。千慮蔑聞於一得。雖進退必繇其道。常願學乎聖人。而功烈如此。其卑終難收於士論。寬典刑於司敗。假立壠之使藩。報政稽期。實愧三年之魯。改符易地。猶叨四履之齊。惟時東秦號一都會。士知禮義。境控海山。厥民富饒。少斂攘之舊習。其俗舒緩。有平易之餘風。謹於承流。可以無事。曾是迂愚之品。獲塵寄委之優。此蓋伏遇皇帝陛下。乾健而粹純。豐中而光大。沉幾以通變化。定鑑以御妍媸。人無遐遺。材以器使。臣敢不振厲衰境。激昌至恩。簡禮去煩。稍究前修之治。推仁宣澤。庶求遠俗之安。儻集涓微。仰酬覆燾。

知亳州謝上表

劉敞

齒髮衰暮。萍鎮會繁。據非所安。榮以爲懼。昔者聖門高弟。方六七十。則所願爲。漢世諸儒。至二千石。謂之達宦。蓋量力審己。雖小邦寔曰才難。逢辰慕君。在有道不容微幸。此所以前哲言志。區區其若彼。後賢受祿。振振焉在茲。況如愚臣。本緣末學。粵塵仕路。不棄昌時。暨忝分符。遂更三郡。曹爲近輔。非復自鄙之譏。魯并泰山。仍有變齊之舊。至於渦譙名壤。淮楚近郊。猶龍之所誕生。眞聖是焉臨幸。大朝景毫。兼武湯之上儀。近年執期。格帝鴻之純賂。民俗旣富。官守維嚴。豈伊戇愚。猥叨寄任。邈逾涯分。高視曩先。密焉自思。仍有餘寵。默顰換舊。僅踰朞月之淹。隼旆越疆。纔倍宿春之費。此蓋伏遇皇帝陛下。聖神妙算。睿知極深。廓久照於容光。溥大和於播物。流形品彙。默化陶鈞。致是小材。預膺榮遇。謹當布宣詔旨。盡瘁官箴。爲身愚謀。雖冀不殆於知止。報國本願。尙謝餘生於自然。誓殞百身。勿渝一志。

知襄州謝上表

劉攽

脫身謫籍。縲組近藩。仰荷恩華。不任感懼。臣早者濫承人乏。出假使車。材非所長。力不自料。黽勉歲月。孤負選掄。是所謂斗筭之才。何暇論繩墨之外。□□利術至廣。巧者有餘。果聞係踵之後人。略取析豪之上第。涇以渭濁。故常畏於後生。李代桃僵。竊自悲於薄命。遂辱黜幽之典。實由旣往之愆。浮舟江湖。托身瘴癘。無復自新之望。長懷永棄之憂。不謂明詔發中。洪恩逮下。俾復乘軒之寵。仍加分虎之榮。情同更生。感惟出涕。此蓋伏遇皇帝陛下。離明廣照。乾度并容。紹庭之初。方勤心於陟降。思皇之際。亦代置於細微。以是屏愚。得從甄敍。謹當勉求民瘼。恪佩官箴。犬馬之心。以勞力故能有養。桑榆之景。雖已老尙冀無渝。

徐州謝上表

蘇軾

分符高密。已竊名邦。改命東徐。復塵督府。荷恩深厚。撫已兢慙。伏念臣奮身農畝。托迹書林。信道直前。曾無坎井之避。立朝寡助。誰爲先後之容。向者屢獻瞽言。仰塵聖鑒。豈有意於爲異。蓋篤信其所聞。顧慙迂闊之言。雖多而無益。惟有朴忠之素。既久而猶堅。遠不忘君。未忍改其常度。言之無罪。實深恃於至仁。知臣者謂臣愛君。不知臣者謂臣多事。空懷此意。誰復見明。伏惟皇帝陛下。日月照臨。乾坤覆幬。察孤危之易毀。諒拙直之無他。安全陋軀。畀付善地。民淳訟簡。殊無施設之方。食足身閑。仰愧生成之賜。願力報之無所。懷孤忠而自憐。

徐州賀河平表

蘇軾

聖謨獨運。天眷莫違。庶邦子來。民罔告病。萬杵雷動。役不踰時。遂消東北莫大之憂。然從麥禾可得而食。人無後患。喜若再生。伏以大河爲災。歷世□病。禹治兗州之野。十有三載。乃同漢築宣房之宮。二十餘年而定。未有收狂瀾於既潰。復故道於將堙。俛仰而成。神速若此。恭惟皇帝陛下。至仁博施。神智無方。達四聰以來。衆言廣大。孝以安宗廟。水當潤下。河不溢流。屬歲久之無虞。故患生於所忽。方其決也。本吏失其防。而非天意。及其復也。蓋天助有德。而非人功。振古所無。溥天同慶。維豐沛之大澤。實汴泗之所鍾。昔橫流凜孤城之若塊。迨茲平定。蔚秋稼以如雲。害既廣則利多。憂獨深而喜倍。雖官守有限。不獲趨外庭以稱觴。而民意所同。亦能抒下情而作頌。

謝失覺察妖賊放罪表

蘇軾

□□所臨。守臣固當重責。罪疑則赦。聖主所以廣恩。自驚廢逐之餘。猶在愍憐之數。伏念臣早蒙殊遇。擢

領大邦。上不能以道化民。達忠孝於所部。下不能以刑齊物。消姦宄於未萌。致使妄庸。敢圖僭逆。原其不職。夫豈勝誅。況茲溝瀆之中。重遇雷霆之譴。無官可削。撫己知危。至於捕斬羣盜之功。乃是鄰近一夫之力。靖言其始。偶出於臣。雖爲國督姦。常懷此志。而因人成事。豈足言勞。勉自列於涓埃。庶少寬於斧鉞。豈謂蕩然之澤。許以勿推。收驚魄於散亡。假餘生之晷刻。退思所自。爲幸何多。此蓋伏遇皇帝陛下。舞虞舜之干。示人不殺。祝成湯之網。與物求生。其間用刑。本不得已。稍有可赦。無不從寬。務在考實。而原情。何嘗記過而忘善。益悟向時之所坐。皆是微臣之自貽。感愧終身。論報無地。布衣蔬食。或未死於飢寒。石心木腸。誓不忘於忠義。

謝宣召入院狀

蘇軾

詔語春溫。再命而僂。使華天降。一節以趨。在故事以嘗聞。豈平生之敢望。省循非稱。愧汗交深。竊以視草之官。自唐爲盛。雖職清事。祕號爲北門學士之榮。而祿薄地寒。至有京兆掾曹之請。豈如聖代。一振儒風。非徒好爵之糜。兼享大烹之養。玉堂賜篆。仰淳化之彌文。寶帶重金。佩元豐之新渥。旣厚其禮。愈難其人。而臣以空疏冗散之材。衰病流離之後。生還萬里。坐閱三遷。不緣左右之容。躡處賢豪之上。此蓋伏遇皇帝陛下。生資文武。天胙聖神。雖亮陰不言。尙隱高宗之德。而小愆求助。已啓成王之心。首擇輔臣。次求法從。知人材之難得。采虛名而用臣。敢不益勵初心。力圖後效。才不逮古。雖慙內相之名。志常在民。庶免私人之誚。

謝侍讀表

蘇軾

北門視草已叨儒者之極榮。西學上賢復玷侍臣之高選。省循非稱。愧汗交懷。竊惟講讀之臣。止以言語爲職。考功課吏無殿最之可書。陳善閉邪有膏澤之潛潤。豈臣愚陋亦所克堪。此蓋伏遇太皇太后陛下。憂思深長。德業廣大。受先帝投艱之託。爲神孫經遠之謀。故選左右前後之人。罔非吉士。使知興亡治亂之效。莫若多聞。謂臣雖無大過人之才。知臣粗有不欺君之實。故使朝夕與於討論。奉永日之清閑。不知所報。畢微生於盡瘁。終致此心。

杭州謝放罪表

蘇軾

臣近以法外刺配本州百姓顏章、顏益二人。上章待罪。奉聖旨特放罪者。職在承宣。當遵三尺之約束。事關利害。輒從一切之便宜。曲荷天恩。不從吏議。伏念臣早緣剛拙。屢致憂虞。用之朝廷。則逆耳之愆。形于言。施之郡縣。則疾惡之心。見于政。雖知難每以爲戒。而臨事不能自回。苟非日月之明。肝膽必照。則臣豈惟獲罪於今日。久已見傾於衆言。恭惟皇帝陛下。濬哲生知。清明旁達。委任衆下。退託於不能。愛養人材。惟恐其有過。知臣欲去一方之積弊。須除二猾以示民。特屈憲章。以全器使。臣敢不省循過咎。祇服簡書。眷此善良。自不犯於漢法。時有貸捨。用益廣於堯仁。

又謝太皇太后表

蘇軾

亂羣之誅。不請而決。蓋恩威之無素。致姦猾之敢行。方俟譴訶。豈期寬宥。伏以法吏網密。蓋出於近年。守臣權輕。無甚於今日。觀之祖宗信任之意。以州郡責成於人。豈有不擇師帥之良。但知繩墨之馭。若平居僅能守法。則緩急何以使民。願臣不才。難以議此。恭惟太皇太后陛下。寬仁從衆。信順得天。推一身之至

公納萬方於無罪。而臣始終被遇。中外蒙恩。謂事有專而合宜。情無他而可恕。故加貸捨。以示寵綏。朝廷之明。粗以臣爲可信。吏民自服。常不令而率從。

賀駕幸太學表

蘇軾

釐回原廟。旣崇廣孝之風。幄次儒宮。復示右文之化。禮行一日。風動四方。臣聞五學之臨。三代所共。蓋天子不敢自聖。而盛德必有達尊。在漢永平。始舉是禮。雖臨雍拜老。有先王之規。而正坐自講。非人主之事。豈如允哲。退託不能。奠爵伏興。意默通於先聖。橫經問難。言各盡於諸儒。恭惟皇帝陛下。文武憲邦。聰明齊聖。大度同符於藝祖。至仁追配於昭陵。故舉舊章。以興盛節。臣早塵法從。久侍經帷。永矢馳誠。想聞合語於東序。斐然作頌。行觀獻馘於西戎。

謝賜曆日表

蘇軾

歲頒正朔。蓋春秋統始之經。郡賜璽書。亦漢家寬大之詔。實爲令典。豈是空文。伏以望歲者生民之至情。畏天者人君之大戒。所以常言報應。而不言時數。每奏水旱而不奏嘉祥。上有銷復之心。下有變調之道。固資共理。同底純熙。恭惟皇帝陛下。祇敬三靈。憂勤萬宇。爲仁一日。自然天下之歸。教民七年。豈無善人之效。臣敢不仰遵堯典。寅奉夏時。謹隄防溝洫之修。行勞來安定之政。庶殫綿力。少助至仁。

賀立皇后表

蘇軾

纘女維莘。倪天之妹。事關廟社。喜溢人神。臣聞三代之興。皆有內助。二南之化。實本人倫。維關雎正始之風。具旣醉太平之福。民有所恃。邦其永昌。恭惟皇帝陛下。自誠而明。惟睿作聖。輯寧夷夏。德旣茂於治朝。

輔順陰陽。政兼修於內職。既膺大慶。益廣至仁。下逮海隅。夫婦無有愁嘆。上符天造。日月爲之光明。受祿無疆。與民同樂。

謝禮部尙書表

蘇軾

備員西學。已愧空疎。易職東班。尤驚忝冒。遂領宗卿之任。并爲儒者之榮。始臣之學也。以適用爲本。而恥空言。故其仕也。以及民爲心。而慙尸祿。乃者屢請治郡。兼乞守邊。欲及殘年。少施實効。而有志莫遂。愧負何言。今乃以文字爲官常。語言爲職業。下無所見。其能否。上無所考。其幽明。循省初心。有覲面目。故於拜恩之日。少陳有益之言。孔子曰。一言可以興邦。而孟子亦曰。一正君而國定。昔漢文悅張釋之長者之言。則以德化民。輔成刑措之功。而孝景入晁錯數術之語。則以智馭物。馴致七國之禍。乃知爲國安危之本。只在聽言得失之間。恭惟陛下。卽位以來。學如不及。問道八年。寒暑不解。講讀之官。談王而不及。霸言義而不及。利八年之間。指陳至理。何啻千萬。雖所論不同。然其要不出六事。一曰慈。二曰儉。三曰勤。四曰慎。五曰誠。六曰明。慈者謂好生惡殺。不喜兵刑。儉者謂約己省費。不傷民財。勤者謂躬親庶政。不近女色。慎者謂畏天法祖。不輕人言。誠者謂推心待下。不用智數。明者謂專信君子。不雜小人。此六者。皆先王之陳迹。老生之常談。言無新奇。人所易忽。譬之飲膳。則爲穀米羊豕。雖非異味。而有益於人。譬之藥石。則爲耆朮參苓。雖無近効。而有益於命。若陛下信受此言。如御飲膳。如服藥石。則天人自應。福祿難量。而臣等所學先王之道。亦不爲無補於世。若陛下聽而不受。受而不信。信而不行。如聞□□□秋蟲之鳴。過耳而已。則臣等雖以三尺之喙。日誦五車之書。反不如醫卜執技之流。簿書奔走之吏。其爲尸素。死有餘誅。伏

願陛下。一覽臣言。少留聖意。天下幸甚。

謝賜對衣金帶馬表

蘇軾

服章在笥。賁及衰殘。銜勒過庭。喜先徒御。伏以物生有待。天施無窮。草木何知。冒慶雲之渥采。魚蝦至陋。借滄海之榮光。雖若可觀。終非其有。妻孥相顧。驚屢致於匪頒。道路竊窺。或反增於指目。此蓋伏遇太皇太后陛下。聰明齊聖。陳錫載周。含垢匿瑕。而察於求賢。卑宮菲食。而侈於養士。士豈輕於千里。念非其人。言有重於兼金。當思所報。

謝復官提舉玉局觀表

蘇軾

七年遠謫。不意自全。萬里生還。適有天幸。驟從繆紲。復齒縉紳。伏念臣才不逮人。性多忤物。剛褊自用。可謂小忠。猖狂妄行。乃蹈大難。皆臣自取。不敢怨尤。會真人之勃興。與萬物而更始。而臣獨在幽遠。最爲冥頑。迨茲起廢之初。倍費生成之力。終蒙記錄。不遂棄捐。此蓋伏遇皇帝陛下。正位龍飛。對時虎變。神武不殺。孰非受命之符。清靜無爲。坐獲銷兵之福。聰明不作。邪正自分。使臣得同草木之微。共霑雷雨之澤。臣敢不益堅素守。深念往愆。沒齒何求。不厭飯蔬之陋。蓋棺未已。猶懷結草之忠。

建寧軍節度使謝表

呂惠卿

備嚴近之選。而抵非常之愆。當清明之朝。而罹甚重之譴。孽乃自作。咎將誰歸。伏念臣起自諸生。暗於大道。持竅啓之聞。而欲經於事變。信呻吟之得。而希掛於功名。分既過逾。理宜顛越。矧先帝有爲之始。乃羣材願効之時。輒先要津。以圖賢路。雖預討論者三四事。而參機務者一二年。凡是蠹國害民之由。實臣慙

學誤朝之致。豈亦下流之所處。更令衆惡之所歸。偶失當時士師之刑。難逃今日司直之論。尙蒙善貸。未
寘嚴誅。特從四裔之遷。以正三凶之比。衰疲遠謫。人皆知其難堪。親愛生離。聞者爲之太息。伏惟皇帝陛
下。天仁自得。聖孝光充。撫弓劍之遺藏。每加悽愴。顧廟堂之舊物。寧不靈傷。特罪悔之至深。猶典刑之爲
屈。龍鱗鳳翼。已絕望於攀援。蟲臂鼠肝。一冥心於造化。涕逐言出。莫知所從。

賀元日大朝會表

呂惠卿

□□□□明廷肆覲。上儀畢舉。綿窳均懽。恭惟皇帝陛下。道大同於堯天。日躋格乎湯聖。深仁溥博。達孝
光通。神祇感於治馨。祥嘏由乎和致。維歲日月時之首。乃朝宗覲遇之先。循用舊章。遙陳盛禮。東臺瑞物。
冠玉璽之珍符。左戶輿圖。增金城之列障。樂象成而乃作。文稱賀以非虛。多士盈庭。四夷在列。忻逢千載
之運。敬上萬年之觴。臣俯迫頽齡。久縻外闕。不及趨慶闕庭。徒切瞻依旒冕。

謝翰林侍講學士表

范祖禹

辭其可辭。敢忘故事。受其可受。祇服新恩。洪惟真宗。初置講職。問學常勤於日昃。論經或至於夜分。以啓
迪於後人。俾監觀於成憲。先帝更新治職。止命兼官。雖因革之制不同。而經緯之文則一。惟熙寧元豐之
成烈。有金匱石室之舊聞。不顯帝謨。尙資史筆。追觀列聖之典。多委四輔之臣。夫何一介之微。膺此二任
之重。此蓋伏遇皇帝陛下。欽明文思。齊聖廣淵。如日方中。法天不息。謂二帝三王之道。當窮極於高深。一
祖四宗之書。已光昭於永久。惟永終於典學。聿追孝於前文。以臣夙侍書筵。叨塵史觀。曲加寵數。用示眷
留。昔魯繆公之於子思。亟饋鼎肉。燕昭王之於郭隗。改築金臺。二子者或以無人乎側。而不能安。或欲致

士於遠而先爲始。如臣陋學，敢望古人。非懷人爵之可榮，竊喜聖心之不倦。

宋文鑑卷第六十九

表

開封府羣見致辭

尙書禮部元會奏天下祥瑞表

尙書省謝車駕臨幸表

亳州謝賜卹刑詔書表

謝天章閣待制表

賀皇后册禮表

代范忠宣賀平河外三州表

京東運副謝到任表

謝賜資治通鑑表

謝諫議大夫表

謝賜卹刑詔表

免加右光祿大夫表

謝中書舍人表

林希

林希

林希

林希

林希

林希

畢仲游

畢仲游

張舜民

張舜民

李清臣

李清臣

蘇轍

謝尙書右丞表

蘇轍

賀明堂表

蘇轍

降朝請大夫謝表

蘇轍

代賀景靈宮奉安御容禮畢表

呂希純

開封府羣見致辭

林希

臣希等伏以聖人在上首善始於京師天下修文貢士興於叨畝此乃伏遇尊號皇帝陛下仰稽古道下育人材發明詔於多方命與賢於列郡臣等繆當詔旨輒與能書雖爲草野之臣得奉天庭之貢

尙書禮部元會奏天下祥瑞表

林希

臣珪等言尙書禮部得元豐五年天下所上祥瑞宣徽南院使判北京臣拱辰承議郎提舉河北常平等事臣宜之通議大夫知秦州臣公孺龍圖閣待制知青州臣綰正議大夫知安州臣甫朝議大夫知興元府臣景華朝奉大夫知榮州臣震西上閣門使知雄州臣舜卿禮賓使知安肅軍臣孝綽文思使知憲州臣說朝散郎知鼎州臣伋知歙州臣堯封朝奉郎知蜀州臣少連承議郎知安德軍臣從諒知利州臣山等言所部有芝生於州宅寺觀殿閣柱有七莖者一苗長尺餘者六牛生二犢者二嘉禾合穗者三五本合爲一者一麥一莖三穗者四四穗者五穗者百餘穗者各一白烏白鵲生於巢者各一臣聞聖人出而四海清帝命昭而萬靈集必致諸福之物以表太平之符伏惟皇帝陛下體堯之仁躬舜之孝力行勤儉而本以化物誠意惻怛而出於愛民是以指麾之間功業成就覆載之內陰陽協和蒙被羣生浹肌膚而

淪骨髓。涵濡異類。霑動植而洽飛翔。仰而觀者。景星慶雲。俯而視者。醴泉甘露。扶疎煒燁。發爲朱草三秀之英。游泳服馴。則有白麟一角之異。嘉葩連理之木。異畝同穎之禾。巢鵲可俯而窺。池龍可象而擾。謂宜作爲聲詩。而奏於郊廟。深詔太史。而著之簡編。以永無疆之休。以昭特起之蹟。考諸已往。固可謂絕世之殊祥。抑而弗宣。猶以爲盛德之餘事。自時所紀。殆不絕書。今者。駕鸞輅以充明庭。撞黃鐘而御太極。典禮大備。官儀一新。殊方駿奔。重譯輻湊。自昔辮髮卉裳。羈縻之所未至。踰沙軼漠。言語之所未通。咸奉玉帛而介九賓。襲衣冠而獻萬壽。烜赫威德。冠古超今。巍巍煌煌。傳示亡極。鋪張王會之衆美。哀對皇家之盛容。臣等恭率有司。伏尋故事。稽參圖牒。宜先象齒之珍。敷道句臚。敢上龍墀之奏。歡呼抃蹈。倍萬常情。

尙書省謝車駕臨幸表

林希

天臺肇建。具崇喉舌之司。帝車下臨。增重陞廉之寄。非常之舉。視古無倫。恭惟皇帝陛下。天縱多能。日新盛德。剷除衆弊。裁制萬微。考先王之董治官。立尙書以爲政本。紀綱條理。見微旨於新書。勗作規模。別各司於著位。蓋慮之積年。而成於茲日。聞諸前世。而驗於方今。忽紆清蹕之傳。架聳鴻都之觀。且北辰居極外。環象斗之宮。而黃道所經。旁及積星之位。瞻威顏於咫尺。被法語之丁寧。敕以在公。退而交儆。分曹帥屬。燦然周典之文。望輦拜恩。陋彼漢郎之嘆。矧復宗藩旅進。禁從相趨。凡獲侍於宸遊。皆預窺於聖作。歡聲載溢。慶榮遇於一時。信史備書。流美談於萬世。臣等叨膺重任。久負明恩。願懷備位之慙。第劇逢辰之幸。敢忘策勵。期稱寵靈。

亳州謝賜卹刑詔書表

林希

奉聖詔之丁寧。見上心之欽恤。恭惟皇帝陛下。治道清淨。本堯舜之性仁。訓辭哀矜。同禹湯之罪己。雖推行故事。實憂閔黎元。臣所領州地。號重法。南惟故楚。北則全齊。椎埋爲姦。其來尙矣。殺越干貨。間或有之。嚴設檢防。深用懲艾。臣初至問俗云。比年稍登。咸知愛身。頗重犯法。夫廉恥以衣食爲本。豐凶者獄市之原。民之常情。勢自當爾。臣謹遵奉成憲。申戒有司。囹圄之間。敢遂期於無犯。縲繫之下。庶罔底于非辜。祇循寬條。行塞吏責。

謝天章閣待制表

林希

忽繇疎遠。俾冒恩榮。進不得辭。退何勝懼。臣竊惟朝廷名器。本以待殊尤特起之才。臺閣縉紳。宜序進侍。從論思之列。分義旣定。品流自安。敢意超踰。倏及孤外。伏念臣少而嗜學。仕則爲貧。擊柝抱關。初安一命。磨鉢削槩。忝事三朝。金馬石渠。出入殆逾於二紀。皇墳帝典。討論嘗預於片言。一去軒墀。五更符印。方兩宮之旰食。閔赤子之阻飢。申敕守臣。悉發常平之廩。蠲裁歲計。就輟上供之儲。全活者一方。更生者萬口。父老至於感涕。童稚莫不驩呼。脫於溝壑之虞。皆自乾坤之施。顧臣無職。在法何逃。覈實之誅。屏息以俟。伏遇皇帝陛下。智周萬物。明燭四方。通達下情。靡遠邇戚。疏之有間。主張善類。故包函庇覆。以無遺。旣保宥以曲全。復矜憐其久次。拜恩舊服。玷籍近班。譽生不虞。寵出非望。無循吏之效。誤被璽書之褒。有稽古之愚。曷稱服章之錫。況臣心甘寂寞。年迫衰遲。分以滯蒙。老於冗散。今茲收擢。彌甚驚憂。惟是偏州。適承明詔。漕由京口。控全吳。飛輓之衝。埭復呂城。救積歲旱乾之患。方且身先畚築。手諭準繩。計蚤莫以收功。成江淮之長利。儻容戮力。豈憚糜軀。天日九重。但心存於北闕。圖書三閣。許夢到於西清。

賀皇后册禮表

林希

躬御大廷。肆陳徽册。班迎行第。入踐宮朝。臣聞自古有邦。必先正始。故易以家人治內。而詩美關雎好逑。維時盛明。立備儀物。恭惟皇帝陛下。聰明文思。不學而成。恭儉憂勤。所聞者化。太皇太后。深惟坤極之配。實重人倫之基。率以舊章。應於古義。蓋天地社稷之事。勩相其難。卿士龜筮之從。諏謀是吉。衿鞶申戒。禕翟增華。左右承顏。交致三宮之養。春秋奉祀。共祇八廟之靈。陰教具宣。宸闈有慶。臣守藩居外。望闕無階。蹈詠之誠。寔均凡庶。

代范忠宣賀平河外三州表

畢仲游

平戎輅略。靡用干戈。陷虜衣冠。自還里閭。豈特犬羊之效順。行知鋒鏑之可消。患弭一隅。治形四海。伏以善戰之至。初無勇功。神武之行。亦云不殺。矧羌夷之叛服。如禽獸之去來。始非得已。而用兵。終則附懷之有道。巢穴可窮。而不問邊陲安堵。而自如。情狀益殫。款誠屢至。遂聞革面。相與鄉風。既內懾於威靈。遂盡歸其俘獲。殆非力致。純以德來。矧是生還。率常死節。度湟伐木。不煩充國之謀。謁廟賜田。如見子卿之返。此蓋伏遇皇帝陛下。上仁兼覆。盛德惟新。小二漢之邊功。盡三王之能事。卷惟士伍。偶隔聲明。鞞譯在塗。既奉君臣之義。衣裳改衽。復從父母之邦。邊候告寧。人情底豫。豈異七旬之格。是爲千載之逢。臣頃預政機。親聞睿算。比分憂寄。獲覩成功。再拜奉觴。雖阻漢庭之列。大書作策。永爲宋史之光。感頌之私。倍萬常品。

京東運副謝到任表

畢仲游

分符京右。方謹頒條。改使山東。猥當外計。恩私併及。感惕交深。伏念臣本以書生。學從吏道。和鉛抱槧。既非博洽之名流。攬轡登車。又乏經營之旅力。出沒風波之險。支離疾病之餘。每虞寄任之難勝。顧以廢閑而爲幸。比蒙牽用。已戴生成。未遑宣布於上恩。乃復叨移於劇郡。仍遷轉漕。稍畀事權。雖知繁使之可榮。大懼譴材之速戾。此蓋伏遇皇帝陛下。法天廣大。如日照臨。道祇務於遠圖。器不遺於近用。謂從事詔條之內。常欲力行。故遣司調度之煩。試觀心計。臣敢不三思厥職。一意在公。必祇赴於會期。以圖報上。亦愛養其基本。不至病民。非專官謗之逃。冀合公家之利。

謝賜資治通鑑表

張舜民

臨政願治。乃明主之用心。受詔修書。皆儒臣之能事。成而進御。寵以匪頒。何彼下臣。遽霑優賜。恭惟英宗皇帝。生知興學。性好觀書。豈止求之多聞。實欲輔之自得。然萬機叢委。載籍紛繁。自學者不得遍窺。況人主何暇周覽。思有所述。頗難其人。疇若人哉。莫如光者。給尙方之筆札。萃三館之圖書。許自辟官。用資檢討。重加常俸。不責課程。上下馳騁於數千載之前。出入將隨於十九年之內。其間明君良臣。箴規議論。切磨之精語。名將循吏。方略條教。魁梧之偉功。休咎庶證之原。天人相與之際。抉擿姦宄。褒崇善良。網羅羣言。囊括舊史。如海之藏。珍怪魚龍之無數。如山之包。草木鳥獸之難名。披分畎澮之末流。蔽映雕蟲之小技。旅遊東國。常屢歎於斯文。留滯周南。遂克終於先業。雖古者興亡事迹。固已燦然。而光之筋力精神。於此盡矣。尙苦言官之督責。熟諳俚俗之謗嗤。卒成一代之書。仰副兩朝之志。揭爲通鑑。時則弗迷。資彼治原。捨茲安出。神宗皇帝。飭講筵而進讀。揮宸翰以賜名。製序而冠其篇端。鏤板而布之天下。仰君臣之際。

會已極丹青。何父子之淪亡。忽悲風露。豈謂門墻之舊物。退收鉛槧之微功。開卷涕流。拜嘉汗浹。此乃伏遇皇帝陛下。聰明迪祖。宵旰思皇。留神於乙夜之勤。訪問於西清之奧。伏遇太皇太后陛下。救寧大業。持載蒸民。安所寶之儉慈。格無疆之壽考。遠追三鑑。坐振四維。願一介之靡遺。與羣賢而樂共。儲無儋石。曾非菽水之憂。家有賜書。留作子孫之寶。

謝諫議大夫表

張舜民

方安謫籍。忽對鋒車。入瞻八彩之秀毫。進與七人之上列。竊聞明主臨政而願治。先王爲官而擇人。號曰梓材。取其器使。若夫諫爭之任。政惟侍從之臣。地密而選清。秩卑而望重。其所以起居言動。則與史官相表裏。其所以彈訶風察。則與臺憲同戚休。始則專弼人主之遠。今乃汎論天下之事。乃者藥石不進。鳧鴈僅存。仗馬一鳴。茅茹不已。豈謂大明之東出。廓然覘雪之曰消。鼓之以惠風。潤之以膏澤。南窮海嶠。北浹江湘。脫禁錮者何翅二千人。計水陸則不止一萬里。死者傷嗟之不及。生者扶匍以來歸。昔居輔弼之崇。謀謨帝所。終作蠻夷之鬼。棄擲道傍。古先未之或聞。畢竟不知其罪。敢望桑榆之晚景。獲依日月之末光。招魂於楚水之涯。拭目於雲臺之表。手遮西日。口誦離騷。齒髮摧頹。謾索太倉之粟。衣裳顛倒。驚聞長樂之鍾。此乃伏遇皇帝陛下。上當天心。下厭人望。見機不俟終日。從諫甚於轉圜。變通得之神宗。寬大類乎仁祖。豈止芻蕘之被賞。將令泉壤以銜恩。率是以行。爲國何有。敢不激昂暮氣。緝理空文。乘白馬而伏青蒲。試圖來效。餓西山而蹈東海。期免後艱。

謝賜恤刑詔表

李清臣

徒孳頌繫。交手傳權。毗隸聞音。相趨動色。雷風鼓舞。律呂和平。屬在守臣。惟知虔命。竊惟歷代之爲政。莫若本朝之恤刑。承平幾百四十年。覆養方二三萬里。德如天地。日月思及草木蟲魚。尙慮府縣狴牢。官曹卒吏。誦司空城旦爲業。習柱後惠文之風。喜作煩苛。私行慘刻。或致孤窮。亡告疾痛。不聊。是頒詔教之丁寧。申喻州邦之長守。使之網羅寬大。櫺檻疏通。日與涼飈。時視藥物。比周王之扇暍。殆又過之。雖夏后之泣辜。亦止如是。此蓋恭遇太皇太后陛下。睿慈燕裕。仁治醇醲。尊居九重之深。周念四海之遠。謂聖世不專以刑爲天下王者。常欲以恩結民心。仰寧八室之光靈。垂慶億年之統祚。臣敢不奉行上意。祇率外臣。

免加右光祿大夫表

李清臣

宗廟穆清。方祐神靈之享。王庭昭曠。重推雨露之恩。優渥荐臻。震皇無措。敢殫血懇。仰冒聖聰。竊以義者天下之大經。分乃人臣之常守。稱多量少。豈宜有失於一毛。論重評輕。必使外厭於羣議。如龠合之器。是何足以容黼區。如欒櫨之材。彼安能以勝梁杞。苟犯滿溢之戒。將貽顛覆之憂。伏念臣技能素卑。問學殊淺。無益當時之實用。宜爲盛世之畸人。歷任累朝。誤躋四輔。日索太倉之米。月受水衡之錢。職空任於股肱。勤不施於竹帛。同省僚列。豈無邪獻而詆訶。舊山隱淪。能指背而譏笑。夙宵悞。形影徬徨。未退卽於幽閑。已深慙於尸素。更增顯寵。將累至公。恭遇皇帝陛下。天縱睿明。日新制作。欲贊斯時之美。方收多士之英。致此誤恩。猥加朽質。任人惟舊。固惟聖主之隆私。受爵斯亡。深懼先民之至誠。冀還異數。庶息煩言。

謝除中書舍人表

蘇轍

越從左史擢領西垣。口出命書。身參法從。深念山林之迹。本無富貴之心。聞命若驚。固辭不獲。伏念臣生本西蜀。家世寒儒。學以父兄爲師。貧無公卿之助。私有求於祿養。輒自力於文詞。慨然東遊。無以上達。際會仁祖。訪求直言。策語猖狂。恃聖神之不諱。考官怪怒。惡倖直之非宜。孰知悟俗之言。特被愛君之詔。感激恩遇。遂亡死生。莫酬國士之知。適有私門之禍。未填溝壑。重迫饑寒。時於道塗。望見神考。一封朝奏。夕聞召對之音。衆口交攻。終致南遷之患。生雖不遇。嘗辱顧於二宗。時不見容。勢殆濱於九死。厄窮自致。詎俛何言。敢云衰病之餘。復被寵光之幸。此蓋伏遇太皇太后陛下。母慈均覆。坤德無私。欲以任姒之明。躬行堯舜之道。肆求多士。以遣成王。耆老畢會於朝廷。耕築不遺於林莽。遂令拔擢。猥及空疎。馮唐已衰。猶願雲中之往。貢禹雖老。未忘封事之勤。譬如木之在山。生則荷恩。而死無所怨。水之於地。行則潤下。而止不敢辭。臣之事君。義亦如此。欲報之意。非言所殫。

謝除尙書右丞表

蘇轍

渙汗之恩。已行而不反。僂偻之志。雖勤而莫伸。上愧鴻私。下慙公議。恭惟皇帝陛下。接堯舜之統。蹈成康之仁。體貌先正耆老之臣。揀拔後來翹秀之士。俛仰六載。前後幾人。坦然公明。故不私賢否之實。穆然淵默。故坐照情僞之真。臨御久則鑒愈明。得失分則下無隱。如臣者。西南賤士。章句小儒。早歲猖狂。偶竊方聞之選。中年流落。旣安縣尹之卑。遭時乏人。致位近侍。跌宕文墨之囿。喞喞議論之場。舉皆空言。安有實效。顧惟省轄之重。實參國論之餘。豈無遺賢。遽及微品。地寒資淺。何以望三事之餘光。才短力罷。安能裁六聯之滯論。雖復黽俛就職。愧歎何言。此蓋伏遇皇帝陛下。天地之仁。曲成草木之陋。父母之愛。不錄子

弟之非。將建大廈以覆羣生。故收衆材而無棄物。然臣負過其力。受非所容。惟有潔己無私。或不孤於託付。引類自助。幸得免於顛隕。不渝始終。少答恩造。

賀明堂表

蘇轍

饗帝尊親。古今之大典。推恩肆眚。天地之至仁。舉此盛儀。併在今日。伏惟皇帝陛下。以仁御世。以誠事天。乾清地寧。兵戢民阜。人悅故神。罔不宥物。備故禮得以成。一享園丘。三謁路寢。誠敬之心。與日兼茂。寬大之澤。靡物不蒙。能事既修。全福自至。方將享堯舜之上壽。膺成康之令名。民願所同。天心是若。臣頃侍帷幄。稍歷歲時。譴責之深。坐甘沒齒。江湖之遠。猶冀首丘。久蟄泥塗。聞震雷而惕若。深囚籠檻。得清風而自疑。

降朝請大夫謝表

蘇轍

罪大恩寬。言者未厭。官高德薄。法所不容。尚領真祠。實出寬憲。伏念臣早塵近列。無補明時。下則拙於身謀。上則闕於國體。先朝矜其愚陋。宥以遐荒。前後七年。浮沉萬死。偶真人之御曆。敷大號以惟新。普復舊官。亟叨厚祿。然臣年迫衰暮。知復何爲。身利退藏。顧未敢請。因循於此。黽俛自慙。雖復追削者五官。仍且獲安於閑局。涵恩至厚。爲幸已多。此蓋伏遇皇帝陛下。以堯舜之仁。行成康之政。衷未忘於舊物。恩許畢其餘生。臣謹當杜門躬耕。沒齒蔬食。知生成之難報。姑靜默以待終。

代賀景靈宮奉安御容禮畢表

呂希純

卽上都之福地。載廣珍庭。會列聖之睟容。益嚴昭薦。良辰叶吉。緼禮告成。凡預照臨。率同慶抃。竊以仙源

濬發帝業肇基。祖功休盛於湯。文宗軌繼隆於啓。誦雖寢廟。時饗祿將克備。於靈承而衣冠。月游館御。未經於制度。茂惟真主。允集大成。皇帝陛下。孝至格天。文明若古。眷神功潛躍之宇。有章聖誕彌之祥。夙建清都。仰延真馭。迺規恢於舊址。庸考卜於新宮。凜然太紫之威。隱若神明之奧。惇宗有昭穆之敘。謁款無來往之煩。而復祕殿重深。列儀坤之正位。回廊曼衍。圖拱極之近寮。逮不日以休工。肆前期而歲事。瑤題洒落。煥東壁之星躔。藻衛森羅。備甘泉之法駕。奉雕輿而降格。被玉座以妥安。詔蹕亟臨。羣司徧至。瞻舜瞳而增慕。施禹拜以忘勤。精意克伸。繁禧舉集。洽需雲而示惠。霈解雨以疏恩。嘉與羣倫。同茲大慶。臣蚤塵樞幄。方守塞垣。阻陪鴛鷺之班。徒深燕雀之賀。

宋文鑑卷第七十

表

代文潞公謝太皇太后表

免右僕射表

謝史成受朝奉郎表

陳州謝上表

賀元祐四年明堂表

南京謝上表

徐州謝上表

南京謝上表

賀册皇后表

賀上傳國寶表

宣州謝上表

鄂州謝上表

代文潞公謝太皇太后表

宋文鑑卷第七十

張耒

韓忠彥

曾肇

曾肇

曾肇

曾肇

曾肇

曾肇

曾肇

曾肇

賈易

張商英

張耒

稽留君命。敢求免於刑誅。惠養老臣。不使勞其筋力。仰睿私之從欲。撫衰志以知榮。伏惟太皇太后陛下。厚德無疆。至仁在上。神孫臨祭。知保佑之聖功。多士充庭。見肅雍之盛德。恩及草木。喜同天人。臣幸以餘齡。獲逢盛旦。雖籩豆駿奔之事。徒有心哉。而禮樂大備之時。爲後死者。豈不偶爾。尙足矜榮。

免右僕射表

韓忠彥

中寵命以自天。榮非意及。措微躬而無地。愧與憂并。仰冒眷衷。歷陳危懇。竊以君臣同體。取象於元首股肱。上下交孚。相視如腹心手足。所以代天工而理物。故能熙帝載以奮庸。自昔御臨。尤艱考慎。惟德業之兼茂。乃邦家之有光。伏念臣學無他長。材止近用。不爲詭隨以徇衆。但知直道以事君。遭遇聖時。未墮素業。贊陪機政。惟任孤忠。墻高每懼於疾顛。綆短固難於深汲。更冒非常之寵。深虞可畏之言。矧今蠹萌未涓。國是難一事有可否。必分年號而得行。臣無忠邪。概指朋類而皆廢。西方師老而財匱。斗米至於千錢。北道河潰而民流。十室幾於九去。大需更新而猶多禁錮。宿逋雖減而尙困追償。方欣大有爲之時。宜用不世出之士。豈茲綿薄。能副詳延。伏望皇帝陛下。奮獨斷之明。廣僉諧之訪。旁求不間於庶位。圖任況多於舊人。采擢嫩才。收還成命。譽歸明主。名器不輕以假人。謗息愚臣。負乘免聞於致寇。

謝史成受朝奉郎表

曾肇

裁成二帝之書。仰資聖訓。褒錄諸儒之效。俯逮孤生。謬進官榮。併叨恩賚。省循非稱。冒昧爲慙。竊以簡冊之傳固多。帝王之書爲重。文章之用非一。述作之體爲難。在昔有邦。若時稽古。自周而上。具載百篇之言。繇漢以還。各成一代之史。典謨之辭略而雅。春秋之法謹而嚴。子長雖繆於是。非見稱事核。孟堅頗推於

詳贍。或患文繁。降及後人。益艱是任。或紀事支離而失實。或設辭翫敝而不工。或疎略抵牾之相形。或取舍抑揚之未當。歷觀前載。茲謂材難。矧兩朝功德之崇高。而五世聲明之富有。以至俊傑瑰奇之士。櫛札崑瑣之姦。載在信書。傳之後裔。宜得貫穿馳騁之學。溫純深潤之辭。追二典之光華。垂百王之軌範。如臣之鄙。揣分無堪。幼聞道於父兄。粗知好古。長論文於師友。竊慕著書。然而植性昏冥。受材濩落。有淺見寡聞之累。無屬辭比事之長。遭世盛明。脫身冗散。天祿石渠之奧。蚤預校讎。金匱玉板之文。得參論次。茲儒林之盛選。實仕路之殊榮。特達甄收。莫非帝力。周旋長育。咸出上恩。自視庸虛。固難報稱。雖勤劬於夙夜。謾淹歷於歲時。闡發大猷。豈敢希於作者。整齊故事。或可繼於前人。甫臨汗簡之終。適遭負薪之疾。奏書天陛。阻親望於清光。拜賜宸庭。莫與聞於褒詔。豈期推賞。并及罔功。養拙藏愚。久已逃於常憲。因人成事。茲復玷於異恩。遜避弗容。驚惶失措。此蓋伏遇皇帝陛下。務尊先烈。祇紹永圖。謂祖考之功。非形容之可既。而子孫之孝。在潤色之爲能。深詔有司。共成大典。蓋兼資於衆智。不求備於一人。每矜載筆之勤。靡間吹竽之濫。致茲瑣質。均被鴻私。螻蟻雖微。素積愛君之志。涓塵有補。敢忘許國之忠。

陳州謝上表

曾肇

初緣細故。輒丐徙州。繼露危誠。復求易地。補報未伸於萬一。冒煩已至於再三。自非仁恕之朝。當在譴訶之域。聖恩甚厚。私願弗違。視太守之章。屏愚知幸。望長安之日。感涕難勝。伏念臣託勢至孤。叨榮過重。謀身寡術。易致於人非。竊祿無功。難逃於鬼瞰。材微命舛。福薄災深。方祇歷下之行。忽遭漳濱之疾。顧筋骸之素憊。困藥石之交攻。氣屬如絲。識幾去幹。已分身歸於厚夜。不圖天假於餘生。恍如夢寐之初回。僭若

醒醲之未解。神明凋耗。形體支離。念官守之尙遙。迫王程之有限。內省尫羸之質。豈堪撼頓之勞。非敢自愛於疲癯。實懼仰孤於任使。幸脩門之在望。恃延閣之見收。叩閣自言。伏質俟罪。蓋疾痛之加者。呼父母而是。懇精誠之至者。動金石而非難。果上惻於淵衷。俾曲從於私便。維茲藩輔。密邇京師。事簡民淳。首被朝廷之化。里安戶佚。稀聞枹鼓之音。顧臣何人。獲此善地。可凱康寧之福。皆緣覆護之恩。矧常守於是邦。有相望之仲氏。流風未遠。故事可詢。重念臣昨守汝陰。亦隸畿右。始引小嫌而求避。出於慮患之太周。終明大體而復還。良以至公之在上。銘心敢怠。粉骨難酬。此蓋伏遇皇帝陛下。聰明燭於萬微。而隆寬盡下。威德加於九有。而內恕及人。篤遺簪墜屨之仁。推藏疾納汙之誼。太皇太后陛下。處奧突之中。而周知萬事。據崇高之勢。而洞照羣情。常懷大德之好生。不忍匹夫之失所。憫臣忝陪侍從之末。察臣實嬰沈瘵之餘。假借寵靈。安全孤朽。臣敢不體上之慈。而哀矜于下。念己之病。而綏養斯民。庶收塵露之微。少答乾坤之施。

賀元祐四年明堂禮成肆赦表

曾肇

侑帝饗親。旣金聲而玉振。赦過宥罪。遂雷動以風行。歡聲達於幅員。協氣充乎上下。竊以躬事天之禮。莫如王者之堂。極嚴父之心。是謂聖人之孝。講茲鉅典。屬在熙朝。卽路寢以親祠。兆于仁祖。黜五精之並祭。斷自神宗。光昭前聞。啓迪後嗣。恭惟皇帝陛下。紹膺寶命。祇遙先猷。平成百度。而不有其功。覆載羣生。而不尸其德。謂時和歲豐之效。乃高穹願諱。而然謂刑清武偃之祥。乃七廟威神之致。矧屬承祧之始。永懷濡露之恩。將伸報本之誠。且展事生之道。以祭恐數而瀆。故遵三歲之期。以郊則遠而疏。故度九筵之位。

季秋令月。吉日上辛。備法駕之儀。協雅聲之奏。牲牲博碩。籩豆靖嘉。元龜大輅之旅陳。篆轂錯衡之輻淩。并柯共柢。按圖謀而充庭。鬣首貫胷。衽衣冠而就列。以引以翼。有壬有林。奠珪幣以告虔。舞羽旄而象德。靈心合答。精意感通。嘉得四海之懽。增授萬年之策。尙念有司之庶獄。豈無弗獲之一夫。乃御端闈。亟敷大號。滌瑕盪穢。已責逮繇。空狴犴而縱縲囚。開府庫以賜軍士。布慶施德。昭天漏泉。彼泣辜弛網之仁。推食解衣之惠。方之於此。不其狹歟。臣忝綴從班。適分州寄。莫與奉璋之列。徒懷拱極之心。

南京謝上表

曾肇

得郡便私。未報期年之政。因人易地。更分京邑之權。朝始去於故棲。夕已臨於新部。伏念臣材不堪於世。用行有愧於古人。蚤塵侍從之華。寢冒藩垣之寵。未踰再歲。更守二州。旣不能興教化於民。使之遷善而遠罪。又不能作聰明於外。因以譁世而取名。惟殫夙夜之勤。期副焦勞之念。矧彼淮陽之地。舊爲楚國之郊。屬頻年昏墊之餘。加比屋凶饑之後。浚溝滌以疏積潦。發廩庾以振流民。方竭力於經營。遽蒙恩而罷徙。國家別建都邑。內壯皇居。維王迹之所基。視它邦而尤重。掌離宮之筦籥。奉原廟之衣冠。以屬微臣。彌慚非據。此蓋伏遇皇帝陛下。矜憐舊物。優假近班。尙容環走於王畿。因使周知於土俗。奉承清問。敢希宣室之歸。攀仰末光。未覺長安之遠。誓當盡瘁。少冀分憂。至於事鞭扑以立威。飾廚傳以干譽。非明時之所尙。亦私義之不爲。

徐州謝上表

曾肇

懷章去國。在雷三年。荷橐入朝。未淹百日。復棲遲於民社。驟違遠於闕庭。迫義理之當然。豈人情之所願。

竊念臣稟生固陋承學迂疎懷是古之至愚抱守官之獨見豈特難堪於世用固已不善於身謀昨者召自留都處之宗伯屬郊丘之肇祀議天地之經祠執禮雖明趣時則戾已行之令豈孤論之能回不韙之誅敢偷安而苟免旋抗章而請臯蒙易地以示恩繼露微衷復頒溫詔終賴乾坤之造曲成犬馬之私假以使符置之善地循行閭里固多魚稻之饒周覽山川頗有江湖之趣夫何孤蹇獲此便安此蓋伏遇皇帝陛下寬裕有容包函徧覆將以招致芻蕘之論是用特寬斧鉞之威伏惟恩慈豈易報稱臣身雖在外義不忘君況仰賴於皇明忍自愆於素守深念長人之寄知無不爲益堅許國之誠死而後已

南京謝上表

曾肇

以儒儒而辭將符以親嫌而避邊要頗識事君之義敢干留令之誅仰賴聖明俯矜誠請既逃罪戾仍獲便安伏念臣無所取材粗知嚮道雖險阻艱難備嘗之矣而造次顛沛必於是焉以平生寡偶而少徒故臨事易危而多畏昨祈外補聊避煩言未容墨突之黔遽改并門之帥且節制方面號爲儒者之榮率先戎行正是人臣之分便當卽路詎敢懷私但以任非所長力有不逮矧弟兄之孤立擅將相於一時中懼滿盈外虞讒間再瀝籲天之懇終蒙易地之優維陳宋之奧區首東南之甸服周流二國俛仰十期何幸衰年復尋故步望千門之宮闕識三后之衣冠合抱干雲或異時之拱把峨冠束帶多前日之佩觿所愧薄材曾微惠政下孤民望上誤國恩此蓋伏遇皇帝陛下舜智兼容堯仁徧覆初無心於予奪皆因物之短長是致孤生與叨平施毋輕民事方竭力於茲辰苟利公家誓捐軀於異日

賀册皇后表

曾肇

中闡肇建。盛禮興行。人神協謀。夷夏胥慶。竊以家國爲天下之本。后妃實王化之基。致治所繇。求端非遠。恭惟皇帝陛下。紹天駿命。垂世永圖。承七廟之吉蠲。奉三宮之共養。而長秋虛位。六職曠官。咨求淑人。來相宗事。上遵太母之訓。下採有司之言。鼓鍾在庭。典冊備物。坤元博厚。已正於隆名。婦順章明。可風於率土。臣身雖在外。義不忘君。誦造舟之詩。想見光輝之盛。申彤管之戒。庶幾補報之忠。

賀上傳國寶表

曾肇

受命之符。爲時而出。自天之祐。維聖是承。方拜況於大庭。遽均恩於率土。官師動色。海寓蒙休。臣聞夫國璽之有去來。猶周鼎之有輕重。好治而惡亂。舍昏而卽明。頃自有唐之衰。荐更五代之季。伏而不發。殆且百年。忽爾自歸。將傳萬世。所以表祖宗積累之慶。告社稷靈長之休。在聖與仁。宜昌而壽。恭惟皇帝陛下。沈潛迪哲。剛健好生。參天地以成能。垂子孫而作則。果有神物。是貽皇家。固將配甘露以紀元。豈止擬芝房而度曲。臣職專守土。志切慕君。講稱壽之儀。阻陪下列。奏升中之頌。敬俟方來。

宣州謝上表

賈易

信而後諫。愧無平仲之言。罪不容誅。誤脫成湯之網。屈嚴科而賦命。畀善地以寧親。聖澤隆寬。自古未有。愚心感激。欲報何從。伏念臣蔽蒙之人。迂闊於事。以直道爲敬天之實。以詭情爲駭俗之非。殺其身有益於君行之無悔。見其利不顧其義。死莫敢爲。知萬折而必東。故三已而無愠。汲黯之黷。寧免世嫌。子文之忠。蓋出天性。竊服兩宮之知遇。稍希八彥之激昂。故有橫逆之來。曾無左右之助。口欲清而愈濁。外無正而不行。獨傷忠敬之難明。亟比欺誣之重坐。旣免投於荒裔。仍擇處於近藩。風俗休戚。在所漸摩。朝夕旨

甘得其順適。道固隆於善貸。恩尤著於曲成。此蓋伏遇皇帝陛下。聽德惟聰。使臣以禮兼洪。覆無私之運。均大明徧照之神。謂好言利病者。有區區憂國之心。謂不事權貴者。非汲汲謀身之輩。方免官而從衆。竟薄責以勸忠。臣敢不敬體惠慈。退加修省。凡正心而誠意。必明辨而篤行。金石可磨。底慎子臧之達節。死生不變。庶幾徐邈之有常。殫夙夜治民之勞。全始終報上之志。

鄂州謝上表

張商英

布宣溫詔。開諭遠民。雖湖山千里之間。如酺醪一堂之上。聽歡聲之相告。慙共理之非良。伏以旁接九江。前臨七澤。地遐而陋。俗魯以愚。雖有沈寃。莫能往愬。至於極病。祇自悲吟。蒙被皇明。申頌德意。所謂率科嚴重。鈎考碎煩。方田擾安業之農。圓土聚徙鄉之惡。省租紐折。公帑貪求。學校驅迫者。或違其孝養之心。保伍追呼者。或失於耕桑之候。寺觀培繕營之費。東南配漕輓之舟。抑認香鹽。強招卒伍。文移速於星火。追捕遍於里閭。百端紛更。一切蠲罷。可謂崇寧之孝治。真爲紹述之聖功。而臣初效外官。恭承嘉命。唯憂疲懦。未克推行。豈有設施。可圖報稱。有君如此。碎首以之。此蓋伏遇皇帝陛下。誠實應天。典常師古。王路以平。其好惡道樞以會。其是非察臣於元祐之間。未嘗干預。憐臣於元符之末。首被擠排。一洗刑書。再還仕籍。退循衰晚。虛辱寵榮。辟穀留侯。歸休有素。據鞍馬援。進取何堪。誓堅忠孝之心。永保初終之節。

宋文鑑卷第七十一

表

明州謝到任表

代范德孺謝戶部表

謝昭雪表

謝吏部侍郎表

謝復官表

代范忠宣公遺表

通州自便謝表

進四明尊堯集表

台州羈管謝表

明州謝到任表

失職之誅。尙容自劾。非常之寵。更以曲加。弗獲固辭。具嚴名訓。叨塵特甚。感涕難勝。臣聞人有能有不能。聖主量材而受職。仕或去或不去。人臣秉義以事君。儻已試而可知。敢懷安而自止。雖君父保全之恩厚。不汝瑕疵。顧國人可否之論。公有覲面目。伏念臣昨繇省戶。擢置詞垣。盡出聖神獨斷之明。本無左右游

蔡肇

廖正一

劉跋

鄒浩

鄒浩

李之儀

陳瓘

陳瓘

陳瓘

蔡肇

談之助。然名過其實者殆。用非所習則窮。況逢聖治之日新。竊仰睿文之天縱。咸池張洞庭之野。海鳥炫驚。秋水灌滄溟之間。波臣自蕩。莫知攸濟。宜厚厥愆。敢期全度之恩。更溢褒嘉之典。旣聯法從。仍畀名城。恭惟皇帝陛下。如天覆臨。以生以遂。薄海內外。悉主悉臣。眷甌粵之偏陬。控東南之美浸。鱗蛟霧濕之所。蟠鬱夷隸。舸舶之所往來。方旋反於使輶。將嗣修於貢職。謂宜推擇。以重拊循。而臣結約無奇。間關少與。徒谿潭之醜類。素乏雄文。贏賈客之購金。初無佳句。矧今郡國守令之政。具存典謨訓誥之書。奉以周旋。雖不能識其大者。求之度數。庶幾或推而行之。有以及民。是爲報國。

代范德孺謝戶部表

廖正一

邊部終更。王庭當覲。亟承天寵。遽寘地官。靜以省躬。忸乎就列。臣降才蹇淺。志學顛蒙。早遇盛時。荐膺煩使。饋糧千里。嘗絕漠以知難。勤戍六年。屬鑄羗之未諭。俯思前訓。敢妄覬於功名。仰奉睿謀。務久寧於封略。僅逃餘責。竊願投閑。惟邦計之實繁。須賢勞而共濟。乃容踈遠。誤被選掄。臣早預搢紳。特緣承冑。朝廷不掩其遺直。兄弟相戒。以盡忠。豈謂馴致高華。迭居要劇。征西合符而相代。省戶接軫而並游。衆謂榮觀。臣知非據。陛下天均覆育。聖監清明。政在節財。方且度縣官之用。人無求備。固將觀臣庶之能。當勤早夜之思。庶有毫銖之補。

謝昭雪表

劉 跋

投畀讒人。已悟告言之妄。蠲除詔令。更申論坐之冤。沒而有知。死且不朽。竊以前世論事。下敢告之章。法家原情。著反坐之律。未聞私書謬悠之謗。可致公朝夷滅之刑。繫彼無良。遘爲不令。因黨友之尺牘。形閭

巷之廬辭引鷹揚尙父之言。誦高貴鄉公之語。靡慚噬鄙。惟幸詆誣。旣內慊於不根。又陰虞於後患。禱其付火。固絕意於上聞。託以屏人。復何施於參驗。不攻自破。欲蓋而彰。巧誰謂其如簧。市共知於無虎。雖毀者挾怨。必以惡聲。而小人乘危。遂爲奇貨。密騰舊札。歷遺衆仇。險不啻於山川。食無餘於犬彘。逮從吏訊。幾誤國章。意所株連。人以股栗。浩有漂山之勢。岌如累卵之危。賴先帝照矚之明。察權臣吞噬之患。特迂清問。少緩嚴科。然而先臣諸孤。終以屏廢。闔門百口。益復幽囚。禦瘴癘者十喪。隸臣妾者三歲。無罪且至於如此。大戮亦何以復加。會上聖之龍飛。破羣疑而冰釋。譴累所逮。訴告必申。悼前日之禍機。嗟何可及。掛有司之罪籍。名或未除。用再瀝於肺肝。敢上塵於旒扆。理無難者。宜靡悼於改爲。事已灼然。遂悉從於釐正。此蓋皇帝陛下。乾行以健。離麗而明。體大舜聖讒之方。廣有唐辨謗之略。孤忠素節。事已白於九原。弱子幼孫。誓各堅於一死。微生何算。洪造難酬。

謝吏部侍郎表

鄒浩

代言西掖。已冒至榮。列職中臺。更塵高選。拜恩優握。撫已兢慚。中謝竊以六典治邦。周重天官之任。三銓綜吏。唐推文部之權。洪惟神考之正名。肇復先王之成憲。迄至今日。益昭聖功。宜得真材。以貳選事。而臣猥從廢斥。特荷哀憐。俄擢寘於近班。獲預聞於機要。事陛下有如上帝。敢萌一念之欺。仰陛下何啻高山。終乏纖埃之補。未正空滄之責。遽叨越次之陞。靖言思之。可謂幸矣。此蓋伏遇皇帝陛下。孝隆繼志。道廣用中。欲多士之無朋。故孤立者與進。欲四方之不擾。故愚守者并容。爰舉斯心。俾祇厥序。臣敢不激昂。遭遇飭厲。猷爲念此餘生。實神聖之再造。誓殫綿力。稱寵祿之殊私。

謝復官表

鄒浩

萬里投荒。豈生還之敢望。九重獨斷。俄意外以蒙恩。感激哀憐。縱橫涕淚。伏念臣最爲固陋。全昧幾微。有言輒至於妄陳。雖死不足以塞責。上賴聖人之救物。特寬司寇之嚴刑。但復竄於遐方。姑使省其往咎。惟昭潭之可畏。與新州而不殊。形影自隨。朝夕難保。昏昏瘴霧。信爲提耳之師。兀兀愁居。因得致身之道。惟忠惟孝。無古無今。命雖甚於垂絲。心已期於結草。不謂僅存之瘦骨。忽還將絕之驚魂。旣獲免於拘繫。遂亟諸於定省。名蠲罪籍。品復文階。在拔拭之非常。皆覬覦之莫及。此蓋伏遇皇帝陛下。道彌天覆。德盛春生。千齡光御於不圖。萬物率由於和氣。紹隆先烈。坐撫太平。曲回進日之明。旁燭戴盆之下。謂裕陵長育。賜之第而除教官。謂哲宗保全。矜其愚而屈常法。召從五嶺之表。端遇六龍之飛。擢于不次之中。曾是惟新之數。肆令甄敘。俯及孤危。臣敢不因險阻艱難之備嘗。念身體髮膚之再造。益堅夙志。遙瞻北極之尊。長與老親。共祝南山之壽。精誠所貫。高厚必知。

代范忠宣公遺表

李之儀

臣聞生則有涯。難逃定數。死之將至。願畢餘忠。輒留垂盡之期。仰瀆蓋高之聽。中謝伏念。臣賦性拙直。稟生艱危。忠義雖得之家傳。利害率同於人欲。未始苟作以干譽。不敢患失以營私。蓋常先天下而憂。期不負聖人之學。此先臣所以教子。而微臣資以事君。粵自治平。擢爲御史。繼逢神考。進列諫垣。在萬五十二年。首尾四十六任。分符擁節。持橐守邊。晚叨宥密之求。再席鈞衡之寄。遇事輒發。曾不顧身。因時有爲。止欲及物。固知盈滿之當戒。弗思禍釁之陰乘。萬里風濤。僅脫江魚之葬。四年瘴癘。幾從山鬼之遊。忽遭睿

聖之臨朝。首圖纖介之舊物。復官易地。遣使宣恩。而臣目已不明。無復仰瞻於舜日。身猶可免。或能親奉於堯言。豈事理之能諧。果神明之見嗇。未獲九重之入覲。卒然四體之不隨。空慙田畝之還。上負乾坤之造。猶且強親藥石。貪戀歲時。儻粗釋於沉迷。或稍紆於報效。今則膏肓已逼。氣息僅存。泉路非遙。聖時永隔。恐叩闈之靡及。雖結草以何爲。是以假漏偷生。剝心瀝懇。庶皇慈之俯鑒。亮恐意之無他。臣若不言。死有餘恨。伏望皇帝陛下。清心寡欲。約己便民。達孝道於精微。擴仁心於廣遠。深絕朋黨之論。詳察邪正之歸。搜抉幽隱。以盡人材。屏斥奇巧。以厚風俗。愛惜生靈。而無輕議邊事。包容狂直。而無易逐言官。若宣仁之誣謗未明。致保佑之憂勤不顯。本權臣務快其私忿。非秦陵實謂之當然。以至未究流人之往愆。悉以聖恩而特赦。尙使存歿。猶污瑕疵。又安得未解疆場之嚴。幾空帑藏之積。有城必守。得地難耕。凡此數端。願留聖念。無令後患。常軫淵衷。臣所重者。陛下上聖之資。臣所愛者。宗社無疆之業。苟斯言之可采。則雖死而猶生。淚盡詞窮。形留神逝。

通州自便謝表

陳 璿

恩由獨斷。澤被孤忠。刑部之執守雖堅。天子之福威無壅。乃公朝之盛事。豈小己之私榮。恭敍感悰。仰瀆高聽。伏念臣昨蒙善貸。賜以生還。萍跡孤賤。久寄食於異縣。華門幹蠱。常委事於長男。所營不足以藩身。其出每緣於餬口。去庭闈者累月。聞道路之一言耳。受而輒行。親危而不顧。緣帥司深疾其生事。故傳者多指爲病狂。萬口嗷嗷。兩路詢詢。狐突教子。素存不貳之風。曾參殺人。寧免至三之惑。事既匿而難曉。時浸久而益疑。制所深嚴。就逮於重江之外。獄辭平允。閱實於片言之中。矜其無罪之可書。許以還家而自

便出園扉而涕感。瞻魏闕而神留。尋沐寬恩。移置近地。海島萬里。不如無子之無憂。淮壖一身。彌覺有生之有患。擢髮不足以數臣之罪。瀝血不足以寫臣之心。羔羊之性自公。犬馬之情愛主。忘身徇國。初無係慙之私。抱疾呼天。惟恃精誠之格。忽因詔諭。特免拘維。此蓋伏遇皇帝陛下。堯大并容。舜明洞照。人人皆使之得所。事事唯恐其有偏。繼志用神考之心。應天以格王之實。舊弊若冰之將釋。新慶如川之方流。家國平康。內外交泰。遂使赦令。昔阻隔而今行。士有宿愆。始棄置而終宥。全家荷德。無路酬恩。螻蟻之力至微。但知恭順。蒲柳之身已老。尚可糜捐。望雖隔於戴盆。向敢忘於傾藿。

進四明尊堯集表

陳瓘

臣某言。臣六月初五日。準通州牒。準編修政典局牒。奉聖旨。取臣所著尊堯集。臣依稟聖旨。不敢違滯。緣臣著撰此集。未經奏御。今具狀中。編修政典局乞爲繳進。合於御前開拆者。臣竊以昧晦愛君。精誠雖至。芻蕘議政。迂闊難行。葵向不習。而常傾芹陋。敢期於得獻。獨因睿斷。許貢危衷。臣伏念臣糞土下材。犬馬賤質。數罪固多於擢髮。舍生無意於兼魚。初欲糜捐。終難緘默。因續前言之緒。聊輸垂絕之忠。非敢有善善惡惡之辭。但欲明尊尊卑卑之義。此螻蟻所能知也。在搢紳安可藐然。八十卷之私書。奪此與彼。十九年之懿績。可從而遠。陛下於繼述之初。首辨明於茲事。微臣持將順之志。在流竄而靡忘。鋪張痛詆之言。編類厚誣之語。初謂熙寧之輔。不媿有商之臣。於成湯敢肆厥欺。疑安石有所弗忍。及究觀於黜筆。始粗見其游辭。因思大典之久誣。益願忘軀而往訴。合浦十論。中舊疏之餘言。四明八門。撮其要於一序。實欲彰火德之盛。不敢畏王氏之強。寧碎首於邦誅。忍謾心於國是。彼效尤於往轍。亦苟逞於陳編。難以縷闕。

略舉綱要。謂藝祖濫誅無罪。謂眞宗矯誣上天。訕薄裕陵。攘奪先美。以託訓爲箝口之術。以歸過爲自譽之媒。但矜詆訾之極工。罔顧威靈之如在。幾乎罵矣。豈不痛哉。讀其書。寧忍終篇。稽其文。可爲流涕。代言之筆。盡目其徒爲儒宗。首善之宮。肇塑其形爲坐像。禮官舞禮而行。詔史書獻佞而請觀。光乎仲尼。乃子雱聖父之贊。比諸孔子。實卞等輕君之情。彼衰周之僻王。棄眞儒之將聖。當時不得配太廟之饗。後世所以廣上丁之祠。今比安石爲欽王之臣。則方神考爲何代之主。又況一人幸學。列辟班隨。至尊拜伏於爐前。故臣驕倨而坐視。百官氣鬱。多士心寒。自有華夏以來。無此悖倒之禮。神考之再相安石。始終不過乎九年。安石之屏迹金陵。棄置不召者千載。八字威加於鄧綰。萬機獨運於元豐。豈可於善述之時。忽崇此不遜之像。因壞先朝三舍之法。遂費今日千倍之財。人材之可擢。不殊國用之添費。徒廣浚吾民之膏血。增彼像之精神。美成其私。怨集于國。陸贄設枝顛之喻。承業以財盡爲憂。忠哉古人愛君之誠。異乎今日養士之意。又況臨川之所學。不以春秋爲可行。謂天子有北面之儀。謂君臣有迭賓之禮。禮儀如彼。名分若何。此乃衰世侮君之非。豈是先王訪道之法。贛川舊學。記刊于四紀之前。辟水新靡。像成於一堵之手。唱如聲召。應若響隨。使王氏寢至於強梁。乃元祐助發其氣。餒昔宣仁權同之際。謂介甫節行甚高。宜贈崇官。仍加美諡。司馬光書之于簡。呂公著行之於朝。不以稽弊爲心。徒發鎮浮之議。負安石者。重加黜責。欺神考者。略不誰何。遂至於枝蔓而難圖。豈非由偏助之太過。雖當時未見誣史。而先朝自有聖批。恬不奉行。養成乖悖。蒙蔽裕陵之衆美。眩耀鍾山之一書。四輔之行。謀畫本生於日錄。三衛之設。規模初定於新經。密密乎鄧蹇之安排。草草乎京摠之傳授。考其音聲。則簾唱而壘和。譬諸手足。則左弱而右強。凝爲

冰山烈若原火。愚公老矣。益堅平險之心。精衛眇然。未捨填波之願。歿而後已。志不可渝。望雖隔於戴盆。夢不忘於馳闕。丹誠上格。天語遙詢。要觀尊主之恭。緩議奸時之罪。淵冰在念。梟磔寧逃。恭惟皇帝陛下。天大普容。日明徧照。覽熙豐記勳之史。做虞夏探詩之官。咨輿議於多方。證私書之百毀。舜纂堯緒。孜孜乎善繼之勤。武廣文聲。斤斤乎丕承之美。茲所謂一人之慶。可以得萬國之歡。凡有識知。孰不將順。天地尊卑之已定。首足上下之宜分。孔志在乎春秋。漢律嚴於名分。戴上者皆知此義。尊堯者豈獨臣書。燕馬以市骨爲先。鸞驥者必將來矣。鄭校決防川之壅。有舌者其忍默乎。臣命可危。衆口難遏。伏望皇帝陛下。念臣役志於享上。憫臣積禍於敢恭。以尺朽之廢材。貢一得之愚慮。言多妄發。事則有稽。宣宗當紹憲之時。寧容德裕之奪語。武帝以述景爲事。忍視馬遷之短辭。父子至情。古今一揆。不懲謗史之罪。則何以謝過於宗廟。不毀坐像之悖。則何以示順於華夷。國是方強。勢難遽改。大器至重。要在深思。庶乎苗莠之分。始於冠履之辨。至美成於剛健。大患生乎因循。儒宗數人。自是一家之說。聖主獨斷。乃爲我宋之休。天心篤愛之甚明。人情企想而有待。解神考在天之怒。成聖主奉先之仁。克果斷於蔡方。人將大覺。善光揚於堯績。上可無爲。於一顰一笑之中。成允文允武之業。臣將獻駿惠太平之頌。豈特進狂簡不裁之書。曾臆無奇。但盡恭於文字。筋骸已憊。當致命於君親。仰酬再造之恩。退聽一成之議。闔門待盡。殞首知歸。

台州羈管謝表

陳瓘

臣某言。政和元年六月五日。準通州牒。編修政典局。牒奉聖旨。取索臣所撰尊堯集。請速爲檢取。封角付差去人。續又準通州牒。尊堯集係奉聖旨取索。不可遲緩。臣卽於六月十九日申通州。乞依聖旨發遞前

去仍申編修政典局云。上件尊堯集。先合奏御。今匣內黃帕文字等。並題作臣瓘謹封。伏望本局特爲進入於御前開拆。今於十月初七日。準通州牒。準尙書刑部符。都省劄子。奉聖旨。陳瓘自撰尊堯集。語言無緒。盡係詆誣。不行毀棄。送與張商英。意要行用。特勒停。送台州羈管。令本州當職官。常切覺察。不得放出州城。月具存在。申尙書省。臣卽時望闕謝恩。發離本家。水陸兼行。不敢住滯。今於十一月初十日。已到台州城內者。賦晦之志。一書可通。芻蕘之言。萬里不隔。集羣辭而上達。遭一覽以爲榮。竄路雖遙。陳情已畢。臣中謝。伏念臣材如糞土。身若梗蓬。非敢以著書爲能。所陳者戴君之義。知詆誣之不可。志在尊堯。豈行用之敢私。心唯助舜。語言無緒。議論至迂。獨歸美於先猷。遂大違於國是。不行毀棄。有誤咨詢。虛消十載之光陰。靡恤一門之溝壑。果煩揆路。特建刑章。若非特庇於九重。安得延齡於再造。由淮入浙。自通至台。怒濤雖阻於重江。毒瘴幸殊於五嶺。尙留頂踵。獨賴君親。此蓋伏遇皇帝陛下。天大并容。日明洞照。以至慈而善貸。推觀過之深仁。憫此顛隳。欲其存在。以身償怨。螻蟻之命至微。徇國捐生。犬馬之心未替。夢馳丹闕。目想清光。重干擢髮之誅。徒鬱戴盆之望。餘生易捨。大德難酬。

宋文鑑卷第七十二

牋

對皇太子問政牋

箴

大寶箴

用材箴

文箴

省分箴

畏言箴

讓箴

步箴

勸講箴

友箴

視聽言動四箴

審己箴

宋文鑑 卷第七十二

李至

陳彭年

田錫

孫何

王隨

劉敞

劉敞

蔡襄

趙師民

司馬光

程頤

王无咎

對皇太子問政箴

李至

伏奉手書。猥賜下問。夙夜尋繹。喜與憂并。何則。至常人也。識不足以經遠。學不足以待問。才不足以幹事。智不足以周身。而殿下目之爲碩儒。曰可以發蒙。號之爲端士。曰可以延譽。得不憂乎。殿下忠孝之道。貫於神明。溫文之德。彰於天下。而猶虛懷訪問。思所以分君父之憂。以元元爲念。且曰。一夫或致於向隅。千里將疲於觀政。此乃聖上有浸漬生靈之澤。感動天地之德。致使殿下興言及此。實社稷之福。而億兆之幸。得不善乎。然則愚者千慮必有一得。若夫自古太子。養德東宮。不親外事。唯問安侍膳而已。固亦宜哉。而黔庶之疾苦。稼穡之艱難。素所未覩。自非生知之異。天誘其衷。莫得而知矣。噫。事有背經而合道。時有適變而從宜。是以五帝三王。不相沿襲。聖上知其然。由是以浩穰之務。獨命殿下。摠其綱要。而躬決焉。殿下復能欽若聖訓。率由舊章。馭吏民必以誠。待參佐必以禮。慎命令必以簡。察獄訟必以情。恤鰥寡必以仁。抑豪猾必以法。杜讒佞必以正。絕邪僻必以道。有一于此。猶爲善政。況兼是數者乎。而猶曰。奉車苟賜於司南。爲政何慙於拱北。不亦過謙乎。然則至雖不敏。竊嘗讀易。見羣爻稍過。必有悔吝。唯謙象獨亡。是知謙之時義大矣哉。願殿下守之而已。勉之而已。如此則何正言不入。何正道不行。若正言入而正道行。則生民不泰。未之有也。政化不治。亦未之有也。輒因問及。輕肆狂瞽。僭易之罪。安敢逃焉。

大寶箴

陳彭年

二儀之內。最靈者人。生民之中。至大者君。民既可畏。天亦無親。所輔者德。所歸者仁。恭己臨下。輝光益新。載籍斯在。謀猷備陳。內綏萬國。外撫百蠻。治亂所始。言動之間。觀之則易。處之甚難。由是先哲。喻彼投艱。

苟能慮末。乃可防閑。審求逆耳。無惡犯顏。既庶而富。教化乃施。慈儉之政。富庶之基。鰥寡孤獨。人之所悲。發號施令。宜先及之。黃髮鮐背。心實多知。左右侍從。何莫於茲。瞻言百辟。咸代天工。儻無虛授。可建大中。克彰謹束。惟藉至公。知人則哲。視遠則聰。才固難備。道亦少同。葑菲罔捨。杞梓乃充。不扶自直。惟蓬在麻。非揀莫見。唯金在沙。參備顧問。必辨忠邪。獻替以正。裨益無涯。自區草澤。亦有國華。訪此髦士。可拒朋家。三章之立。庶民作程。欽哉欽哉。可以措刑。七代之建。寇孽是平。本仁本義。可以弭兵。是謂齊禮。亦曰好生。有教無類。自誠而明。宗廟社稷。饗之以恭。宮室苑囿。誠之在豐。春蒐秋獮。不廢三農。擊石拊石。用格神宗。使人以悅。乃克成功。治國以政。罔或不從。濟濟多士。用之有光。硜硜小器。謀之弗臧。忠言致益。豈讓膏粱。六藝爲樂。寧後笙簧。任賢勿貳。堯所以昌。改過不吝。湯所以王。六合至廣。萬彙攸多。風俗靡一。嗜慾相摩。如馭朽索。若防決河。左契斯執。六轡遂和。導之以德。民免嬰羅。不懈于位。俗乃偃戈。先王之訓。罔不咸然。吾君之治。亦取斯焉。小心翼翼。終日乾乾。三靈降鑒。百祿無愆。由茲率土。永戴先天。巍巍洪業。億萬斯年。

用材箴

田錫

天運四時。地生萬類。以覆以載。各得其位。天地猶爾。人胡求備。堯以仁化。舜以孝理。稷專播穀。禹務導水。聖賢猶然。人胡求全。是以有才者。不必有德。有德者。不必有言。與人結交。能護其短。掩短錄長。交卽悠遠。任人之職。能從其長。錄長掩短。邦實阜昌。無好之。則忘其不肖。無惡之。則忘其允臧。執心至公。取其所彊。馬或奔踉。乃致千里。士有跡弛。可任以事。一善可稱。則勿求具美。然後會衆善。以涖庶官。民實攸賢。

文箴

孫何

堯制舜度。繇今亘古。周作孔述。炳星煥日。是曰六經。爲世權衡。萬象森羅。五常混并。游夏之徒。得麤喪精。空傳其道。無所發明。後賢誰嗣。惟軻泊卿。仁門義奧。我有典刑。聖人觀之。猶足化成。羸侯劉帝。屈指西京。仲舒賈誼。名實絕異。相如子長。才智非常。較其工拙。互有否臧。揚雄歛焉。刷翼孤翔。可師數子。擅文之場。東漢而下。寂無雄霸。聲聲建安。格力猶完。當途之後。文失其官。家攘往跡。戶掠陳言。陵夷怠墮。至于江左。輕淺淫麗。迭相唱和。聖心經體。盡墜于地。千詞一語。萬指一意。縫煙綴雲。圖山畫水。駢枝儷葉。顛首倒尾。治亂莫分。興亡不紀。齊頓梁絕。陳傾隋圯。奕奕李唐。木鐸再揚。文之紀綱。斷而更張。鉅手魁筆。磊落相望。凌轢百代。直趨三王。續典紹暮。韓領其徒。還雅歸頌。杜統其衆。士德旣衰。文復喧卑。制誥之俗。儕于四六。風什之訛。隣于謳歌。懷經囊史。孰遏頽波。出入五代。兵戈不稱。天佑斯文。起我大君。蒲帛詔聘。鴻碩紛綸。邪返而正。漓澄而淳。凡百儒林。宜師帝心。語思其工。意思其深。勿聽淫哇。喪其雅音。勿視彩飾。亡其正色。力樹古風。坐臻皇極。無俾唐文。獨稱往昔。賤臣司箴。敢告執策。

省分箴

王隨

夕晦晝明。乾動坤靜。物稟乎性。人賦於命。貴賤賢愚。壽夭衰盛。諒夫自然。冥數潛定。蕙生數寸。松高百尺。水潤火炎。輪曲轅直。或金或錫。或玉或石。茶苦薺甘。烏黔鷺白。性不可易。體不可移。揠苗則悴。續鳧乃悲。巢者罔穴。泳者寧馳。竹栢寒茂。桐柳秋衰。闕里泣麟。傅巖肖象。馮衍空歸。千秋驟相。健羨勿用。止足可尙。處順安時。吉祿長享。

畏言箴

劉敞

吾甚畏言。言可畏也。而不能默然。吾言惴惴。倡而後和人。猶以爲過。吾言繩繩。譽而不訾。人猶以爲非。非吾言之畏。維人之多忌。非吾之不能默然。而人實多言。若是者其止乎。其已乎。其勿問而唯乎。譬之於物。其爲石不爲水乎。水之滔滔。往而不來。有陷而淵。有壅而洄。有激而在山椒。曰水哉水哉。

讓箴

劉敞

資政富公始讓樞密直學士。又讓翰林學士。又讓樞密副使。凡三讓。所讓益尊。所守益堅。粲然有古人之遺風。故作讓箴以矯世礪俗云。

讓如何其讓。非爲名。欲先信吾道於天下。氓讓如何其讓。非爲利。欲天下之人咸信吾義。世有常患。患其欲速。枉尺直尋。卒附于辱。世有常患。患其在得。辭小受大。卒沒于直。公皆拂之。公旣述之。啓之闢之。俾世則之。曰吾豈惡富貴。富貴維德。人以厚己。我以厚國。時豈無人。昏夜乞憐。縱或得之。何如其賢。時豈無人。乘機射利。縱或得之。何如其智。嗟此富公。直哉優優。孰眎富公。而能勿羞。孰持富公。攜手以游。昔宋考父。三命益恭。嗟此富公。千世與同。作詩載美。穆如清風。

步箴

蔡襄

有足兮動涉坦夷。有心兮何由險巇。足非有慮兮。心役之爲。用心如足兮。蠻貊行之。

勸講箴

趙師民

若帝之元。於稽古先。將以其道。格于皇天。格天如何。謹徽舊典。惟聖時憲。乃克盡善。在帝宅中。亮章溫雅。將以其文。化成天下。化成如何。順考正道。席上之珍。茲惟國寶。天下有帝。體元刵制。非先聖之舊章。不足

以乘同文而執司契。日中爲市。以燹四方。非先聖之遺法。不足以舉大義。而正國常。帝度其身。郁郁乎文。彰禮施樂。以副皇墳。帝出其言。穆穆厥聲。含仁吐義。式諧羣情。自天降祥。我民旣康。不觀于經。懼先猷之寢忘。四夷放命。有嚴誓令。不觀于經。慮大功之未定。無以方隅之多事。而謂經籍之宜息。虞舜征苗。誕敷文德。無謂宸居之至尊。而忽右文之爲貴。歧昌造周。天經地緯。無以陳久之可替。乃謂迂闊而難行。先哲之言。雖無老成。無譏鄙生之窳陋。而略愚儒之淺昧。先師之談。不以人廢。無以世治之或殊。而謂陳言之可悔。商弼之諫。事不師古。無玩歲月之其除。而謂寸陰之已速。周王之戒。惟日不足。有以見世主之御圖。或萬機紛然。不酌于古道。則風化有時。而弗宣。有以見人君之居極。或百度差忒。不斷于古義。則權制有時。而弗克。昔令王之經世。必去害而稱利。明主觀其書。可以效財成于萬事。昔賢臣之事君。有謀猷而必陳。明主觀其書。可以示軌度于羣倫。正朝之上。法宮之中。非贊襄雅奧。不足以興嗜慾于清躬。神麗之游。光明之處。非啓迪深厚。不足以立正事於古語。是故可以上文。可以立武。可以奉天地。可以爲宗主。匪止玩其辭。而釋其詰。可以觀道。可以對萬物。可以臨兆人。不止明其舊。而知其新。靖恭乙夜。總覽羣書。夫聖人之至德。何以加於從容晏朝。紬繹微旨。非天下之至精。孰能與此。臣初開始元之閒。儒風寢還。待問之臣。賜以清閒。臣復觀永平之烈。經術未缺。羣儒議前。稱制以決。桑乾之后。來自幽陵。束髮右衽。斯文有承。金陵之君。越于夷裔。雖則講習。其文已敝。李唐之興。賢君挺生。正觀初治。開元旣平。東壁羣山。儒宗墨卿。侍從之臣。官有佳名。在我太祖。神武披攘。親駕辟靡。真儒有光。有赫太宗。文武並運。經臣師師。以承帝問。於穆真皇。講求多藝。以其人文。發爲盛際。陛下卽位。纂承天祿。肇開二閣。以延儒服。西臨邇英。北啓延義。

瞻仰皇明。彌綸聖智。成天下之務。昔游焉而穆清。陳天下之謨。頃於茲而講肄。帝坐甚明。天章不祕。願以議道。願以求治。下臣執經。敢告中侍。

友箴

司馬光

余何遊乎。余將遊聖人之門。仁人之里。非聖不師。非仁不友。可乎。未可。不若遊衆人之場。聞善而遷。觀過而改。

視聽言動四箴序

程頤

顏子問克己復禮之目。夫子曰。非禮勿視。非禮勿聽。非禮勿言。非禮勿動。四者。身之用也。由乎中而應乎外。制於外。所以養其中也。顏子事斯語。所以進於聖人。後之學聖人者。宜服膺而勿失也。作四箴以自警云。一作因箴。以自警。

視箴

心兮本虛。應物無跡。操之有要。視之爲一作爲則。蔽交於前。其中則遷。制之於外。以安其內。克己復禮。久而誠矣。

聽箴

人有秉彝。本乎天性。知誘物化。遂亡其正。卓彼先覺。知止有定。閑邪存誠。非禮勿聽。

言箴

人心之動。因言以宣。發禁躁妄。內斯靜專。矧是樞機。與戎出好。吉凶榮辱。惟其所召。傷易則誕。傷煩則枝。

已肆物忤。出悖來違。非法不道。欽哉訓辭。

動箴

哲人知幾。誠之於思。志士厲行。守之於爲。順理則裕。從欲惟爲。一作危造次克念。戰兢自持。習與性成。聖賢同歸。

審己箴

王无咎

汝曰有德。汝未大成。汝之有過。傷德蓋輕。聖能恕汝。猶曰汝美。衆人弗逮。知慕而已。恕汝不知。慕汝輒愉。汝不自反。卒比於愚。愚不可比。汝孰宜懼。聖人之恕。衆人之慕。

宋文鑑卷第七十三

銘

財貨銘

續座右銘

武關銘

彭祖觀井圖銘

門銘

几銘

几銘

擊虵笏銘

槃水銘

醫銘

明州新修刻漏銘

布衾銘

西銘

宋文鑑 卷第七十三

李瑩

李至

胡旦

陳靖

呂夷簡

陳堯佐

晏殊

石介

司馬光

呂誨

王安石

范純仁

張載

九八七

東銘

鼎硯銘

鄧公硯銘

天硯銘

文與可琴銘

徐州蓮華漏銘

三槐堂銘

擇勝亭銘

九成臺銘

端石硯銘

邁硯銘

洪州分寧縣藏書閣銘

游藝齋銘

研銘

黃樓銘

克己銘

張載

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

黃庭堅

黃庭堅

黃庭堅

陳師道

呂大臨

蜀舍銘

大圓硯銘

座右銘

家藏古硯銘

古硯銘

財貨銘

暇日讀夢書。則曰：夢虺夢糞者，獲財。因以銘之。財貨將至，夢寐可尋。或穢或虺，乃玉乃金。穢可親歟，虺可翫歟。敢獻斯銘，以激貪夫。

續座右銘

李至

崔子玉爲座右銘。白樂天亦爲座右銘。檢身之道，幾乎殫矣。予嘗冥心燕坐，自思所爲，慮向之益友，以予位著，不我規也。因疏其所得，亦命爲座右銘。聊以自勉。其辭曰：

短不可護，護則終短。長不可矜，矜則不長。尤人不如尤己。好圓不如好方。用晦則天下莫與汝爭智，撝謙則天下莫與汝爭強。多言者老氏所戒，欲訥者仲尼所臧。妄動有悔，何如靜而勿動。太剛則折，何如柔而勿剛。吾見進而不已者敗，未見退而自足者亡。爲善則遊君子之域，爲惡則入小人之鄉。吾將書紳帶以自警，刻盤盂而過防。豈如長存於座右，庶夙夜之不忘。

武關銘

胡旦

劉跋

晁補之

鄭浩

唐庚

崔鷗

李瑩

南條東走。自雍而荆。呀爲武關。作扞秦城。秦人東顧。六國無主。漢氏西來。子嬰爲虜。彼此鯨鯢。更相豺虎。吁嗟強秦。曾無守禦。秦而爲漢。漢復如秦。劉氏不綱。莽賊造新。嚴嚴武關。前人後人。我開則興。我閉則亂。一開一閉。今古同貫。王者邦畿。守在四夷。禮義干櫓。道德藩籬。遠人不服。文德來之。化旣無外。何以關爲。

彭祖觀井圖銘

陳靖

淳化中。予將命之狄丘。道由彭門。有客得彭祖觀井圖。以爲貺。中有臺榭。人物山水。森森然。蓋狀其佳象。幽致。表繪事之工。予無取。所慕者。唯彭氏面井而覆之。以輪背樹而纜之。以繩。凭杖斂躬。跼蹐而迎視。兢兢然。若將墜也。嗚呼。古人臨事而懼之。有若是。檢身遠害之。有若是。後之君子。得無效歟。予實好古者。歷考其跡于傳記。雖負而難信。且夫子云。竊比於我老彭。亦其驗也。故作銘于座右曰。至哉古人。遠害全身。戰戰兢兢。恆若履冰。朽索之馭。納隍是慮。天子則之。鴻圖永據。存而懼亡。繫于苞桑。諸侯則之。其國必昌。若舟弗濟。夕惕而厲。大夫則之。其家孔熾。直哉惟清。執虛如盈。士子則之。其道元亨。不爭在醜。無愧屋漏。庶人則之。其食孔阜。吾省予行。吾慎予守。竊比老彭。式介眉壽。

門銘

呂夷簡

古者盤孟几杖。規戒存焉。今爲門銘。竊類於此。

忠以事君。孝以養親。寬以容衆。謹以修身。清以軌俗。誠以教民。

謙以處貴。樂以安貧。勤以積學。靜以澂神。敏以給用。直以全真。

約以奉己。廣以施人。重以臨下。恭以待賓。貫之以道。總之以仁。

在家爲子 在邦爲臣 斯言必踐 盛德聿新 勒銘於門 永代書紳

几銘 陳堯佐

親仁可以自託。友賢可以自扶。求仁得仁。必馳必驅。若隱几以召。憑几而呼。則仁賢斯遯。厮役來趨。嗚呼。賢旣遯。身卽孤。

几銘 晏殊

小飯防饑。跣行虞跌。巾有角墊。衣存衽缺。惟忠與孝。則罔摧折。

擊蛇笏銘 石介

天地至大。有邪氣干於其閒。爲凶暴。爲殘賊。聽其肆行。如天地卵育之而莫禦也。人生最靈。或異類出於其表。爲妖怪。信其異端。如人蔽覆之而莫露也。祥符年。寧州天慶觀有蛇妖。極怪異。郡刺史日兩至於其庭朝焉。人以爲龍。舉州人內外遠近。罔不駿奔於門。以覲。恭莊肅祇。無敢怠者。今龍圖侍御孔公。時佐幕。在是邦。亦隨郡刺史於其庭。公曰。明則有禮樂。幽則有鬼神。是蛇不以誣乎。惑吾民。亂吾俗。殺無赦。以手板擊其首。遂斃於前。則蛇無異焉。郡刺史暨州內外遠近庶民。昭然若發蒙。見青天。覩白日。故不能肆其凶殘。而成其妖惑。易曰。是故知鬼神之情狀。公之謂乎。夫天地閒有純剛至正之氣。或鍾於物。或鍾於人。人有死物有盡。此氣不滅。烈烈然彌亘億萬世而長在。在堯時爲指佞草。在魯爲孔子誅少正卯刃。在齊在晉爲董史筆。在漢武帝爲東方朔戟。在成帝朝爲朱雲劍。在東漢爲張綱輪。在唐爲韓愈論佛骨表。逐鱷魚文。爲段太尉擊朱泚笏。今爲公擊蛇笏。故佞人去。堯德聰。少正卯戮。孔法舉。罪趙盾。晉人懼。辟崔子。

齊刑明。距董偃。折張禹。劾梁冀。漢室乂。佛老微。聖德行。鱷魚徙。潮風振。恠蛇死。妖氣散。噫。天地鍾純剛。至正之氣。在公之笏。豈徒斃一蛇而已。軒陸之下。有罔上欺君。先意順旨者。公以此笏指之。廟堂之上。有蔽賢蒙惡。違法亂紀者。公以此笏麾之。朝廷之內。有諛容佞色。附邪背正者。公以此笏擊之。夫如是。則軒陸之下。不仁者去。廟堂之上。無姦臣。朝廷之內。無佞人。則笏之功也。豈止在一蛇。公以笏為任。笏得公而用。公方為朝廷正人。笏方為公之良器。敢稱德于公。作笏銘曰。

至正之氣 天地則有 笏惟靈物 笏能乃受 笏之為物 純剛正直

公惟正人 公乃能得 笏之在公 能破淫妖 公之在朝 讒人乃消

靈氣未竭 斯笏不折 正道未亡 斯笏不藏 惟公寶之 烈烈其光

槃水銘 司馬光

槃水之盈。止之則平。平而後清。清而後明。勿使小欵。小欵則傾。傾不可收。用毀其成。嗚呼。奉之可不兢兢。

醫銘 呂誨

晉人武泰通醫術。守臣獻狀。補太醫正。還鄉里。創起應聖侯廟。藝既成。歸善於師。又將廣懋來學。其志有足稱者。予謫官。于是遷守蒲中。既行。丐文以顯于廟。因作醫銘。嘉乃意勤。遂成其志。知予言有以滋其善也。

六氣五行 人稟而生 三部九候 納諸和平 昔稱絕技 滿腸滌胃

輔以砭石 因之決潰 察脉之原 當於未然 不攻而勝 庶幾十全

愈世之病。如持國柄。常使衆邪。不得干正。能盡己意。膏肓必起。
苟利於藝。毫釐千里。泰也有爲。心不忘師。義利之重。慎乎所治。

明州新刻漏銘

王安石

戊子王公始治于明。丁亥孟冬。刻漏具成。追謂屬人。嗟汝予銘。自古在昔。挈壺有職。匪器則弊。人亡政息。其政謂何。弗棘弗遲。君子小人。興息維時。東方未明。自公召之。彼寧不勤。得罪于時。厥荒懈廢。乃政之疵。嗚呼有州。謹哉維茲。維茲其中。俾我後思。

布衾銘

范純仁

藜藿之甘。綿布之溫。名教之樂。德義之尊。求之孔易。享之常安。錦繡之奢。膏粱之珍。權寵之盛。利慾之繁。苦難其得。危辱旋臻。舍難取易。去危就安。至愚且知。士寧不然。顏樂簞瓢。萬世師模。紂居瓊臺。死爲獨夫。君子以儉爲德。小人以侈喪軀。然則斯衾之陋。其可忽諸。

西銘

張載

乾稱父。坤稱母。予茲藐焉。乃混然中處。故天地之塞。吾其體。天地之帥。吾其性。民吾同胞。物吾與也。大君者。吾父母宗子。其大臣。宗子之家相也。尊高年。所以長其長。慈孤弱。所以幼吾幼。聖其合德。賢其秀也。凡天下疲癯殘疾。惇獨鰥寡。吾兄弟顛連而無告者也。于時保之子之翼也。樂且不憂。純乎孝者也。違曰悖德。害仁曰賊。濟惡者不才。其踐形惟肖者也。知化則善述其事。窮神則善繼其志。不愧屋漏。爲無忝。存心養性。爲匪懈。惡旨酒。崇伯子之顧養。育英才。穎封人之錫類。不弛勞而底豫。舜其功也。無所逃而待亨。申

生其恭也。體其愛一作受而歸全者。參乎。勇於從而順令者。伯奇也。富貴福澤。將以厚吾之生也。貧賤憂戚。庸玉汝於成也。存吾順事。沒吾寧也。

東銘

張載

戲言出於思也。戲動作於謀也。發於聲。見乎四肢。謂非己心。不明也。欲人無己疑。不能也。過言非心也。過動非誠也。失於聲繆。迷其四體。謂己當然。自誣也。欲他人己從。誣人也。惑者以出於心者。歸咎爲己。戲失於思者。自誣爲己。誠不知戒其出汝者。引一作歸咎其不出汝者。長傲且遂。非不智孰甚焉。

鼎硯銘

蘇軾

鼎無耳。槃有趾。鑑幽無見。几不倚。腸蟲隕。羿喪厥喙。羽淵之化。帝祝尾。不周僨。裂東南。圯黝然而深。維水委。誰乎爲此。昔未始。戲銘其譬。如幻詭。

鄧公硯銘

蘇軾

王鞏。魏國文正公之孫也。得其外祖張鄧公之硯。求銘於軾。軾銘曰。

鄧公之硯。魏公之孫。允也。其物展也。其人思我。魏公文而厚。思我鄧公德而壽。三復吾銘。以究令名。

天硯銘

蘇軾

軾年十二時。於所居隙地中。與羣兒鑿池爲戲。得異石如魚膚。溫瑩作淺碧色。表裏皆細銀星。扣之鏗然。試以爲硯。甚發墨。顧無貯水處。先君曰。是天硯也。有研之德。而不足於形耳。因以賜吾。曰。是文字之祥也。寶而用之。且爲銘曰。

一受其成而不可更。或全於德。或全於形。均此二者。顧吾安取。仰唇俯足。世固多有。

文與可琴銘

蘇軾

攬之幽然。如水赴谷。釋之蕭然。如葉脫木。按之噫然。應指而長。言者似君。置之枵然。遺形而不言者似僕。

徐州蓮華漏銘

蘇軾

故龍圖閣直學士禮部侍郎燕公肅。以創物之智。聞於天下。作蓮花漏。世服其精。凡公所臨。必爲之。今州郡往往而在。雖有巧者。莫敢損益。而徐州獨用瞽人衛朴所造。廢法而任意。有壺而無箭。自以無目而廢天下之視。使守者伺其滿。則決之。而更注。人莫不笑之。國子博士傅君揚。公之外曾孫。得其法爲詳。其通守是邦也。實始改作。而請銘於軾。銘曰。

人之所信者。手足耳目也。目識多寡。手知重輕。然人未有以手量而目計者。必付之於度量與權衡。豈不自信而信物。蓋以爲無意無我。然後得萬物之情。故天地之寒暑。日月之晦明。昆侖旁薄於三十八萬七千里之外。而不能逃於三尺之箭。五斗之餅。雖疾雷霾風。雨雪晝晦。而遲速有度。不加虧贏。使凡爲吏者。如餅之受水。不過其量。如水之浮箭。不失其平。如箭之升降也。視時之上下。降不爲辱。升不爲榮。則民將靡然而心服。而寄我以死生矣。

三槐堂銘

蘇軾

天可必乎。賢者不必貴。仁者不必壽。天不可必乎。仁者必有後。二者將安取衷哉。吾聞之申包胥曰。人衆者勝天。天定亦能勝人。世之論天者。皆不待其定而求之。故以天爲茫茫。善者以怠。惡者以肆。盜跖之壽。

孔顏之厄。此皆天之未定者也。松栢生於山林。其始也。困於蓬蒿。厄於牛羊。而其終也。貫四時。閱千歲。而不改者。其天定也。善惡之報。至於子孫。而其定也久矣。吾以所見。所聞。所傳。聞考之。而其可必也。審矣。國之將興。必有世德之臣。厚施而不食其報。然後其子孫。能與守文太平之主。共天下之福。故兵部侍郎晉國王公。顯於漢周之際。歷事太祖太宗。文武忠孝。天下望以爲相。而公卒以直道。不容於時。蓋聞嘗手植三槐於庭。曰。吾子孫必有爲三公者已。而其子魏國文正公。相真宗皇帝。於景德祥符之間。朝廷清明。天下無事之時。享其福祿榮名者。十有八年。今夫寓物於人。明日而取之。有得有否。而晉公脩德於身。責報於天。取必於數十年之後。如持左契。交手相付。吾是以知天之果可必也。吾不及見魏公。而見其子懿敏公。以直諫一作道事仁宗皇帝。出入侍從。將帥三十餘年。位不滿其德。天將復興王氏也。歟。何其子孫之多賢也。世有以晉公比李栖筠者。其雄才直氣。真不相上下。而栖筠之子吉甫。其孫德裕。功名富貴。略與王氏等。而忠信仁厚。不及魏公父子。由此觀之。王氏之福。蓋未艾也。懿敏公之子輩。與吾遊。好德而文。以世其家。吾是以錄之。銘曰。

嗚呼休哉。魏公之業。與槐俱萌。封植之勤。必世乃成。既相真宗。四方砥平。歸視其家。槐陰滿庭。吾儕小人。朝不及夕。相時射利。皇卹厥德。庶幾僥倖。不種而穫。不有君子。其何能國。王城之東。晉公所廬。鬱鬱三槐。惟德之符。嗚呼休哉。

擇勝亭銘

蘇軾

維古潁城。因潁爲隍。倚舟于門。美哉洋洋。如淮之甘。如漢之蒼。如洛之溫。如浚之涼。可侑我客。可流我觴。

我欲卽之爲館爲堂。近水而構。夏潦所襄。遠水而築。邈焉相望。乃作斯亭。筵楹。鑿枘交設。合散靡常。赤油仰承。青幄四張。我所欲往。十夫可將。與水升降。除地布牀。可使杜蕢。洗觶而揚。可使莊周。觀魚而忘。可使逸少。祓禊而祥。可使太白。泳月而狂。旣薺我茶。亦醪我漿。旣灌我纓。亦浣我裳。豈獨臨水。無適不臧。春朝花郊。秋夕月場。無脛而趨。無翼而翔。敵又改爲。其費易償。榜曰擇勝。名實允當。維古至人。不留一方。虛白爲室。無何爲鄉。神馬尻輿。孰爲輪箱。流行坎止。雖獨不傷。居之無盜。中靡所藏。去之無戀。如所宿桑。豈如世人。生短慮長。尺宅不治。寸田是荒。錫瓦銅雀。石門阿房。俯仰變滅。與生俱亡。我銘斯亭。以砭世盲。

九成臺銘

蘇軾

韶陽太守狄威。新作九成臺。玉局散吏蘇軾。爲之銘曰。自秦并天下。滅禮樂。韶之不作。蓋千三百二十有三年。其器存。其人亡。則韶旣已隱矣。而況於人器兩亡而不傳。雖然。韶則亡矣。而有不忘者存。蓋常與日月寒暑。晦明風雨。並行於天地之間。世無南郭子綦。則耳未嘗聞地籟也。而況得聞其天。使耳聞天籟。則凡有形有聲者。皆吾羽旄干戚。管磬匏絃。嘗試與子登夫。韶石之上。舜峯之下。望蒼梧之眇莽。九疑之聯緜。覽觀江山之吐吞。草木之俯仰。鳥獸之鳴號。衆竅之呼吸。往來唱和。非有度數。而均節自成者。非韶之大全乎。上方立極。以安天下。人和而氣應。氣應而樂作。則夫所謂簫韶九成。來鳳鳥而舞百獸者。旣已粲然畢陳于前矣。

端石硯銘

蘇軾

與墨爲入。玉靈之食。與水爲出。陰鑑之液。懿矣茲石。君子之側。匪以玩物。維以觀德。

邁視銘

蘇軾

以此進道常若渴。以此求進常若驚。以此治財常思子。以此書獄常思生。

洪州分寧縣藏書閣銘

黃庭堅

凡治有條。如機有綜。經經緯緯。積寸成兩。菅蒯之手。簡功於紉。可席可履。不能以寒。昔此廟學。終歲蓬艾。聖師所居。風雨無蓋。今誦聖言。皆有夏屋。爰及方冊。宇以華閣。華閣渠渠。言行之林。聿求古今。自觀德心。咨爾諸生。永懷茲道。勿嬉勿驚。以迪有造。得意自己。書不盡言。如御琴瑟。聽於無絃。幙阜凡凡。吳味楚尾。其下脩水。行六百里。山川之靈。或秀于民。世得材用。我培其根。勒銘頌成。式告爾後。無或墮之。永庇俎豆。色荒者使人躑躑。酒荒者使人漠漠。游於六藝之林。是謂名教之樂。

游藝齋銘

黃庭堅

研銘

黃庭堅

制作淳古。可使巧者拙。夸者節。性質溫潤。可使躁者靜。戾者聽。觀棐几而見研。忘其一室之縣罄。

黃樓銘

陳師道

熙寧十年。京東路安撫使臣某。轉運使臣某。判官臣某。稽首言。河決澶州。南傾淮泗。彭城當其衝。夾以連山。扼以呂梁。流泄不時。盈溢千里。平地水深丈餘。下顧城中。井出脉發。東薄兩隅。西入通洫。南懷水垣。土惡不支。百有餘日。而後已。守臣蘇軾。深惟流亡。爲天子憂。夙夜不怠。以勞其人。興懷戍兵。固弊應卒。外爲長楗。乘高如虹。以殺其怒。內爲大堤。附城如環。以待其潰。築二防於南門之外。以通南山。以安危疑。發倉

庚明勸禁。以惠困窮。以督盜賊。宣布恩澤。巡行內外。吏民嚮化。興於事功。法施四邑。誠格百神。可謂有功矣。宜有褒嘉。以勸郡縣。十月二日。甲子。奏京師。明年元豐正月。甲子。制誥諭意。臣軾惟念祇承謨訓。人神同力。敢自爲功。以速大戾。而明揚褒大。無以報稱。乃作黃樓於東門。具刻明詔。以承天休。而明德意。使其客陳師道。又爲之銘。臣師道。伏惟呂尙南仲。內撫百姓。內平諸侯。詩美文武。尹甫召虎。南伐淮夷。北伐獫狁。功歌宣王。君能使人。以盡其才。臣能有功。以報其上。古之義也。臣師道。又惟感而通之者。道也行而化之者。德也。制法明教者。政也。治人成功者。事也。昔之詩人。歌其政事。則并其道德而傳之。後王有作。可舉而行。願臣之愚。何與於此。誠樂君臣之盡道云。臣不佞。冒死上黃樓銘。其詞曰。

皇治惟戒。修明法度。協和陰陽。十有一年。天災時行。河失其防。齊魯梁楚。千里四遠。潰亂散亡。皇仁隱憂。臨遣信臣。以惠東方。羸老不窮。安慰撫養。發散積倉。流人如歸。居人忘危。完聚靡傷。天敝地平。明聖成能。人神效祥。靈平告成。百穀豐盈。萬邦樂康。郡縣祇畏。允迪聖謨。終事無荒。皇功不居。歸休臣民。邇昭遠揚。守臣拜手。夸大休嘉。使民不忘。改作黃樓。以臨泗上。述修故常。庶臣無佞。原始念終。銘之石章。以告成功。以揚德聲。永永無疆。

克己銘

呂大臨

凡厥有生。均氣同體。胡爲不仁。我則有己。立己與物。私爲町畦。勝心橫生。擾擾不齊。大人存誠。心見帝則。初無吝驕。作我盂賊。志以爲帥。氣爲卒徒。奉辭于天。孰敢侮予。且戰且徠。勝私窒慾。昔焉寇讎。今則臣僕。方其未克。窘我室廬。婦姑勃蹊。安取厥餘。亦旣克之。皇皇四達。洞然八荒。皆在我闥。孰曰天下不歸吾仁。

痒癢疾痛舉切吾身。一日至之。莫非吾事。顏何人哉。晞之則是。

蜀舍銘

劉跋

某郡王萬寓鄭榜其居曰蜀舍。持餘杭朱浚民所爲記。過須城劉跋而請銘。爲之銘曰。

噫嘻此舍是蜀非邪。吞若兩川。坤之維耶。危乎高哉。上青天邪。赤甲白鹽。峙峨眉邪。檣笳響鉤。飯蹲鷓。邪。一物不有。而不無邪。噫嘻此舍是真蜀國。身如壺公。靡索不獲。行以蜀馳。臥以蜀息。陰燕陽魏。吳越。瑾錯。裴徊周流。誓不以易。謂不信者。有如此石。

大圓硯銘

晁補之

黑月模汗兩奴。利與黔突居。難與揭篋趨。爾圓其外。亦不可轉。視吾爾硯。

座右銘

鄒浩

惟親惟天。惟親惟地。覆育我躬。德莫我議。汲汲以報。亦豈佗求。權行乃心。則知厥由。惟身康強。親喜而安。惟身疾疾。親懼于顏。矧惟此身。其來有自。自祖自考。以至于此。能欽愛身。爲欽愛親。祖考聽之。何福不臻。親壽而昌。我戲于側。念茲在茲。敢忘朝夕。

家藏古硯銘

唐庚

硯與筆墨。蓋氣類也。出處相近。任用寵遇。相近也。獨壽夭。不相近也。筆之壽以日計。墨之壽以月計。硯之壽以世計。其故何也。其爲體也。筆最銳。墨次之。硯鈍者也。豈非鈍者壽而銳者夭乎。其爲用也。筆最動。墨次之。硯靜者也。豈非靜者壽而動者夭乎。吾於是得養生焉。以鈍爲體。以靜爲用。或曰壽夭數也。非鈍銳。

動靜所制。借令筆不銳。不動吾知。其不能與硯久遠也。雖然。寧爲此勿爲彼也。銘曰。
不能銳。因以鈍爲體。不能動。因以靜爲用。唯其然。是以能永年。

古硯銘

知其白。守其黑。似老學。不厭教。不倦似孔。其實墨家者流。摩頂放踵。

崔鶴

宋文鑑卷第七十四

頌

廣農頌

夏竦

大順頌

晁迥

會聖宮頌

歐陽脩

籍田頌

宋祁

明堂頌

宋祁

皇帝神武頌

宋祁

慶曆聖德頌

石介

錢鄧州不燒楮鏹頌

呂南公

廣農頌

夏竦

景德三年春正月庚戌詔頒農田敕于天下二月癸未詔郡國領勸農事崇化源而廣農業也臣聞聖人無土不王無民不君有土地則王業興有人民則君道立故先王之建國也土欲廣而不欲隙民欲衆而不欲墮謂地之不闢非吾土也人之不農非吾民也乃爲閭里室家以蕃其生爲畎澮封畛以理其田爲耒耜錢鏹以庀其器爲歷象氣候以授其時立經制以御之設官司以教之均工商衡虞之稅正車馬甲

兵之賦。於是乎仁義禮樂有所加。賞罰號令有所用。三代通制。建中經遠。民以里居。地以井受。暨秦開阡陌。農戰相乘。漢制名田。并兼不息。舊章缺而仁政墜。經界慢而調競起。沿革而下古之制度。不可復矣。其政何哉。蓋三季已還。五代而上。有天下者。或不知天下以地爲基。以農爲本。以食爲源。以教爲器。當其撥平禍亂。經始四國。則衽金革。簡車馬。計懷柔。議聚斂。賞勳舊。治城邑。暨邊陲既寧。寓縣既平。功業既成。府庫既盈。則思悉華夏。以自奉。驅億兆以從欲。有患邊幅未闢。威武未震。則轉芻粟。事夷狄。有患歲月易逝。容髮易朽。則招方士。求神仙。有患登覽未遠。行樂未極。則增臺榭。麗宮室。有患嬪御未廣。歌舞未工。則漁聲色。選伎藝。有患校獵未快。馳騁未捷。則廣苑囿。具畢弋。有患巡幸未徧。游賞未普。則修馳道。飛清蹕。其間自非負天啓神授之資。有聖文靈武之德者。則不能訓稼穡。務儲衍。捨派而趨源。去末而從本。致天下太康。家給人足者哉。我國家荷二聖基業。用三王禮樂。足食訓農。克立治本。吾皇龍飛。春秋鼎盛。勵精百度。旁求黎獻。謂守文艱如創業。承平難如治亂。深鑒前世。專行王道。羈縻四夷。而重兵革。漁獵賢雋。而藏網罟。觀六藝。虛臺館。聽道德。放聲樂。功業之大。則成康文景。無或比隆。河山之遠。則秦漢隋唐。不能齊盛。菽麥流行。而紅腐。玉帛充牣。而露積。陛下尙宸居。減麗御膳。輟聲霄衣。紫庭清問。多士舉三王之故實。修八世之墜典。以爲擇循吏。守郡國。撫百姓。善則善矣。而未專也。於是授之使領。設爲職司。所以徇名而責實也。頒憲令。經田疇。勸耕殖。至則至矣。而未一也。於是編其制度。勒爲科條。所以建中而示法也。徇名責實。則官不曠。建中示法。則民不疑。詔下之日。鬼神稱慶。太平之風。旋踵可待。不終日而爭訟息。未踰時而淳鹵闢。凡九圍之內。一歲之間。衣食足而倉廩實。仁義行而刑罰措。大哉。炎宋功德。陛下教化。垂億萬世。

與天無窮。臣生逢聖明。叨觀盛事。謹昧死上廣農頌。其辭曰。

皇哉惟聖。躬提天柄。億兆歸心。三靈洽慶。廣我田事。肇修稼政。乃置官名。乃頒號令。號令維何。分條建規。恩斯懋斯。流宥攸歸。官名維何。啓職庀司。訓之導之。播種惟時。民曰勤止。服田力穡。晝爾于耕。宵爾無斃。千耦偕飛。百穀咸殖。既藝淳鹵。越經封洫。官曰涖止。糾力勸能。庀我錢鎛。疏我溝塍。乃能灌漑。爰相丘陵。汗萊以闢。游惰用懲。赫赫聖謀。有作咸覩。畎澮四溟。井疆九土。沃野萬里。縱橫其畝。擁耒成林。灑流降雨。陽春如膏。原隰如鱗。我稼既華。六合生雲。稻粱黍稷。萬井龍文。同我婦子。或耨或耘。八月其穫。乃登爾稼。滯穗棲原。餘糧厭野。盈溢京庾。流衍方夏。式歌且謠。土金同價。百姓足矣。君孰不足。三百之困。九年之蓄。八蜡既通。五禮咸穆。藏財於民。所寶惟穀。君哉君哉。樂事訓農。炎帝之教。后稷之功。方我王度。明而未融。臣之頌之。永矣無窮。

大順頌

晁迥

禮記禮運云。四體既正。膚革充盈。人之肥也。父子篤。兄弟睦。夫婦和。家之肥也。大臣法。小臣廉。官職相守。君臣相正。國之肥也。天子以德爲車。以樂爲御。諸侯以禮相與。大夫以法相序。士以信相考。百姓以睦相守。天下之肥也。是謂大順。愚讀書至此。詳味久之。觀乎古先垂教。條暢明備。義取饒裕。充盛目之曰肥。若能偃風踐迹。各當其分。順之至也。無遠弗届。浸漬浹洽。薰然大同。斯乃純被之化。盡善盡美矣。雖欲銳意推演。復何措辭。區區至誠。願陳萬一。今但舉其全文。而繫以褒讚者。祇率道揚之志也。頌曰。

猗歟禮經。孰窺優域。愚嘗究觀。沛然有得。肇自人倫。及于家國。遂滿天下。具四表則。是謂大順。允臻其

極。老生作頌。奉陽景式。

會聖宮頌

歐陽脩

臣伏見國家采漢書原廟之制。作宮于永安。以備園寢。欲以盛陵邑之充奉。昭祖宗之光靈。以耀示于千萬世。甚盛德也。臣永惟古先王者。將有受命之符。必先興業造功。警動覺悟於元元。然後有其位。而繼體守文之君。又從而顯明丕大。以纂脩乎舊物。故其兢兢勤勤。不忘前人。是以根深而葉茂。德厚而流光。子孫孫承之無疆。伏惟皇帝陛下。以神聖德。傳有大器。乾健而正。離繼而明。卽位以來。於茲十年。勤邦儉家。以修太平。日朝東宮。示天下孝。親執籩豆。三見於郊。日星軌道。光明清潤。河不怒溢。東南而流。四夷承命。歡和以賓。奔走萬里。顧非有干戈告讓之命。文移發召之期。而犀珠象牙。文馬。穀玉。旅于闕庭。納于廡府。如司馬令。無一後先。至德之及。上格于天。下極于地。中浹于人。而外冒於四表。昆蟲有命之物。無不仰戴。神威聖功。效見如此。太祖創造基始。克成厥家。當天受命之功。太宗征服綏來。遂一海內。睿武英文之業。真宗禮樂文物。以隆天聲。升平告功之典。陛下夙夜虔共。嗣固鴻業。纂服守成之勤。基構累積。顯顯昌昌。益大而光。稱于三后之意。可謂至孝。況春秋歲時。以禘以祫。則有廟祧之嚴。配天昭孝。以享以告。則有郊廟明堂之位。篆金刻石。則有史氏之官。歌功之詩。流于樂府。象德之舞。見于羽毛。惟是邦家之光。祖宗之爲。有以示民。而垂無窮者。罔不宣著。陛下承先烈。昭孝思。所以奉之以嚴。罔不勤備。聖人之德。謂無以加。而猶以爲未也。乃復因陵園。起宮室。以望神游。土木之功。嚴而不華。地爽而潔。宇敞而邃。神靈杳冥。如來如宅。合於禮經。孝子警咳思親之義。愚以謂宮且成。非天子自臨享。則不能以來三后之靈。然郡國不

見治道太僕不先整駕恬然未聞有司之詔豈難於動民而遲其來耶特以龜筮所考須吉而後行耶不然何獨留意於屋牆構築而至於薦見孝享未之思耶況是宮之制夷山爲平外取客土鍛石伐木發兵胥靡調旁近郡如此數年而道路之民徒見興爲之功恐愚無以識上意是宜不惜屬車之費無諱數日之勞沛然幸臨因展陵墓退而諭民以孝思之誠遂見守土之臣探風俗以問高年亦堯舜之事也古者天子之出必有采詩之官而道路童兒之言皆得以聞臣是以不勝惓惓之心謹采西人望幸意作爲頌詩以獻闕下辭曰

巍巍穹崇奠京之東有山而崧。齋淪道源。匯流而淵。有洛之川。川靈山秀。回環左右。有高而阜。其阜何名。太祖太宗眞宗之陵。惟陵之制。因山而起。隱隱隆隆。惟陵之氣。常王而喜。鬱鬱葱葱。帝懷穹旻。受命我宋。造初于屯。帝念先烈。用欣余家。宣力以勤。赫赫三后。重基累構。旣豐而茂。燕翼貽謀。是惟永圖。其傳在予。曰祖曰宗。有德有功。予實嗣之。克勤克紹。以孝以報。予敢不思。惟此園陵。先后之宅。旣宅且安。後來游止。弗宮弗室。神何以驩。迺得善地。地高惟丘。迺以荆灼。迺訊龜寶。龜告曰。猷。帝命家臣。而職我事。而往惟寅。一毫一絲。給以縣官。無取於民。伐洛之薪。陶洛之土。瓦不病窳。柯我之斧。登我之山。木好且堅。家臣之來。役夫萬名。三年有成。宮成翼翼。在陵之側。須后來格。有門有宇。有廊有廡。有庭有序。殿兮耽耽。黼帷襜褕。天威可瞻。庭兮植植。鉤盾虎戟。容衛以飭。太祖維祖。太宗維弟。眞宗維子。三聖嶷嶷。有以奠位。于此而會。聖兮在天。風馬雲車。其來仙仙。聖會于此。靈威神馭。其宮肅然。聖旣降矣。其誰格之。惟孝天子。聖降當享。其誰來薦。亦孝天子。孝旣克祗。而來胡遲。其下臣修作頌風之。

籍田頌

宋 祁

皇帝再紀元之明年。春二月。率羣臣耕于東郊。恤愷祀。祈豐年也。前此詔書。示有司曰。自我太宗。襲熙厥功。億神裕之。宥命方國。肖翹跂行。亦莫不寧。永惟土著之本。民夫之重。乃躬籍田。以倡農先。震地房之滿。皆導改政之長懋。柔嘉令芳。於是乎孚。胥。鬻。鹵。莽。滅。裂。於是乎復。敦。龐。穗。滯。秉。遺。見。糧。如。坻。我。真。考。因。其。累。盛。重。以。明。德。故。能。步。師。百。萬。狩。醫。閭。見。武。節。高。世。八。九。升。窻。遼。建。元。封。奉。符。隕。祉。以。攄。無。極。肆。余。承。緒。茲。率。厥。典。則。蕪。蕭。布。幣。固。有。常。所。監。農。狎。野。厥。存。舊。章。惟。一。二。執。事。率。循。而。懋。明。之。方。春。作。時。百。穀。華。始。姑。使。斯。人。悅。羽。旄。之。美。重。見。漢。官。後。嗣。諗。稼。穡。之。艱。不。失。夏。物。無。贅。聚。儲。峙。無。煩。勞。供。張。趣。合。于。禮。劭。吾。農。焉。前。期。則。脩。飭。神。壇。按。除。膏。壤。夷。道。如。砥。呼。蹕。填。街。梢。夔。獠。以。護。野。雜。荆。牟。以。守。燎。阡。陌。繡。錯。原。隰。龍。鱗。蒸。膏。冒。檝。協。風。回。春。於。是。旄。頭。先。馳。屬。車。齊。躅。奔。星。舞。於。旗。旂。行。月。捷。於。羽。箠。壽。犀。注。鎧。肅。給。乎。師。營。蒼。虬。范。馭。秋。游。乎。天。轡。瓊。鋌。流。景。金。根。照。塗。帟。幙。周。張。紈。綃。繅。繅。既。而。揉。耒。剡。耜。載。保。介。之。間。先。種。後。稷。龐。播。植。之。器。官。分。無。諉。事。具。不。敖。天。子。乃。以。丙。午。之。旦。升。華。輅。由。太。庭。顏。行。山。則。銜。枚。無。聲。龍。虎。見。象。堪。輿。奔。警。盆。閭。闔。切。囿。游。乃。彷彿。乎。曾。城。之。外。五。精。來。同。七。聖。景。從。鑾。聲。佩。節。次。于。帷。宮。上。既。淳。濯。圭。潔。儲。思。淵。默。昧。明。乃。頓。大。次。款。嘉。壇。索。先。農。以。享。之。因。太。積。以。配。之。血。毛。幽。全。金。石。鏗。訇。躬。接。妥。侑。加。祠。官。之。一。等。禮。重。浚。襲。且。祖。宗。之。遺。意。爾。乃。降。靈。場。儼。朱。紘。物。覩。於。聖。天。健。其。行。星。田。彌。望。紺。幘。儲。駕。洪。縻。序。進。五。步。有。容。三。推。成。禮。邇。臣。告。備。上。曰。朕。志。在。敦。本。寵。其。強。力。可。以。勸。何。憚。於。勤。遂。推。而。進。之。有。司。以。義。固。爭。幾。十。撥。而。後。釋。乃。始。弭。節。容。與。御。夫。觀。耕。之。臺。三。公。羣。后。班。趨。次。耨。靡。然。從。風。邁。五。踰。九。大。農。灑。種。庶。

人終畝。官師鼉抃。行內天旋。于時都人熙熙。駐望皇軒。或歌以壤。或擊于鞀。不圖叢雲之旦。復見東戶之年。日華晏溫。天心馮豫。奉斗極御。應門翔雞。樹竿墜鷓。宣制大賚。四海與之更始。虧除威辟。存問高年。振淹修墜。平僭闊賦。中外百執。告至而策勳。踐過三更。以差而賜帛。膏以解雨。鼓之巽風。不崇朝而周萬國。先是羣臣釋不懿。潤鴻名。將琢之玉版。納于金匱。至是則回雕輿。坐前殿。震照儀矩。翁受典冊。皇皇哉茲禮。真帝世之希闊。臣工之旦暮者歟。儒臣學于舊史。竊明載芟之詩。句師之職。在籍之誼。有三說焉。一典籍之常禮。二籍履以親事。三借民而治之。所言雖殊。要之毆天下之民。棄末而歸本耳。且古者謹察天廟。申赦陽官。田之不闢。辟在司寇。作爲御廩。鍾而藏之。其故何哉。以爲奉薦粢盛。非無良農。不如親之愈也。誰督耘耔。非無猛制。不若勸之善也。夫祭莫大於備物。物備而百神據之。兵莫大於足食。食足而四夷懷之人。莫急於豐財。豐財而有生聚之。是三物之濟否。在此舉也。且周宣缺之。戎軋其衰。漢文用焉。民阜其宜。唐后勤止。以豐易饑。洪惟太宗。光迪于前。陛下述宣于後。皇矣同底於道。烝哉不隕其聲。方且九扈勤民。三事就緒。擬擬其盛。陳陳相因。糧餘可捷。草殖弗與。民一于耜。家萬斯箱。遂駕五帝。軼三王。奮甘膏而搴馨香也。敢作頌曰。

倬彼鮮原。帝籍于田。匪藉其勤。我爲民先。悠悠春旗。脉土于畿。陽膏澤澤。邁乎三推。有壬有林。亦莫不祇。我疆我里。載耘載耔。實苞實阜。蒹蕪豐草。田峻至喜。祈年伊早。我穀用成。我倉旣盈。我倉旣耽。鍾于東南。其用伊何。事神薦馨。爲酒爲醴。爲粢爲盛。蒸之浮浮。釋之洩洩。上帝居歆。降福孔休。降福伊何。我民旣蕃。室家漆漆。三事不設。食足武奮。震疊爾功。蠻夷來同。罔不率從。帝猷昭升。式于九圍。兢兢業業。

以茲萬幾。在豐念匱。在飫思飢。子子孫孫。勿替引之。

明堂頌

宋 祁

臣言。去三月戊子。制詔。季秋有事于明堂。臣以太常與禮官博士詣垂拱殿。議配享事。卽建言。周有臣曰。且始嚴父配天。仲尼是之。唐并諸儒說。並祀六天帝。不敢損。陛下幸訪有司。請如古便。四月乙丑。詔若曰。夫禮稱情適文。今議者言周唐則善。至牽制所聞。褊而不優。宋亦一家。讓不制作。如來嗣何。且事天不及地。配父而遺祖。朕甚陋之。水旱不時。羣神與焉。今賴天之力。方內以治。朕能合饗天地。以三聖侑。臆報百神。咸秩並脩。況祖宗郊雩。不爲無比。有司無諱。以勞務稱朕意。臣伏誦聖訓。久乃開曉。以爲前古所缺。羣臣不逮。陛下獨得於心。其所以事神訓人。使萬世子孫無以加者。至於作聲歌。琢圭邸。帳帟無文。夜鑿弗嚴。以竭恭至誠者。尙數十物。臣愚且不能徧知。若令詩頌不傳。是陛下盛德神功。不盡注天下耳目。聳動四夷。聲隱乎無疆也。謹撰成明堂頌一篇。辭淺義直。可使戶曉。壤翁輶童。皆得塗謳。臣昧死再拜以聞。頌曰。

天有明命。以聖付聖。太祖太宗。燮伐大定。誰僭而王。孰擅而土。左披右攘。罔不就緒。厥角在廷。四夷無侮。眞考顯承。受報收成。休休厥寧。震震厥聲。七十而五。號以大榮。皇帝纂武。有庇于下。兵囊不銛。服委而羽。一農之饑。吾飼以哺。一夫之寒。吾煖以裕。日寬租徭。歲貸囚庾。協氣四薄。順陽若雨。原高隰下。百穀廡廡。二十九載。惟秋九月。迺卽大慶。度筵度室。寶字署顏。震照多物。置使有五。悉詔輔弼。旣款靈宮。亦享廟祏。天兵桓桓。羅列衛營。有闔有旂。龍輓螭衡。耳耳其驅。雅雅于行。旖旎連蜷。風舞雲縈。士若銜

枚。驂牡不鳴。吉日辛亥。進祀于堂。衣畫袞然。環瑤璫。六帝二祇。三后侑旁。醴淳牲肥。嘉罇鉅房。筆醢果粢。靜潔芬香。管熾胖升。以迪厥嘗。我鍾欽欽。我舞俛俛。天妥於坐。百靈來序。奔精哆光。芻霍曾寓。山靈瀆怪。顯幽馳騖。或旅諸墀。或席諸廡。有羶斯飫。相惟辟公。旣敏而度。帝拜稽首。柴煙上舉。祝有嘏言。皇帝受之。產百斯祥。哀萬斯禱。其蟲如山。其積如茨。皇帝曰咨。朕不專有。且御端門。百執奔走。其赦天下。新邦之舊。賙乏錄勞。刮濯痕垢。官賞兵賚。金爵是富。驛歡四海。問弗容晝。天謂皇帝。感實火德。火德在孝。宗祀惟極。其還而功。卹嗣千億。而子而孫。長有萬國。天謂皇帝。安我羣元。投蜚斥螟。稼溢于廩。痼訖疾攘。人樂躑躅。皇帝眉壽。永錫萬年。前祀三日。區霜如閉。皇帝旣齋。一夕而霽。六幘掃除。若塏逢彗。天清地晏。夜星騰晰。皇帝小心。恭與虔并。徧見神祇。拜跪送迎。久立於次。須樂之成。器必全玉。牢不愛牲。制爲諸安。以正和清。夜鼓徹嚴。敷致厥誠。明明皇帝。惟先訓是式。惇威懿親。其磐如石。存問齟齬。容受讜直。振淹登峻。毋或失職。惟慈惟仁。不厲聲以色。皇帝有言。克己則興。豐守吾儉。尊捨吾矜。雖日之升。瞿瞿兢兢。無不此或承。

皇帝神武頌

宋 祁

或稱皇初之世。不賞而勸。不罰而懼。豈簡冊之彌文哉。議者云。否。彼固未識。夫震耀之飭天威。剛健之奮乾體也。粵若聖人。制海內之命。據天位之尊。總秉權綱。章敍典憲。不有威辟。不足以震元愍。不有變容。不足以開至聖。用能消弭殄行。嘉靖多方。闡皇靈。憲宗軌。丕天之大律。一民之至權者已。巨宋在宥。列聖繼統。際天不冒。亘地砥屬。仆威械以去煞。襲道樞以訓儉。恩裕洪暢。容典飭盡。萬寶取足。合祛於皇極。百靈

隕社。震動於珍物。然猶右賢左戚。均權布寵。百辟箴闕。內平而外成。五細在邊。番休而遞上。防檢來患。蠲滌多辟。勤勤懇懇者。非弭亂之謂歟。然而善制未能無敵。有憂所以固國。迺先帝違裕。羣邪濟凶。寄朝家之威。席鈞宰之貴。侔尙方以制器。狎神巫而締紱。乃至易守帥以漸醜圖。徒陵兆而投天隙。拂戾蜚語。恬有姦計。遂欲包禍心以竊發。執左道而干紀。餌梟羹以未盡。礪豺牙而密噬。神靈震赫。姦宄呈露。輔臣建白。醜黨震壞。赤車具獄而來上。凶豎伏質而前死。允恭事敗。先謂伏誅。皇帝陛下。深拱諒闇。覽照前典。重當國之職。慎退人之禮。詔曰。冢宰之任。萬樞所係。今丞相謂自底不令。其上大司徒印綬。於是三事百執。抗疏以請。曰。無將必誅。列辟經制。與衆共棄。常苦無赦。謂今所犯。惡不可聞。願龔天刑。以塞羣議。帝曰。朕不忍致于理。其放於朱崖。然後起跡。弛之臣。明枉結之獄。掎克之貨。附上於官。附離之黨。肆赦一解。漏鯨彗於綱目。推虎吻於市道。浴白日以升景。投紫蜺而霽氛。惡草絕而善苗興。清風翔而羣陰伏。人靈紓憤。道路相趨。既而薦紳之徒。相與喟然。並稱曰。前日末命微梗。孽臣乘閒。潛構不類。陰傾時柄。食椹靡化。指莠待滅。陛下探觀時變。先斷宸慮。倚文母之聖。攬列辟之議。廉考劓殄。介不終日。末減澄洗。蕩無餘灾。定寶業。極南山之安。殲渠魁。易家人之召。智不回慮。惡未旋踵。事已決矣。昔滔天殛而虞功劭。流言放而周德奮。觀闕誅而孔制列。寶瑟僵而漢基永。發撥亂之盛準。長世之懿冊。所由來舊矣。是以烈祖二宗。墾蕝除害。簫勺衆慝。若彼之躋也。太后聖上。建威銷萌。祇遙先訓。如此之備也。宜乎勵無前之景鑠。暢不殺之神武。正春秋謹始之制。釋洪範作威之害。開賜無疆之眉壽。摛著不朽之尊名。此其時矣。蓋天子穆然初載。貶成仰定。未遑論制作之事也。下臣儻擬末品。不足弦次新頌。輒敢述與人之詠。簡康衢之詩。亦擊轅折楊之

比爾其辭曰。

真宗御天。休息羣元。委裘上仙。茂功全兮。皇帝纘務。惟新百度。尙文右武。鴻基固兮。孽豎柄臣。矜權取
勳。興妖放命。託機神兮。上公列辟。協忠宣力。摧兇殄惡。清君側兮。曰恭曰謂。銜刀投裔。神武不殺。退以
禮兮。或附或離。橫貸敷施。脅從罔治。董之威兮。氛開祲收。美澤雲游。荷天鴻休。德旣優兮。昭雪忠良。輿
頌風翔。蚤威舊章。恤無疆兮。

慶曆聖德頌

石介

三月二十一日。大昕。皇帝御紫宸殿。朝百官。相得象殊。拜竦樞密使。夷簡以司徒歸第。二十二日制命。昌
朝。參知政事。弼樞密副使。二十六日勅。除脩靖。素並充諫官。四月八日。皇帝御紫宸殿。朝百官。衍樞密使。
仲淹。琦。樞密副使。乃用御史中丞拱辰。御史邈。御史平。諫官脩。靖。十一疏。追竦。樞密使勅。十三日勅。又除
襄爲諫官。天地人神。昆蟲草木。無不歡喜。皇帝退姦進賢。發於至聰。動於至誠。奮於睿斷。見於剛克。陟黜
之明。賞罰之公也。上視漢魏隋唐五代。凡千五百年。其閒非無聖神之主。盛明之時。未有如此選人之精。
得人之多。進人之速。用人之盡。實爲希闊殊尤。曠絕盛事。在皇帝之德之功。爲卓犖瑰偉。神明魁大。古者
一雲氣之祥。一草木之異。一蹄角之怪。一羽毛之瑞。當時羣臣。猶且濃墨大字。金頭鈿軸。以稱述頌。美時
君功德。以爲無前之休。丕天之績。如仲淹。弼。實爲不世出之賢。求之于古。堯則夔龍。舜則稷契。周則闕散。
漢則蕭曹。唐則房魏。陛下有之。諸臣亦皆今天下之人望。爲宰相諫官者。陛下盡用之。此比雲氣草木。蹄
角羽毛之異。萬萬不侔。豈可翻無歌詩雅頌。以播吾君之休聲烈光。神功聖德。刻于琬琰。流于金石。告于

天地。奏于宗廟。存于萬千年。而無窮盡哉。臣實羞之。臣嘗愛慕唐大儒韓愈爲博士日。作元和聖德頌。千二百言。使憲宗功德。赫奕煒燁。照于千古。至今觀之。如在當日。陛下今日功德。無讓憲宗。臣文學雖不逮韓愈。而亦官於太學。領博士職。歌詩讚頌。乃其職業。竊擬於愈。輒作慶曆聖德頌一首。四言。凡九百六十字。文辭鄙俚。固不足以發揚臣子之心。亦欲使陛下功德。赫奕煒燁。照于千古。萬千年後觀之。如在今日也。臣不勝死罪。臣賤。無路以進。姑藏諸家。以待樂府之采焉。

於維慶曆三年三月。皇帝龍興。徐出闈闔。晨坐太極。晝開闔闔。躬覽賢英。手鋤姦枿。大聲颯颯。震搖六合。如乾之動。如雷之發。昆蟲螭蝮。妖怪藏滅。同明道初。天地嘉吉。初聞皇帝。感然言曰。予父子祖。付予大業。予恐失墜。實賴輔弼。汝得象殊。重慎徽密。君相予久。予嘉君伐。君仍相予。笙鏞斯協。昌朝儒者。學聞該洽。與予論政。傳以經術。汝貳二相。庶績咸秩。惟汝仲淹。汝誠子察。太后乘勢。湯沸大熱。汝時小臣。危言業業。爲予司諫。正予門闥。爲予京兆。聖予讒說。賊叛于夏。往予式遏。六月酷日。大冬積雪。汝暑汝寒。同於士卒。予聞心酸。汝不告之。予明得弼。予心弼悅。弼每見予。無有私謁。以道輔予。弼言深切。予不堯舜。弼自笞罰。諫官一年。奏疏滿篋。侍從周歲。忠力盡竭。契丹亡義。構机饕餮。敢侮大國。其辭慢悖。弼將予命。不畏不懼。卒復舊好。民得食褐。沙磧萬里。死生一節。視弼之膚。霜剝風裂。觀弼之心。鍊金鍛鐵。寵名大官。以酬勞渴。弼辭不受。其志莫奪。惟仲淹弼。一夔一契。天實眷予。予其敢忽。並來弼子。民無嗟札。曰衍汝來。汝子黃髮。事予二紀。毛禿齒豁。心如一兮。率履弗越。遂長樞府。兵政毋蹶。予早識琦。琦有奇骨。其器魁礪。豈視居椽。其人渾樸。不施剗剗。可屬大事。敦厚如敦。琦汝副衍。知人予哲。惟脩惟靖。立朝讞讞。言論礪礪。忠誠特達。

祿微身賤。其志不怯。嘗詆大臣。亟遭貶黜。萬里歸來。剛氣不折。屢進直言。以補予闕。素相之後。含忠履潔。昔爲御史。幾叩予榻。至今諫疏。在予箱匣。襄雖小臣。名聞予徹。亦嘗獻言。箴予之失。剛守粹慤。與脩儔匹。並爲諫官。正色在列。予過汝言。無鉗汝舌。皇帝明聖。忠邪辨別。舉擢俊良。掃除妖魅。衆賢之進。如茅斯拔。大茲之去。如距斯脫。上倚輔弼。司予調燮。下賴諫諍。維予紀法。左右正人。無有邪孽。予望太平。日不逾浹。皇帝嗣位。二十二年。神武不殺。其默如淵。聖人不測。其動以天。賞罰在予。不失其權。恭己南面。退姦進賢。知賢不易。非明不得。去邪惟難。惟斷乃克。明則不貳。斷則不惑。旣明且斷。惟皇之德。羣下踧踖。重足屏息。交相告語。曰。惟正直。毋作側僻。皇帝汝殛。諸侯危慄。墮玉失鳥。交相告語。皇帝神明。四時朝覲。謹脩臣職。四夷走馬。墜鐙遺策。交相告語。皇帝神武。解兵脩貢。永爲屬國。皇帝一舉。羣臣懾焉。諸侯畏焉。四夷服焉。臣願陛下。壽萬千年。

錢鄧州不燒楮鏹頌

呂南公

嗚虜士誠知脩耶。內不欺諸己。外不欺諸人。可與修己已。嗚虜士誠有立耶。上不媿於天。下不怍於地。中不負於神。可謂士君子已。凡唯知修。至於可立。而不欺不媿者。其備如此。雖天地神明。我斯天地神明已。豈又卹卹於諸餘哉。世衰道隱。士心險惑。稔匿自危。則區區於禍福。以壯其毒。聞古之用幣。以禮神祇。後之罪士爲多。則假之以請禱禳祈。假之不已。則繚楮代焉。而弗支。是故罪者滿世。而莫救其非。肅肅鄧州。唯道之繇。識超超於衆。謬行不徇於時。流孰巫祝之足因。而禱祥之苟求。蓋清修而不媿。則萬福之來。酬是何楮鏹之不然。而名位之優優。嗚虜豈弟君子。求福不回。誰其嗣之。宋有人猗。

宋文鑑卷第七十五

贊

擬富民侯傳贊

杜甫贊

西漢三名儒贊

河間獻王贊

無爲贊

晉蔡謨贊

嵇紹贊

畫贊

九馬圖贊

二疏圖贊

偃松屏贊

三馬圖贊

王元之畫像贊

宋文鑑 卷第七十五

張詠

狄遵度

劉敞

司馬光

司馬光

王回

王回

李泰伯

蘇軾

蘇軾

蘇軾

蘇軾

蘇軾

王曾儀真贊

蘇軾

文與可飛白贊

蘇軾

師子屏風贊

蘇軾

管幼安畫贊

蘇轍

王元之真贊

黃庭堅

孔北海贊

陳師道

擬富民侯傳贊

張詠

漢武晚年以丞相爲富民侯。富民，大本也。侯爵勸功也。推尊之若此，將復古王之功歟。嘻！大朴未散，民命在天。風教旣闕，民命在賢。賢不可黷，黷之非賢。先王仁孝以辯之，民不可擾，擾之生弊。先王簡儉以御之，粵自桀作瑤臺，民始知勞。秦易井田，民始知弊。所謂上闕其欲而下散其束，四人桓桓去勞就安，百途鑿鑿。雕僞散朴，衰周之民也。真可哀哉！一作之百取之，斑白不得息，稚齒而趨驅，焦勞力竭而飢凍繼之。浮民姦我利，非賢盜我食，何嘗少得佑助，徒俾日攻之。故謂令德日埋，窮兵亦私。末途喧喧而大本取弊者，於斯也哉！非有大聖正智，其誰拯之歟。漢沈秦弊七十年，武威文經漸被四海，以高祖之仁，文帝之儉，尙不能推民壽鄉功，磨三代，加於武皇事威窮侈，四十年間，民力凋半，亟下富民之詔，尊爲上公之號，憂勞誠思，亦至矣乎！徒知民富而後國昌，不知國正而後民治，吁！不能師三代育民之法，以事末術，良可悲矣。亦由止奔流之舟，雖萬斯篙，未若五尺之纜之要也。□已弊之民，雖百斯術，未若一正其本之□也。嗚呼！

未塗未塞。本弊不正。欲民富國昌者。未之有也。漢雜霸道。史或過矣。余愛其君。有富民之志。臣榮富民之號。又憤不能開通之。因附史氏作贊。以矯之。贊曰。

五后之世。事簡而民靜。夏商周之世。事正而民治。故貧富之名。稀所稱焉。三代之季。四人亂倫。百途競新。蚩蚩餓飢。無階休存之。遂使抱仁義智能者。易以要功於其間。如武皇帝命富民侯。又如何哉。又何哉。

杜甫贊

狄遵度

先生甫名。其字子美。其祖審言。當景龍際。以詩自名。高視一世。逮子美生。其作愈偉。少而不羈。跌宕徙倚。大章短篇。純乎首尾。詩派之別。源遠乎哉。波流沄沄。乃自我回。蹲崑崙巔。足亂四溟。覩縷蛤蜊。拘致鯤鯨。蜿蜒委瑣。巨細雜并。一啜則已。不圖其贏。橫放直出。詭色互端。排蕩推憂。措齒不安。鬼求於陰。神索於陽。鈎搜錯莫。色沮氣傷。閃形撇影。隱露藏蔽。殫變極態。惟厥所指。吾方瞪踞。初不用意。沃粹醇源。植根塊土。貫赫胥庭。盤燧人圃。經亘聯屬。百億萬古。芬釀雜襲。纖細委墜。哺啜蹈藉。郡稚走死。嗚呼。子美之述。吾能誦之。子美之意。吾能知之。子美之意。其所未聞。其所未知。蓋未得其云爲。

西漢三名儒贊

劉 敞

余讀西漢。愛董仲舒。劉向。楊雄之爲人。慕之。然仲舒好言災異。幾陷大刑。向鑄僞黃金。亦減死論。雄仕王莽。作劇秦美新。復投閣求死。皆背於聖人之道。惑於性命之理者也。以彼三子。猶未能盡善才難。不其然與。善其善可師。其過可警也。爲三贊以自覽焉。

仲舒先覺承秦絕學進退規矩金玉其璞發明春秋大義以脩旁及五經博哉優優世莫能庸黜相諸侯仁義所漸易剛以柔茫茫大道在昔聖考蓋有不聞奚究奚討主父掎之仲舒詭之嗟若先生有以啓之懲違告休不預世憂著作孔多後世是逾嗟爾君子克遵厥猷

子政翼翼簡易正直博覽百家以充其德黃金之僞智由信惑艱覩邪世身居困阨不爲俗儒苟取拘拘略其威儀忠質之符疾邪救危著論上書同姓之仁賢哉已夫雖不三事其文實章以迄于今日月之光嗟我後人庶幾不忘

子雲清虛自有大度非聖不觀恥爲章句擬做六經其文孔明隱隱欲欲實爲雷霆世三不遷知命理神胡爲投閣劇秦美新君子之缺衆儒有言蓋天絕之亦何必然末世之人以道邀利或徇耳目得之弗愧嗟爾君子能勿此畏

河間獻王贊

司馬光

周室衰道德壞五帝三王文飄淪散失弃置不省重以暴秦害聖典疾格言燔詩書屠術士稱禮樂者謂之狂惑術仁義者謂之妖妄必薙滅先聖之道響絕迹盡然後慊其志雖有好古君子心誦腹藏壁扇巖鏹濟秦之險以通於漢者萬無一二漢初挾書之律尙存久雖除之亦未曾錄謂之餘事而已則我先王之道餒餒其不息者無幾矣河間獻王生爲帝子幼爲人君是時列國諸侯苟不以宮室相高狗馬相尙則哀姦聚猾僭逆妄圖唯獻王厲節治身愛古博雅專以聖人法度遺落爲憂聚殘補缺校實取正得周官左氏春秋毛氏詩而立之周禮者周公之大典毛氏言詩最密左氏與春秋爲表裏三者不出六藝

不明噫。微獻王六藝。其遂噎乎。故其功烈。至今賴之。且夫觀其人之所好。足以知其心。王侯貴人。不好侈靡而喜書者。固鮮矣。不喜浮辯之書。而樂正道。知之明而信之篤。守之純而行之勤者。百無一二焉。武帝雖好儒。好其名而不好其實。慕其華而廢其實。是以好儒愈於文景。而德業後之。景帝之子。十有四人。栗太子廢而獻王最長。嚮若尊大義。屬重器。用其德。施其志。必無神仙祠祀之頌。宮室觀遊之費。窮兵黷武之勞。賦役轉輸之敝。宜其仁豐義洽。風移俗變。煥然帝王之治。復還其必賢於文景遠矣。嗟乎。天實不欲禮樂復興邪。抑四海自不幸而已矣。

無爲贊

司馬光

爲黃老者。以心如死灰。形如槁木。爲無爲。迂叟以爲不然。作無爲贊。治心以正。保躬以靜。進退有義。得失有命。守道在己。成功則天。爲者敗之。不如自然。

晉蔡謨贊

王回

晉自武帝酒色無度。王公貴人。競以酒色相侈。而王愷。石崇尤甚。愷使美人行酒。勸客飲。不盡。輒殺美人。崇常夜飲。諸少年酒。裴綽乘醉。竊臥崇妾中。明旦。裴家遣車迎綽。綽上車馳去。崇聞大怒。立殺數妾。將訟綽於朝。綽兄楷書請綽曰。吾弟酒狂。海內。知足下飲以狂藥。而反責之禮邪。崇方慕楷。欲交之。亦憚其辭直。乃止。其後。渡江諸君家。往往猶襲故態。紀瞻爲尙書。置酒請王導等觀妓。瞻愛妾能歌新聲。左僕射護軍將軍周顛。乘酒於衆中挑之。而不得。有司劾顛荒酒失儀。元帝特詔宥焉。是時在位。蓋不以淫。爲貶如此。蔡謨獨好禮自勅。嘗詣丞相導。導方作伎。設牀席。謨不悅而去。導亦不留客也。謨曾孫廓。廓子興

宗仍以好禮自勅。達於朝。雖時淫暴。不敢稍侵。牒之人稱其家風云。贊曰。古者牀第之言不踰闕。而賓主燕享。所以觀禮樂。講仁義也。烏有男女亡辨。晝夜荒蠱。羣於禽獸。而反以爲樂歟。此屠餘所以知中山之亡。夫永嘉之亂。又驗矣。而渡江君臣。猶不知以此相儆。豈以風俗之敗。非召亂之著者邪。嗚呼。迷哉。而蔡氏出於其間。獨能世學好禮。達而不汙。君子哉。

嵇紹贊

王回

世皆以嵇紹死得其所褒之。予固愛其人。行於亂世不汙。而能卒以忠爲烈。非其積累明於仁義。孰能自信如此耶。吾獨怪康與晉。實皆爲魏臣。其誅也。豈犯有司。特晉方謀篡魏。忌其賢。而見圖。故康誅而魏亦自亡。若紹可爲兼父與君之仇者也。力不能報。猶且避之天下。顧臣其子孫而爲之死。豈不謬哉。

畫贊

李泰伯

工有圖貴人之像者。予哀其賢而無所遂也。爲之辭云。道之可行。君子乃行。行而無成。君子之疾。位以名得。名以位失。古人丘壑。豈徒自逸。嗚呼。

九馬圖贊

蘇軾

長安薛君紹彭。家藏曹將軍九馬圖。杜子美所爲作詩者也。拳毛獅子。二駿在焉。作九馬圖贊。牧者萬歲。繪者惟霸。甫爲作誦。偉哉九馬。姚宋廟堂。李郭治兵。帝下毛龍。以馭羣英。我思開元。今爲幾日。筋骨應圖。至三萬匹。云何寂寥。跬步山川。負鹽挽磨。淚濕九泉。牝牡驪黃。自以爲至。駁其一毛。弃我千里。蹶齧是乘。脂蠟其鞭。道阻且長。喟其永歎。

二疏圖贊

蘇軾

惟天爲健而不干時。沈潛剛克。以燮和之。於赫漢高。以智力王。凜然君王。師友道喪。孝宣中興。以法馭人。殺蓋韓楊。蓋三良臣。先生憐之。振袂脫屣。使知區區。不足驕士。此意莫陳。千載于今。我觀畫圖。涕一作下沾襟。

偃松屏贊

蘇軾

予爲中山守。始食北嶽松膏。爲天下冠。其木理堅密。瘠而不瘁。信植物之英烈也。謫居羅浮山下。地暖多松。而不識霜雪。如高才勝人。生綺紈家。與孤臣孽子有間矣。士踐憂患。安知非福。幼子過。從我南來。畫寒松偃蓋。爲護首小屏。爲之贊曰。

燕南趙北。大茂之麓。天僵雪峯。地裂冰谷。凜然孤清。不能無生。生此偉奇。北方之精。蒼皮玉骨。磽磽鑿鑿。方春不知。沍寒秀發。孺子介剛。從我炎荒。霜中之英。以洗我瘴。

三馬圖贊

蘇軾

元祐初。上方閉王門關。謝遣諸將。太師文彥博。宰相呂大防。范純仁。建遣諸將游師。雄行邊。敕武備。師雄至熙河。蕃官包順。請以所部熟戶除邊。□□雄許之。遂擒猾羌。大首領鬼章青。宜結以獻。□□皆賀。且遣使告永裕陵。時西域貢馬。首高八尺。龍顛而鳳膺。虎脊而豹章。出東華門。入天駟監。振鬣長鳴。萬馬皆瘖。父老縱觀。以爲未始見也。上方恭默思道。八駿在庭。未嘗一顧。其後圉人起居不以時。馬有弊者。上亦不問。明年羌温溪心有良馬。不敢進。請於邊吏。願以餽太師潞國公。詔許之。蔣之奇爲熙河帥。西蕃有貢駿。

馬汗血者。有司以非入貢歲月。留其使與馬於邊。之奇爲請。乞不以時入。事下禮部。軾時爲宗伯。判其狀云。朝廷方卻走馬以糞。正復汗血。亦何所用。事遂寢。于時兵革不用。海內小康。馬則不過矣。而人少安。軾嘗私請於承議郎李公麟。畫當時三駿馬之狀。而使鬼章青宜結效之。藏于家。紹聖四年三月十四日。軾在惠州。謫居無事。閱舊書畫。追思一時之事。而歎三馬之神駿。乃爲之贊曰。

吁。鬼章世悍驕。奔貳師。走嫫姚。今在廷。服虎貂。效天驥。立內朝。八尺龍神超。遙若將。西燕西瑤。帝念民。乃下招。籥歸雲。逝房妖。

王元之畫像贊

蘇軾

傳曰。不有君子。其能國乎。予嘗三復斯言。未嘗不流涕太息也。如漢汲黯。蕭望之。李固。吳。張昭。唐。魏。鄭公。狄仁傑。皆以身徇義。招之不來。麾之不去。正色而立於朝。則豺狼狐狸。自相吞噬。故能消禍於未形。救危於將亡。使皆如公孫丞相。張禹。胡廣。雖累千百。緩急豈可望哉。故翰林王公元之。以雄文直道。獨立當世。足以追配此六君子者。方是時。朝廷清明。無大姦慝。然公猶不容於中。耿然如秋霜夏日。不可狎玩。至於三黜以死。有如不幸而處於衆邪之間。安危之際。則公之所爲。必將驚世絕俗。使斗筭穿窬之流。心破膽裂。豈特如此而已乎。始予過蘇州虎丘寺。見公之畫像。想其遺風餘烈。口爲執鞭而不可得。其後爲徐州。而公之曾孫汾。爲兗州。以公墓碑示余。乃追爲之贊。以附其家傳云。維昔聖賢。患莫已知。公遇太宗。尤也。其時。帝欲用公。公不少貶。三黜窮山之死。靡憾。咸平以來。獨爲名臣。一時之屈。萬世之信。紛紛鄙夫。亦拜公像。何以占之。有泚其類。公能泚之。不能已之。茫茫九原。愛莫起之。

王仲儀真贊

蘇軾

孟子曰。所謂故國者。非有喬木之謂也。有世臣之謂也。又曰。爲政不難。不得罪於巨室。巨室之所慕。一國慕之。一國之所慕。天下慕之。夫所謂世臣者。豈特世祿之人。而巨室者。豈特侈富之家也哉。蓋功烈已著於時。德望已信於人。譬之喬木。封殖愛養。自拱把以至於合抱者。非一日之故也。平居無事。商功利。課殿最。誠不如新進之士。至於緩急之際。決大策。安大衆。呼之則來。揮之則散者。惟世臣巨室爲能。余嘉祐中。始識懿敏王公於咸都。其後從事於歧。而公自許州移鎮平涼。方是時。虜大舉犯邊。轉運使攝帥事。與副總管議不合。軍無紀律。邊人大恐。聲搖三輔。及聞公來。吏士踴躍傳呼。旗幟精明。鼓角譟亮。虜卽日解去。公至燕。勞將佐而已。余然後知老臣宿將。其功用蓋如此。使新進之士當之。雖有韓白之勇。良平之奇。豈能坐勝默成。如此之捷乎。熙寧四年秋。余將往錢塘。見公於私第。侏老堂。飲酒至莫。論及當世事。曰。吾老矣。恐不復見。子厚自愛。無忘吾言。既去二年。而公薨。又六年。乃作公之真贊。以遺其子。鞏。詞曰。堂堂魏公。配命仁祖。顯允懿敏。維周之虎。魏公在朝。百度維正。懿敏在外。有聞無聲。高明廣大。宜公宜相。如木百圍。宜宮宜堂。天旣厚之。又貴富之。如山如河。維安有之。彼窶人子。旣陋且寒。終勞永憂。莫知其賢。曷不觀此。佩玉劍履。晉公之孫。魏公之子。

文與可飛白贊

蘇軾

嗚呼哀哉。與可豈其多好。好奇也歟。抑其不試。故藝也。始予見其詩與文。又得見其行草篆隸也。以爲止此矣。旣沒一年。而復見其飛白。美哉多乎。其盡萬物之態也。霏霏乎其若輕雲之蔽月。翻翻乎其若長風。

之卷旆也。猗猗乎其若遊絲之縈柳絮。裊裊乎其若流水之舞荇帶也。離離乎其遠而相屬。縮縮乎其近而不隘也。其工至於如此。而余乃今知之。則余之知與可者。固無幾。而其所不知者。蓋不可勝計也。嗚呼哀哉。

師子屏風贊

蘇軾

潤州甘露寺有唐李衛公所留陸探微畫師子板。余自錢唐移守膠西。過而觀焉。使工人摹之。置公堂中。且贊之曰。

圓其目。仰其鼻。奮髯吐舌。威見齒。舞其足。前其耳。左顧右擲。喜見尾。雖猛而和。蓋其戲。嚴嚴高堂。護燕几。啼呼顛沛。走百鬼。嗟乎妙哉。古陸子。

管幼安畫贊

蘇轍

余自龍川以歸。居潁邑。十有三年。杜門幽居。無以自適。稍稍取舊書閱之。將求古人而與之友。蓋於三國得一焉。曰管幼安。蓋幼安少而遭亂。渡海居遼東。三十七年而歸。歸于田廬。不應朝命。年八十有四而沒。功業不加於人。而余獨何取焉。取其明於知時。而審於處己云爾。蓋東漢之衰。士大夫以風節相尚。其立志行義。賢於西漢。然時大亂。其出而應世。鮮有能自全者。潁川荀文若。以智策輔曹公。方其擒呂布。斃袁紹。皆談笑而辦其才。與張子房比。然至九錫之議。卒不能免其身。彭城張子布。忠亮剛簡。事孫氏兄弟。成江東之業。然終以直不見容。力爭公孫淵事。君臣之義幾絕。平原華子魚。以德量重於曹氏。父子致位三公。然曹公之殺伏后。子魚將命。至破壁出后而害之。汝南許文休。以人物臧否聞於世。晚入蜀。依劉璋。先

主將克成都。文休逾城出降。雖卒以爲司徒。而蜀人鄙之。此四人者。皆一時賢人也。然直己者。終害其身。而枉己者。終喪其德。處亂而能全。非幼安而誰與哉。舊史言幼安雖老不病。著白帽。布襦袴。布褰宅後數十步。有流水。夏暑。能策杖臨水。盥手足。行園囿。歲時祀其先人。絮帽布單衣。薦跪。跪拜成禮。余欲使畫工。以意髣髴畫之。昔李公麟喜畫。有顧陸遺思。今公麟死久矣。恨莫能成吾意者。姑爲之贊曰。幼安之賢。無以過人。余獨何以謂賢。賢其明於知時。審於處己。以能自全。幼安之老。歸自海東。一畝之宮。閉不求通。白帽布褰。舞雩而風。四時烝嘗。饋奠必躬。八十有四。蟬蛻而終。少非漢人。老非魏人。何以命之。天之逸民。

王元之眞贊

黃庭堅

天錫王公。佐我太宗。學問文章。致于匪躬。四方來庭。上稍宴衍。公含瓦石。責君堯舜。采芝商洛。以切直去。惟是文章。許以獨步。白髮還朝。泣思軒轅。雞犬地鼎。羣飛上天。眞宗好文。且大用公。太阿出匣。公挺其鋒。龍怒鱗逆。在庭岌岌。萬物並流。砥柱中立。古之遺直。叔向以之。嗚呼王公。其尙似之。

孔北海贊

陳師道

世以曹操爲英雄。雖孫仲謀。甘出其下。而文舉以犬豕視之。豈知不免而遂不屈。蓋其高明下視之耳。方操微時。幸許劭之目。以爲重。匈奴使來。自謂不稱。而代捉刀。其自處如此。至其自比劉玄德。謂袁紹不足數。特居勢使然耳。玄德之死。謂孔明曰。如嗣子不肖。君自取之。其勤勞一世。蓋不爲漢計。豈爲子孫計哉。操非其比也。操惡禰衡。而畏殺士之名。故以衡予劉表。不以文舉與人。卒自殺之。其口畏之亦至矣。劉毅

家徒四壁。一擲百萬。世亦以爲英雄。小遇鵝炙。丐乞如奴婢。孰謂英雄。而以一櫛動其心哉。此其操之類乎。子曰。根也慾焉得剛。剛者所以制欲。非勝人也。是故自用之謂英。自勝之爲彊。

宋文鑑卷第七十六

碑文

唐狄梁公碑文

范仲淹

成都府新建漢文翁祠堂碑文

宋 祁

文潞公家廟碑文

司馬光

澶州靈津廟碑文

孫 洙

唐狄梁公碑文

范仲淹

天地閉。孰將闢焉。日月蝕。孰將廓焉。大廈仆。孰將起焉。神器墜。孰將舉焉。巖巖乎克當其任者。惟梁公之偉歟。公諱仁傑。字懷英。太原人也。祖宗高烈。本傳在矣。公爲子極。于孝爲臣極。于忠。忠孝之外。揭如日月者。敢歌于廟中。公嘗赴并州。掾過太行山。反瞻河陽。見白雲孤飛。曰。吾親在其下。久而不能去。左右爲之感動。詩有陟岵陟屺。傷君子于役。弗忘其親之深。吁嗟乎。孝之至也。忠之所繇生乎。公嘗以同府掾。當使絕域。其母老疾。公謂之曰。奈何重太夫人萬里之憂。詣長史府。請代行。時長史司馬方毗睡不協。感公之義。歡如平生。吁嗟乎。與人交而先其憂。況君臣之際乎。公爲大理寺丞。決諸道滯獄萬七千人。天下服其平。武衛將軍權善才坐伐昭陵栢。高宗命戮之。公抗奏不屈。上怒。曰。彼致我不孝。左右口公。令出。公前曰。陛下以一樹而殺一將軍。張釋之所謂假有盜長陵一抔土。則將何法以加之。臣豈敢奉詔。陷陛下於不

道。帝意解。善才得恕死。吁嗟乎。執法之官。患在少恩。公獨愛君以仁。何所存之遠乎。高宗幸汾陽。宮道出。妬女祠下。彼俗謂盛服過者。必有風雷之災。并州發數萬人。別開御道。公爲知頓使。曰。天子之行。風伯清塵。雨師灑道。彼何害哉。遽命罷其役。又公爲江南巡撫。使奏毀淫祠千七百。所存惟夏禹。太伯。季子。伍員。四廟。安使無功血食。以亂明哲之祠乎。吁嗟乎。神猶正之。而況於人乎。公爲寧州刺史。能撫戎夏。郡人紀之碑文。及遷豫州。會越王亂。後緣坐七百人。籍沒者五千口。有使促行刑。公緩之。密表以聞。曰。臣言似理。逆人不言。則辜陛下好生之意。表成復毀。意不能定。彼咸非本心。唯陛下矜焉。勅貸之。流于九原郡。道出寧州。舊治。父老迎而勞之。曰。我狄使君。活汝輩耶。相攜哭于碑下。齋三日而去。吁嗟乎。古謂民之父母。如公則過焉。斯人也。死而生之。豈父母之能乎。時宰相張光輔。率師平越王之亂。將士貪暴。公拒之不應。光輔怒。曰。州將忽元帥耶。對曰。公以三十萬衆除一亂臣。彼脅從輩。聞王師來。乘賊而降者。萬計。公縱暴兵。殺降以爲功。使無辜之人。肝膽塗地。如得尙方斬馬劍。加於君頸。雖死無恨。光輔不能屈。奏公不遜。左遷復州刺史。吁嗟乎。孟軻有言。威武不能挫。是爲大丈夫。其公之謂乎。爲地官侍郎。同鳳閣鸞臺平章事。爲來俊臣誣。構下獄。公曰。大周革命。萬物惟新。唐朝舊臣。甘從誅戮。因家人告變。得免死。貶彭澤令。獄吏嘗柳公。誣引楊執柔。公曰。天乎。吾何能爲。以首觸柱。流血被面。彼懼而謝焉。吁嗟乎。陷穽之中。不義不爲。況廟堂之上乎。契丹陷冀州。起公爲魏州刺史。以禦焉。時河朔震動。咸驅民保郭。郭公至。下令曰。百姓復爾業。寇來。吾自當之。狄聞風而退。魏人爲之立碑。未幾入相。請罷戍。疏勒等四鎮。以肥中國。又請罷安東。以息江南之饋輸。識者韙之。北狄再寇。趙定問。出公爲河北道元帥。狄退。就命公爲安撫大使。前爲突厥所

脅從者咸逃散山谷。公請曲赦河北諸州。以安反側。朝廷從之。吁嗟乎。四方之事。知無不爲。豈虛尙清談而已乎。公在相日。中宗幽房陵。則天欲立武三思爲儲嗣。一日問羣臣可否。衆稱賀。公退而不答。則天曰。迺有異議乎。對曰。有之。昨陛下命三思募武士。歲時之間數百人。及命廬陵王代之。數日之間。應者十倍。臣知人心未厭唐德。則天怒。令策出。又一日。則天謂公曰。我夢雙陸不勝者何。對曰。雙陸不勝。宮中無子也。復命策出。又一日。則天有疾。公入問閣中。則天曰。我夢鸚鵡雙折翅者何。對曰。武者陛下之姓。相王廬陵王。則陛下之羽翼也。是可折乎。時三思在側。怒發赤色。則天以公屢言不奪。一旦感悟。遣中使密召廬陵王。矯衣而入。人無知者。乃坐公于簾外而問曰。我欲立三思。羣臣無不可者。惟俟公一言從之。則與卿長保富貴。不從則無復得與卿相見矣。公從容對曰。太子天下之本。本一搖而天下動。陛下以一心之欲。輕天下之動哉。太宗百戰取天下。授之子孫。三思何與焉。昔高宗寢疾。令陛下權親軍國。陛下奄有神器。數十年。又將以三思爲後。如天下何。且姑與母執親。子與姪執近。立廬陵王。則陛下萬歲後。享唐之血食。立三思。則宗廟無祔姑之禮。臣不敢愛死以奉制。陛下其圖焉。則天感泣。命褰簾使廬陵王拜曰。今日國老與汝天子。公哭於地。則天命左右起之。拊公背曰。豈朕之臣。社稷之臣也。已而奏曰。還宮無儀。孰爲太子。復置廬陵王於龍門。備禮以迎。中外大悅。吁嗟乎。定天下之業。斷天下之疑。其至誠至神。雷霆之威。不得而變乎。則天嘗命公擇人。公曰。欲何爲。曰。可將相者。公曰。如求文章。則今宰相李嶠。蘇味道足矣。豈文士齷齪。思得奇才以成天下之務乎。荊州長史張柬之。眞宰相才。誠老矣。一朝用之。尙能竭其心。乃召拜洛州司馬。他日又問人於公。對曰。臣前言張柬之。雖遷洛州。猶未用焉。改秋官侍郎。及召爲相。果能誅張

易之輩。返正中宗。復則天爲皇太后。吁嗟乎。薄文華。重才實。其知人之深乎。公之勳德。不可殫言。有論議數十萬言。李邕載之別傳。論者謂松栢不夭。金石不柔。受於天焉。公爲大理丞。抗天子而不屈。在豫州日。拒元帥而不下。及居相公。而能復廢主。以正天下之本。豈非剛正之氣。出乎誠性。見于事業。當時優遊薦紳之中。顛而不扶。危而不持者。亦何以哉。仲淹貶守鄱陽。移丹徒郡。道過彭澤。謁公之祠而述焉。又系之云。商有三仁。弗救其滅。漢有四皓。正於未奪。嗚呼。武暴如火。李寒如灰。何心不隨。何力可回。我公哀傷。拯天之亡。逆長風而孤鶩。遡大川以獨航。金可革。公不可革。孰爲乎剛。地可動。公不可動。孰爲乎方。一朝感通。羣陰披攘。天子旣臣而皇。天下旣周而唐。七世發靈。萬年垂光。噫。非天下之至誠。其孰能當。

成都府新建漢文翁祠堂碑

宋 祁

蜀之廟食千五百年不絕者。秦李公冰。漢文公翁兩祠而已。冰爲蜀鑿離堆。逐悍水以溉。所及常無旱年。西人德之。因言冰身與水怪鬪。怪不勝死。自是江無暴流。蛟蜃怖藏。人恬以生。故侈大房殿。歲擊羊豕。雉魚。伐鼓嘯籥。傾數十州之人。人得侍祠。奔走鼓舞。以悅娛神。祝已傳嘏。而後敢安。翁之治蜀。開學校。以詩書教人。澡熨故俗。長少親親。尊尊百姓。順賴其後。司馬相如。王褒。楊雄。以文章倡。張寬。以博聞顯。嚴遵。李仲元。以有道稱。何武。入爲三公。漢家號令典章。赫然與三代等。蜀有儒自公始。班固言之旣詳。初公爲禮殿。以舍孔子及七十二子之象。殿右廡。作石室。舍公象於中。晚漢學焚。有守曰高朕。能興完之。後人又作朕象。進偶公室。歲時長吏。率掾屬諸生。奉籩豆饗醪。薦之于前。虔踴謹潔。一再奠而退。辭無敢不信焉。冰以功。公以德。功易見。德難知。故祀雖偕。而優狹異焉。嘉祐二年。予知益州。往款公祠。至則區位湫偃。

埃蝕垢蒙不稱所聞。大懼禮益懈忽。神弗臨享。其明年乃占學宮之西。攻位鳩工。弗亟弗遲。作堂三楹。張左右序。及獻廡。大抵若干間。布尋以度堂。累常以度廷。疏窻以快顯。壯闔以嚴閉。采有青丹。陛有級夷。瓦密棟彊。若棘若飛。乃肖公象於宇間。繪相如等于東西壁。本古學之復。莫右朕。本今學之盛。莫若樞密直學士蔣公堂。故繪二公於其間。皆配祠焉。於是擇日告成于神。揖而升。簠罍果滫。脯修紛羅。而有容。可以告虔。趨而降。疊罇巾洗。席燎並施。而不恩。可以盡儀。相者循循。任者舒舒。禮生於嚴。廣靈安於閒寂。故也。噫。自公之來。蜀之人自視若鄒魯。宋與名臣鉅公。踵相逮于朝。先帝時。巨盜再作亂。弄庫兵。爭劍閣。是時蜀豪英無一污賊者。羣頑愁窘。不容喘而滅。非人好忠。家知孝使然耶。所使然者。不自公歟。傳曰。非此族也。不在祀典。公在之矣。則是祠之作。願自予而古。無俾壞息云。祠之興。同尙之賢。則轉運使趙抃及提點刑獄使者凡三人。贊輔之勤。自通判軍州事祝諮以降。六人。營董之勞。自兵馬都監毛永保而下。二人。咸畫象於西廡。列官里於石陰。銘曰。

公二千石。兮守大邦。冠峩峩兮紱斯皇。出有瑞節兮車騎羅。石室孔卑兮人謂何。新堂翼兮耽耽。庭廣直兮序巖巖。吏奉承兮□□。神來格兮此其家。儼羣賢兮並陳。公所教兮如其仁。庖魚挺兮俎肉鮮。神來享兮憺蜿蜒。公教在人兮無有頗。蜀賢不乏才日多。俗祥順兮孝慈。公祀百世兮庸可知。

文潞公家廟碑文

司馬光

先王之制。自天子至于官師。皆有廟。君子將營宮室。宗廟爲先。居室爲後。及秦非笑聖人。蕩滅典禮。務尊君卑臣。於是天子之外。無敢營宗廟者。漢世公卿貴人。多建祠堂於墓所。在都邑則鮮焉。魏晉以降。漸復

廟制。其後遂著爲令。以官品爲所祀世數之差。唐侍中王珪不立私廟。爲執法所糾。太宗命有司爲之營構。以恥之。是以唐世貴臣皆有廟。及五代蕩析。士民求生有所未遑。禮頹教墜。廟制遂絕。宋興。夷亂蘇疲。久而未講。仁宗皇帝閔羣臣貴窮公相而祖禰食于寢。儕於庶人。慶曆元年。因郊祀赦。聽文武官依舊式立家廟。令雖下有司莫之舉。士大夫亦以耳目不際。往往不知廟之可設於家也。皇祐二年。天子宗祀禮成。平章事宋公奏言。有司不能推述先典。明諭上仁。因循顧望。遂踰十載。緣偷襲弊。殊可嗟憫。臣嘗因進對。屢聞之聖言。謂諸臣專殖第產。不立私廟。睿心至意。形于嘆息。蓋由古今異宜。封爵殊制。因疑成憚。遂格詔書。請下禮官儒臣議定制度。於是翰林承旨而下。共奏請自立章事以上。立四廟。東宮少保以上。三廟。其餘器服儀範。俟更參酌以聞。是歲十二月。詔如其請。既而在職者違慢相伏。迄今廟制卒不立。公卿亦安故習常。得諉以爲辭。無肯唱衆爲之者。獨平章事文公首奏。乞立廟河南。明年七月。有詔可之。然尙未知築構之式。靡所循依。至和初。西鎮長安。訪唐廟之存者。得杜歧公舊迹。止餘一堂四室。及旁兩翼。嘉祐元年。始倣而營之。三年。增置前兩廡及門。東廡以藏祭器。西廡以藏家譜。祔在中門之右。省牲展饌。滌濯在中門之左。庖廚在其東南。其外門再重。西折而南出。四年秋。廟成。公以入輔出藩。未嘗踰時安處于洛。元豐三年秋。留守西都。始釁廟而祀焉。一旦授光以家譜曰。予欲志族世之所從來。及廟之所由立。垂示後昆。而爲我敘其事。款于石。光竊惟公追遠復古。率禮興化之盛德。不可以無傳。雖自知不文。不敢辭。謹敘而銘之。按譜云。文氏之先。出陳公子完。以諡爲氏。與翼祖諱同。至秦有丕。丕生河東太守教。教家平陽。其後言韶。漢末爲揚州刺史。自韶以來。世乃可譜。韶之六世孫頻。後魏末爲太守。頻曾孫顯雋。以別駕

從北齊高祖起晉州。就霸業。戰功居多。終兗州刺史。頻之六世孫。曰肅。曰君洪。肅仕隋爲潁川郡丞。名列循吏。以公直抗宇文述。老卑秩。君洪從唐高祖起晉陽。爲右衛將軍。太子建成餘黨攻宮門。君洪首奮挺出戰。沒。頻之八世孫。曰暉。曰播。暉相中宗。誅張易之。奪武后天下歸之。唐用仇人讒。謫死嶠南。播有史學。官至給事中。君洪之曾孫羽。爲御史中丞。肅之四世孫括。爲御史大夫。括孫晦。爲太子賓客。晦兄昕。爲義成節度使。暉爲散騎常侍。榮冠當時。自顯雋至晦。皆有傳。見於史。其家自平陽。或遷太平。或遷蒲阪。或遷寶鼎。晦之從父昆弟晤。爲北都留守判官。始居介休。晤生汾州參軍棧。棧生館。館生澤州錄事參軍。卽公之高祖考也。諱沼。曾祖考諱某。仕後唐。歷晉城。天池。平城三主簿。避晉高祖諱。更其氏曰文。歷崞。太谷二令。漢高祖卽位。復舊氏。更名某。漢失天下。其支別者。自帝於晉陽。復事之。終嵐州錄事參軍。祖考諱某。辟石州幕府。棄官歸鄉里。太宗皇帝平晉陽。召之不起。以廟諱故。復爲文氏。考諱某。以儒學進。歷十三官。所至以彊直勤敏。振利攘害名。聞達不可掩。判三司。開拆磨勘司。終主客郎中。河東轉運使。其治行之詳。見於故平章事晏公參知政事王公所撰墓誌及碑。公貴。朝廷褒榮三代。贈官皆至太師。中書令兼尙書令。爵燕。周。魏三國公。廟成。澤州府君爲第一室。夫人某氏配。燕公爲第二室。燕國太夫人宋氏配。周公爲第三室。周國太夫人王氏。越國太夫人郭氏配。魏公居東室。魏國太夫人耿氏。魯國太夫人申氏配。公以廟制未備。不敢作主。用晉荀安昌公祠制。作神板。采唐周元陽議。祀以元日。寒食。秋分。冬夏至。致齋一日。又以或受詔之四方。不常其居。乃酌古諸侯。載遷主之義。作車奉神版以行。此皆禮之從宜者也。其銘曰。鬱彼喬木。茂于苞根。浩彼長川。發于浚源。矧人之先。云誰敢諉。天佑有宋。誕生哲臣。乃幹樞軸。乃秉鎔鈞。

克釐克諧。允武允文。甘陵有妖。悖暴紛囂。公往逍遙。不日而消。仁祖遘疾。羣心震慄。公入密勿。四海清謐。出殿方維。爲諸侯師。以惠以綏。不廢其威。至也民悅。去也民思。其思如何。式謠且歌。歌政之和。在洛爲多。謀居之安。疇如得民。公自汾渚。遷于洛澗。允樂茲土。永燕私處。伊水洋洋。山木蒼蒼。是掄是劇。是斷是斲。達于有洛。是相是虞。是卜是諏。是築是楸。是植是扶。是茨是塗。此廟渠渠。新廟旣成。室家是營。公曰。子居風雨。是懼。勿侈功崇。子躬是容。人庫公堂。公曰。子康。人隘公庭。公曰。子寧。人勿予隘。維子孫是賴。人勿子庫。維子孫是利。克恭克儉。子履予視。俾躬之爲美。匪目之爲麗。廟堂旣闢。四室有血。象牲孔碩。導黍及稷。豆籩旣滌。掃洒旣備。旨酒旣沛。刲牲爲饋。乃薦乃陳。苾苾芬芬。祖考欣欣。百嘏來臻。天錫公社。強明壽愷。帝錫公祿。崇榮豐泰。天匪公私。公德是宣。帝匪公優。公德是醜。公拜稽首。揚天子之休。思純終始。式詒孫子。子子孫孫。勿替勿忘。時奉烝嘗。保公之烈光。

澶州靈津廟碑文

孫洙

熙寧十年秋。大雨霖。河洛皆溢。濁流洶湧。初懷孟津浮梁。又北注汲縣。南泛胙城。水行地上。高出民屋。東郡左右。地最迫隘。土尤疏惡。七日乙丑。遂大決於曹材下埽。先是積年稍背去。吏惰不虔。槌積不厚。主者又多以護埽卒。給它役。在者十纔一二。事失備豫。不復可補塞。隄南之地。斗絕三丈。水如覆盎。破缶從空中下。壬申。澶淵以河絕流聞。河旣盡徙而南。廣深莫測。圻岸東匯于梁山。張澤灤。然後派別爲二。一合南清河以入于淮。一合北清河以入于海。大川旣盈。小川皆潰。積潦猥集。鴻洞爲一。凡灌郡縣九十五。而濮齊鄆徐四州爲尤甚。壞官亭民舍。鉅數萬。水所居地。爲田三十萬頃。天子哀憫元元。爲之旰食。初遣公府

據往俾之循視。又遣御史往。委之經制。虛倉廩。開府庫。以振救之。徙民所過無得呵。吏謹視遇。不使失職。假官地予民。使之耕。而民不至於太轉徙。質私牛於官。貸之牛。而牛不至於盡殺食。其蠲除約省。勞來安集。凡以除民疾苦。其事又數十。然後人得不陷於死亡矣。天子乃與公卿大議塞河。初獻計者。有欲因其南潰。順水所趨。築爲隄。河輸入淮海。天子按圖書。準地形。覽山川。視水勢。以謂河所泛溢。綿地數州。其利與害。可不熟計。今乃欲捐置舊道。創立新防。棄已成而就難冀。憚暫費而甘長勞。夾大險。絕地利。使東土之民爲魚鼈食。謂百姓何。國家之事。固有費而不可省。勞而不獲已者也。天贊聖德。聖與神謀。詔以明年春。作始修塞。乃命都水吏考事期。審功用。計徒庸。程畚築。峙餼糧。伐薪石。異時治河。皆戶調健民。多賤鬻貨產。巧爲逃匿。上慮人習舊常。而肯動以浮言也。先期戒轉運使。明諭所部。告之以材出於公。秋毫不以煩民。然後民得安堵矣。物或闕供。皆厚價和市。材須徙運。皆官給僦費。唯是丁夫古必出於民者。乃賦諸九路。而以道里爲之節適。凡郡去河頗遠者。皆免其自行。而聽其輸錢以雇更。則衆雖費可不至於甚病。而役雖勞可不至於甚疲矣。材旣告備矣。工旣告聚矣。明年立號元豐。天子遣官以牲玉祭于河。而以閏正月丙戌首事。方河盛決時。廣六百步。旣更冬春。益侈大。兩涘之間。遂踰千步。始於東西。簽爲隄。以障水。又於旁側。闕爲河。以脫水。流渠爲雞距。以灑水。橫水爲鋸牙。以約水。然後河稍就道。而人得奏功矣。旣左右隄疆。而下方益傷矣。初。初河深得一丈八尺。白水深至百一十尺。奔流悍甚。薪且不屬。士吏失色。主者多疾置聞。請調急夫。盡徹諸埽之儲。以佐其乏。天子不得已。爲調於旁近郡。俾得蠲來歲春夫。以紓民。又以廣固壯城卒數千人。往奔命。悉發近埽積貯。而又所蓄薦食藁數十萬。以赴之。詔切責塞河吏。於是人

益竭作。吏亦畢力。俯瞰回淵。重埽九緝。而夾下之。四月丙寅。河槽合。水勢頗却。而埽下湫流尙駛。隄若浮。寓波上。萬衆環視。莫知所爲。先是。運使創立新意。制爲橫埽之法。以遏絕南流。至是。天子猶以爲意。屢出細札。宣示方略。加精致誠。潛爲公禱。祥應感發。若有靈契。五月甲戌朔。新隄忽自定。武還北流。奏至。羣臣入賀。告類郊廟。勞饗官師。遂大慶賜。自督師而下。至于勤事小吏。殫器幣各有差。第功爲三品。各以次增秩焉。漢齊鄆徐四州守臣。以立隄救水。城得不沒。皆賜璽加獎。吏卒自下。捷至竣事而歸。凡特支庫錢者。四初。天子閔徒之遭癘者。連遣太醫十數輩往救治之。以車載藥而行。春尙寒。賜以襦袍。天初暑。給以臺笠。人悅致力。用忘其勞。於是。又命籍其物。故者厚。以分卹其家。逃亡者聽自出。以貫編戶。乘急出夫者。蠲春徭一歲有半。仁沾而恩洽矣。自役興。至于隄合。爲日一百有九。丁三萬。官健作者無慮十萬人。材以數計之。爲一千二百八十九萬。費錢米合三十萬。隄百一十有四里。詔名堤曰靈平。立廟曰靈津。歸功于神也。方天子憂埽於合未固。水道內訌。上下惴恐。俄有赤蛇游于埽上。吏置蛇于盆。祝而放之。蛇亡而河塞。天子聞而異之。命褒神以顯號。而領于祠官。曲加禮焉。有詔。臣洙作爲廟碑。以明著神貺。臣洙竊迹漢唐而下。河決常在於曹衛之域。而列聖以來。泛澶淵爲尤數。雖時異患殊。而成功則一。然必曠歲歷年。窮力殫費。而後僅有克濟。固未有洪流橫潰。經費移徙。不踰二年。一舉而能塞者也。何則。孝武瓠子。甚可患也。考今所決。適值其地。而害又逾於此焉。然宣房之塞。遠逾三十年。費累億萬計。乃至於天子親臨。沈玉從官。咸使負薪。作爲歌詩。深自鬱悼。其爲艱久。亦已甚矣。視往揆今。則知聖功博大。閱遠古未有也。嗚呼。河之爲利害大矣。功定事立。夫豈易然哉。主吏誠能揆明詔。規永圖。不苟務裁費。徑役以日爲功。而使官無

曠職。卒無乏事。繕治廢隄。常若水至。庶幾河定民安。無決溢之患矣。臣洙既奉詔爲廟金石刻。因得述明天子所以禦災捍患。計深慮遠。獨得於聖心。而成是殊尤絕迹。遂及治河曲折。在官調度。與夫小大獻力。內外協心。概見其□。使後世有考焉。臣洙謹拜手稽首而獻文曰。

渾渾河源。導自積石。逆折而東。久輒羨溢。維古神禹。行水地中。順則所適。不爲防庸。降及戰國。瀕齊趙魏。陂障以流。與水爭地。醜爲之渠。利用灌漑。水無所由。因數爲敗。由漢迄今。千三百歲。出地而行。患又滋大。明明天子。纘堯禹服。恩均蠻貊。澤潤草木。丁巳孟秋。淫雨漏河。河徙而南。千里濤波。天子曰咨。水實傲予。勤民之力。其得已乎。申命羣司。鳩材庀工。上志先定。庶言則同人。樂輸費□。遺力聖誠。感通河卽順塞。鉅野旣瀦。淮泗旣道。川無狂瀾。民得烝罩。東土其乂。徐方復寧。芒芒原隰。旣夷且平。水所漸地。更爲沃野。人恣田牧。施及牛馬。盈寧士女。相與歌呼。徵我聖功。人其爲魚。四郡守臣。舞蹈上章。徵我聖功。城其爲隍。帝釐山川。魚獸咸若。萬方歸之。如水赴壑。凡厥士吏。迨及庶民。其謹護視。烝徒孔勤。維是湯河。作固京室。在庭□□。聖獨前識。九類攸斂。六府允脩。丕冒日出。覃被海陬。歸惠爾□□。新廟春秋承祀。以祈靈保。

臣□
缺原

宋文鑑卷第七十七

碑文

表忠觀碑文

上清儲祥宮碑文

伏波將軍廟碑文

記

來賢亭記

待漏院記

竹樓記

河南縣尉廳壁記

亳州法相禪院鍾記

靜勝亭記

庭莎記

岳陽樓記

桐廬郡嚴先生祠堂記

宋文鑑 卷第七十七

蘇軾 蘇軾 蘇軾

柳開

王禹偁

王禹偁

張景

穆脩

穆脩

晏殊

范仲淹

范仲淹

表忠觀碑文

蘇軾

熙寧十年十月戊子。資政殿大學士右諫議大夫知杭州軍州事臣抃言。故吳越國王錢氏墳廟。及其父祖妃夫人子孫之墳。在錢塘者二十有六。在臨安者十有一。皆蕪廢不治。父老過之有流涕者。謹按故武肅王鏐。始以鄉兵破走黃巢。名聞江淮。復以八都兵討劉漢宏。并越州。以奉董昌。而自居於杭。及昌以越叛。則誅昌而并越。盡有浙東西之地。傳其子文穆王元瓘。至其孫忠顯王仁佐。遂破李景兵。取福州。而仁佐之弟忠懿王俶。又大出兵攻景。以迎周世宗之師。其後卒以國入覲。三世四王。與五代相終始。天下大亂。豪傑蜂起。方是時。以數州之地。盜名字者。不可勝數。既覆其族。延及于無辜之民。罔有子遺。而吳越地方千里。帶甲十萬。鑄山煮海。象犀珠玉之富。甲於天下。然終不失臣節。貢獻相望於道。是以其民至於老死。不識兵革。四時嬉遊。歌鼓之聲相聞。至于今不廢。其有德於斯民甚厚。皇宋受命。四方僭亂。以次削平。而蜀江南。負其嶮遠。兵至城下。力屈勢窮。然後束手。而河東劉氏。百戰守死。以抗王師。積骸爲城。醜血爲池。竭天下之力。僅乃克之。獨吳越不待告命。封府庫。籍郡縣。請吏于朝。視去其國如去傳舍。其有功於朝廷甚大。昔竇融以河西歸漢。光武詔右扶風脩理其父祖墳塋。祠以太牢。今錢氏功德。殆過於融。而未及百年。墳廟不治。行道傷嗟。甚非所以勸獎忠臣。慰答民心之義也。臣願以龍山廢佛祠。曰妙因院爲觀。使錢氏之孫爲道士。曰自然者居之。凡墳廟之在錢塘者。以付自然。其在臨安者。以付其縣之淨土寺僧。曰道微。歲各度其徒一人。使世掌之。籍其地之所入。以時脩其祠宇。封殖其草木。有不治者。縣令丞察之。甚者易其人。庶幾永終不墜。以稱朝廷待錢氏之意。臣抃昧死以聞。制曰可。其妙因院。改賜名曰表忠觀。銘

曰。天目之山。茗水出焉。龍飛鳳舞。萃于臨安。篤生異人。絕類離羣。奮挺大呼。從者如雲。仰天誓江。月星晦蒙。強弩射潮。江海爲東。殺宏誅昌。奄有吳越。金券玉冊。虎符龍節。大城其居。包落山川。左江右湖。控引島巒。歲時歸休。以燕父老。擘如神人。玉帶毬馬。四十一年。寅畏小心。厥筐相望。大貝南金。五朝昏亂。罔讎託國。三王相承。以待有德。旣獲所歸。弗謀弗咨。先王之志。我維行之。天胙忠孝。世有爵邑。允文允武。子孫千億。帝謂守臣。治其祠墳。毋俾樵牧。愧其後昆。龍山之陽。歸焉新宮。匪私于錢。唯以勸忠。非忠無君。非孝無親。凡百有位。視此刻文。

上濟儲祥宮碑

蘇軾

元祐六年六月丙午。制詔臣軾。上清儲祥宮成。當書其書之石。臣軾拜手稽首言曰。臣以書命待罪北門。記事之成。職也。然臣愚不知宮之所以廢興。與凡材用之所從出。敢昧死請。乃命有司具其事。以詔臣軾。始太宗皇帝以聖文神武佐太祖定天下。旣卽位。盡以太祖所賜金帛。作上清宮朝陽門之內。旌興王之功。且爲五代兵革之餘。遺民赤子。請命上帝。以至道元年正月宮成。民不知勞。天下頌之。至慶歷三年十二月。有司不戒于火。一夕而燼。自是爲荆棘瓦礫之場。凡三十七年。元豐二年二月。神宗皇帝始命道士王太初居宮之故地。以法籙符水爲民禳禱。民趨歸之。稍以其力脩復祠宇。詔用日者言。以宮之所在。爲國家子孫地。乃賜名上清儲祥宮。且賜度牒。與佛廟神祠之遺利。爲錢一千七百四十七萬。又以官田十四頃給之。刻玉如漢張道陵所用印。及所被冠佩劍履。以賜太初。所以寵之者甚備。宮未成者十八。而太

初卒。太皇太后聞之，歎曰：民不可勞也，兵不可役也。太司徒錢不可發也，而先帝之意，不可以不成。乃敕禁中供奉之物，務從約損，斥賣珠玉，以巨萬計。凡所謂以天下養者，悉歸之儲祥，積會所賜，爲錢一萬七千六百二十八萬，而宮乃成。內出白金六千三百餘兩，以爲香火瓜華之用。召道士劉應真，嗣行太初之法，命入內供奉。官陳衍典領其事，起四年之春，訖六年之秋，爲三門兩廡，中大殿三，旁小殿九，鍾經樓二，石壇一，建齋殿于東，以待臨幸。築道館于西，以居其徒。凡七百餘間，雄麗靖深，爲天下偉觀。而民不知有司，不與焉。嗚呼！其可謂至德也已矣。臣謹按道家者流，本出於黃帝老子，其道以清淨無爲爲宗，以虛明應物爲用，以慈儉不爭爲行，合於周易何思何慮論語仁者靜壽之說，如是而已。自秦漢以來，始用方士言，乃有飛仙變化之術，黃庭大洞之法，太上天真木公金母之號，延康赤明龍漢開皇之紀，天皇太乙紫微北極之祀。下至於丹藥奇技符籙小數，皆歸於道家。學者不能必其有無，然臣嘗竊論之，黃帝老子之道，本也。方士之言，末也。脩其本而末自應，故仁義不施，則詔獲之樂，不能以降天神，忠信不立，則射鄉之禮，不能以致刑措。漢興，蓋公治黃老，而曹參師其言，以謂治道貴清靜，而民自定，以此爲政。天下歌之曰：蕭何爲法，講若畫一。曹參代之，守而勿失，載其清靜，民以寧壹。其後文景之治，大率依本黃老，清心省事，薄斂緩獄，不言兵而天下富，臣觀上與太皇太后所以治天下者，可謂至矣。檢身以律物，故不怒而威，捐利以予民，故不藏而富。屈己以消兵，故不戰而勝。虛心以觀世，故不察而明。雖黃帝老子，其何以加此。本旣立矣，則又惡衣菲食，卑宮室，陋器用，斥其贏餘，以成此宮。上以終先帝未竟之志，下以爲子孫無疆之福。宮成之日，民大和會，鼓舞謳歌，聲聞于天。天地喜答，神祇來格，祝史無求，福祿自至。時萬時億，永作神

主。故曰。修其本而未自應。豈不然哉。臣既書其事。皇帝若曰。大哉太祖之功。太宗之德。神宗之志。而聖母成之。汝作銘詩。而朕書其首曰。上清儲祥宮碑。臣軾拜手稽首。獻銘曰。

天之蒼蒼。正色非耶。其視下也。亦若斯耶。我作上清儲祥之宮。無以來之。其肯我從元祐之政。媚于上下。何脩何營。曰是四者。民懷其仁。吏服其廉。鬼畏其正。神予其謙。帝既子民。維子之視。云何事帝。而瘠其子。允哲文母。以公滅私。作宮千柱。人初不知。於皇祖宗。在帝左右。風馬雲車。從帝來狩。閱視新宮。察民之言。佑我文母。及其孝孫。孝孫來饗。左右耆耆。無競惟人。以燕我後。多士爲祥。文母所培。我膺受之。篤其材。千石之鍾。萬石之虞。相以銘詩。震于四海。

伏波將軍廟碑

蘇軾

漢有兩伏波。皆有功德於嶺南之民。前伏波。邛離路侯也。後伏波。新息馬侯也。南越自三代不能有秦。雖遠通置吏。旋復爲夷。邛離始伐滅其國。開九郡。然至東漢。二女子側貳。反海南。震動六十餘城。時世祖初平天下。民勞厭兵。方閉玉關。謝西域。況南荒何足以辱王師。非新息苦戰。則九郡左衽至今矣。由此論之。兩伏波廟。食於嶺南均也。古今所傳。莫能定于一。自徐聞渡海。適朱崖。南望連山。若有若無。杳杳一髮耳。艤舟將濟。眩栗喪魄。海上有伏波祠。元豐中詔封忠顯王。凡濟海者必卜焉。曰某日可濟乎。必吉而後敢濟。使人信之。如度量衡石。必不吾欺者。嗚呼。非盛德孰能如此。自漢以來。朱崖儋耳。或置或否。揚雄有言曰。朱崖之棄。捐之力也。否則介鱗易我衣裳。此言施於當時可也。自漢末至五代。中原避亂之人。多家于此。今衣冠禮樂。蓋班班然矣。其可復言棄乎。四州之人。以徐爲咽喉。南北之濟者。以伏波爲指南。事神

其可不恭。軾以罪謫儋耳三年。今乃獲還海北。往反皆順風。無以答神貺。乃碑而銘。銘曰。至險莫測。海與風至。幽不仁此魚龍。至信可恃。漢兩公寄命一葉。萬仞中自此而南。洗汝胸。撫循民夷。必清通。自此而北。端汝躬。屈伸窮達。常正忠生。爲人英。歿愈雄。神雖無言。我意同。

記

來賢亭記

柳開

人之學業文章行事。烈烈有稱者。雖前古而生。孰不願與之游。恨乎已之後時而出也。同世而偕立。並能而齊名。則反有不相識相知者。亦有識而不知者。吾觀乎斯二者。經史子集之中。或絕言而不相談。或會言而不相周。有之多矣。吾靜思之。未嘗不爲惜。是夫當時力不相及者乎。是夫當時義不相賓者。因而誨人。吾所以異于世矣。乃作此亭在東郊。厥有意乎。命曰來賢也。吾欲舉天下之人與吾同道者。悉相識而相知也。有能聞于吾。欲信而來于是也。有未聞于吾。欲知而來于是也。有先達于吾者。吾欲趨而來于是也。有後進于吾者。吾欲誘而來于是也。有務勝于吾者。吾欲讓而來于是也。有推退于吾者。吾欲尊而來于是也。大者吾將仰之。小者吾將俯之。貴者吾將奉之。賤者吾將崇之。極吾心而盡于世。合吾道而比于時。嗚呼。若曰。子將來賢之徒于人人。將來賢之名于子者。吾又非斯志也。蓋欲夫是亭也。不獨如前言而已耳。亦將化今而警古矣。

待漏院記

王禹偁

天道不言。而品物亨。歲功成者。何謂也。四時之吏。五行之佐。宣其氣矣。聖人不言。而百姓親。萬邦寧者。何

謂也。三公論道。六卿分職。張其教矣。是知君逸于上。臣勞于下。法乎天也。古之善相天下者。自咎夔至房魏。可數也。是不獨有其德。亦皆務于勤爾。況夙興夜寐。以事一人。卿大夫猶然。況宰相乎。朝廷自國初因舊制。設宰相待漏院于丹鳳門之右。示勤政也。至若北闕向曙。東方未明。相君啓行。煌煌火城。相君至止。噦噦鑾聲。金門未闢。玉漏猶滴。徹蓋下車于焉以息。待漏之際。相君其有思乎。其或兆民未安。思所秦之。四夷未附。思所來之。兵革未息。何以弭之。田疇多蕪。何以闢之。賢人在野。我將進之。佞臣立朝。我將斥之。六氣不和。災眚荐至。願避位以禳之。五刑未措。欺詐日生。請脩德以釐之。憂心忡忡。待旦而入。九門既啓。四聰甚邇。相君言焉。時君納焉。皇風于是乎清夷。蒼生以之而富庶。若然。總百官。食萬錢。非幸也。宜也。其或私讎未復。思所逐之。舊恩未報。思所榮之。子女玉帛。何以致之。車馬器玩。何以取之。姦人附勢。我將陟之。直士抗言。我將黜之。三時告災。上有憂色。構巧詞以悅之。羣吏弄法。君聞怨言。進諂容以媚之。私心愒愒。假寐而坐。九門既開。重瞳屢回。相君言焉。時君惑焉。政柄于是隳隳哉。帝位以之而危矣。若然。則死下獄。投遠方。非不幸也。亦宜也。是知一國之政。萬人之命。懸于宰相。可不慎歟。復有無毀無譽。旅進旅退。竊位而苟祿。備員而全身者。亦無所取焉。棘寺小吏王禹偁。爲文請誌院壁。用規于執政者。

竹樓記

王禹偁

黃岡之地多竹。大者如椽。竹工破之。剝去其節。用代陶瓦。比屋皆是。以其價廉而工省也。子城西北隅。雉堞圯毀。藜莽荒穢。因作小竹樓二間。與月波樓通。遠吞山光。平挹江瀨。幽閭遼窻。不可具狀。夏宜急雨。有瀑布聲。冬宜密雪。有碎玉聲。宜鼓琴。琴調虛暢。宜詠詩。詩韻清絕。宜圍棋。子聲丁丁然。宜投壺。矢聲錚錚。

然皆竹樓之所助也。公退之暇，披鶴氅，戴華陽巾，手執周易一卷，焚香默坐，消遣世慮。江山之外，第見風帆沙鳥，煙雲竹木而已。待其酒力醒，茶煙歇，送夕陽，迎素月，亦謫居之勝概也。彼齊雲落星，高則高矣，井幹麗譙，華則華矣，止于貯妓女，藏歌舞，非騷人之事。吾所不取。吾聞竹工云：竹之爲瓦，僅十稔，若重覆之，得二十稔，噫！吾以至道乙未歲，自翰林出滁上，丙申移廣陵，丁酉又入西掖，戊戌歲除日，有齊安之命，己亥閏三月到郡，四年之間，奔走不暇，未知明年又在何處。豈懼竹樓之易朽乎？幸後之人，與我同志，嗣而葺之，庶斯樓之不朽也。咸平二年八月十五日記。

河南縣尉廳壁記

張景

縣尉能禦盜而不能使民不爲盜，盜賊息，非尉之能，盜賊繁，過在乎尉矣。上失其平，下苦其情，弱者困死，彊者偷生，盜之常也。豈樂爲盜哉？無竭民力，民心安逸，無盡民物，民利豐實，居鄉聚族，有良有睦，履詐跡，僞有責，有愧，民之常也。孰肯爲盜哉？故曰：能與過，不在乎尉。在時政之得失爾。若夫平鬪訟，懾兇狡，惟盜是禦者，尉之職也。苟失其人，則貪殘誣枉，民不勝弊，反甚於盜焉。今郡縣至廣，庸不知所得者幾何人哉？太原王昭度字世範，登進士第，爲河南尉，尉之職無所不舉焉。雖然，誠不足展世範之才，顧其所得，亦斯民幸矣。世範與景有舊，因求記，刻于廳壁，庶有信于後。於是乎書。

亳州法相院鍾記

穆脩

古之爲鍾，其用大矣。樂記稱黃鍾大呂，又春秋傳稱師有鍾鼓曰伐，則是旣爲大樂之備，又爲征伐之具。其用之大樂，可以調陰陽，感人神，導天地之和，用之軍旅，可以讐不軌，懼不庭，張邦國之威。考是二者，則

鍾爲禮樂征伐之器久矣。三代之際。以及秦漢。皆不變其用。今是鍾也。專爲釋氏之器。亦從可知也。東漢之運將季。西域之法聿來。流晉宋而益宗。涉齊梁而大盛。率天下而從其教。擬王者而闢其居。無王公無士民。無高卑貴賤。莫不從而信奉之。不從而依歸之。以求其福報乎。如是則盛矣。大矣。佛之爲法也。旣與中國聖人之道。並行于時。則所謂禮樂征伐之器者。安得不入于佛之宮哉。佛之宮。其徒羣棲而旅集。多者數百人。而居之。其朋旣繁。不常厥處。將齊彼衆。非言得通。則必聲物以齊之。求物聲宏達。而及遠者。莫踰于鍾。是知鍾爲佛宮之用。其在此乎。亳州法相禪院。有主院僧海宣者。謹行之僧。能勤以募衆。崇揭土木。門堂殿廡。總百餘間。多宣師所葺也。聚徒旣旣。資膳悉備。警旦暮者。其闕惟鍾。州人時氏。豐財好佛之士也。一日詣宣師。謀曰。一鍾費用。且幾何。願輸其資。獨營斯善。師卽計其用度告之。遂以錢若干畀師。復謂曰。鍾之成也。匪高弗居。則并請爲居鍾之樓。以此土不產美材。因命僧海真。南抵于舒。使其材木匠爲成構而離之。自舒及譙。使以舟力。雖皆出時氏。然能減費便事者。蓋二師心計運度之謀也。天聖元年春。始召鍾人。與其鼓鑄液波金錫。一冶而成。鍾事旣立。樓材亦至。建于殿南東偏。居鍾于上。層臺翬飛。雙欒鯨震。嶷嶷崇構。上凌煙空。琅琅洪音。遠落霄外。于以壯觀精宇。于以號令羣縉。日叩焉。使思其所以息晦。明風雨。罔迷厥時。據釋氏言。鍾之聲。扣之。可以上極天界。下洞幽泉。導死者冥昧之魂。出地獄沉淪之苦。故死者之家。嘗賂金帛衣食。求擊其響。若如其說。則非獨用口節昏曉。戒食寢而已。又復能售極苦之資。助釋氏之費焉。鍾不可闕于佛宮。明矣。

靜勝亭記

穆脩

州郡有兵馬監。職設今代。專督川。爭火盜。泊軍籍庫兵。商征酒榷之事。則皆與守同管署。自政賦貲幣刑罰獄訟之煩。則一不關及其職位優。其務守簡。蓋士之階武而升者。非歷勞久十餘年。不被茲命。凡尸之者。能持謹常。不失局事。鉅細不絕筆。可否歸之州。足爲稱任。雖材且無所施。顧或每每好用自擾。以招權樹威。而病其職者多矣。潁川陳君永錫。始以公侯裔。縻迹落武。一再遷爲右侍禁。蓋漢之郎將類也。來監察之郡戎。爲人力文服古。而雅任闊達。樂所守無事。唯比旦一過廳。還則擁書自娛。常言吾職甚逸。吾性加疎。思得洒然空曠一字。爲寄適之地。盡糞除耳目俗譁。而休吾心焉。廨中舊有亭。其制卑而久。爲之易去。故材俾豐宏之。前數十步間。夾樹畹蔬。蹊果果外。先峙射棚。棚豈清趣中宜有哉。然于亭遠甚。不大與亭害。故亦不廢存之。亭成。君謀予以名。予請以靜勝名亭。陳君之飾是亭。豈志於靜者耶。夫靜之闡。仁人之所以居心焉。在心而靜。則可以勝視聽思慮之邪。邪不勝心。乃誠心誠性明。而君子之道畢矣。惟陳君能有是道。故名是亭。人苟不果其道。名無益也。是亡實而守空器也。不與夫盜名而居者比歟。後之挈斯職。據斯亭者。亦復能悅靜。而思勝乎。苟能善矣。無爲自擾而病其職。以守亭之名。爲亭之媿也。

庭莎記

晏殊

介清思堂中。讌亭之闕。隙地其縱七八步。其橫南八步。北十步。以人跡之罕踐。有莎生焉。守護之卒。皆疲癯者。芟薙之役。勞于夏畦。蓋是草耐水旱。樂延蔓。雖拔心隕葉。弗之絕也。予旣悅草之蕃廡。而又憫卒之勤瘁。思唐人賦詠。間多有種莎之說。且茲地宛在崇堞。車馬不至。弦匏不設。柔木嘉卉。難於豐茂。非是草也。無所且焉。於是傍西墉。畫脩徑。布武之外。悉爲莎場。分命騶人。散取增殖。凡三日。乃備。援之以丹楯。漑

之以甘井。光風四泛。纖塵不驚。嗟夫。萬彙之多。萬情之廣。大含元氣。細入無間。罔不稟和。罔不期適。因乘而晦用。其次區別。而顯仁。措置有規。生成有術。失之則斃。獲之則康。茲一物也。從可知矣。乃今遂二性之域。去兩傷之患。偃藉吟諷。無所不諧。然而人所好尚。世多同異。平津客館。尋爲馬廐。東漢學舍。問充園蔬。彼經濟所先。而汙隆匪一。矧茲近玩。庸冀永年。是用刊辭。珉珉庶通賢君子。知所留意。儻與我好。庶幾不剪也。

岳陽樓記

范仲淹

慶歷四年春。滕子京謫守巴陵郡。越明年。政通人和。百廢具興。乃重修岳陽樓。增其舊制。刻唐賢今人詩賦于其上。屬予作文以記之。予觀夫巴陵勝狀。在洞庭一湖。銜遠山。吞長江。浩浩湯湯。橫無際涯。朝暉夕陰。氣象萬千。此則岳陽樓之大觀也。前人之述備矣。然則北通巫峽。南極瀟湘。遷客騷人。多會于此。覽物之情。得無異乎。若夫霏雨霏霏。連日不開。陰風怒號。濁浪排空。日星隱曜。山岳潛形。商旅不行。檣傾楫摧。薄暮冥冥。虎嘯猿啼。登斯樓也。則有去國懷鄉。憂讒畏譏。滿目蕭然。感極而悲者矣。至若春和景明。波瀾不驚。上下天光。一碧萬頃。沙鷗翔集。錦鱗游泳。岸芷汀蘭。郁郁青青。而或長煙一空。皓月千里。浮光躍金。靜影沉璧。漁歌互答。此樂何極。登斯樓也。則有心曠神怡。寵辱偕忘。把酒臨風。其喜洋洋者矣。嗟夫。予嘗求古仁人之心。或異二者之爲。何哉。不以物喜。不以己悲。居廟堂之高。則憂其民。處江湖之遠。則憂其君。是進亦憂。退亦憂。然則何時而樂耶。其必曰。先天下之憂而憂。後天下之樂而樂乎。噫。微斯人。吾誰與歸。

時六年九月十五日。

桐廬郡嚴先生祠堂記

范仲淹

先生光武之故人也。相尚以道。及帝握赤符。乘六龍。得聖人之時。臣妾億兆。天下孰加焉。惟先生以節高之。既而動星象。歸江湖。得聖人之清。泥塗軒冕。天下孰加焉。惟光武以禮下之。在蠱之上九。衆方有爲。而獨不事王侯。高尚其事。先生以之。在屯之初九。陽德方亨。而能以貴下賤。大得民也。光武以之。蓋先生之心。出乎日月之上。光武之器。包乎天地之外。微先生不能成光武之大。微光武豈能遂先生之高哉。而使貪夫廉。懦夫立。是有大功於名教也。仲淹來守是邦。始構堂而奠焉。迺復爲其後者四家。以奉祠事。又從而歌曰。

雲山蒼蒼。江水泱泱。先生之風。山高水長。